

ERPERSU

Sanqbof Ghovshaw-eu

Rev. Dr. Arje Yaerbyan

Erpersu Sangbof Ghovshaw-eu

- 1.Kali-euq lafkhoer Za-eu Jeqbir (Eps.
1:1-14) 3
- 2.Kalizaq Siqnya larni Sharcaw-eu (Eps.
1:15-23) 9
- 3.Kakhof-eu Guiqlanq yawdzanr (Eps.
2:1-10) 13
- 4.Lafyaq Baqda'nae Gawfler-euq (Eps.
2:11-22) 17
- 5.Miqyaer nae Zaftaq Zawrhuiq-eu jeq
(Eps.3:1-13) 23
- 6.Kalizaq Daefnya larni Sharcaw-eu (Eps.
3:14-21) 27
- 7.Kalizaq Nuima Gm-awr Daef-eu (Eps.
4:1-16) 31
- 8.Yawshawr shawr-aer Daef-eu (Eps.
4:17-24) 37
- 9.Aqda Miqyaer-anr Daefcaw-awq (Eps.
5:1-21) 43
- 10.Miqsawr Yozaq-aer Daefdaf-eu (Eps.
5:22-33) 49
- 11.Kalizaq-euq Ardeuv Artiv (Eps.6:1-9)

12. Saflarpaw Guirdeuv Deuv-eu (Eps.
6:10-24) 61

*"Ghaq khav-eu Kalizaq-aq,
Miqyaer aqsurghaq lalaer
siqnya-awr,
yawqha Kali-euq lafkhoer
aqsurghaq lelaer
siqnya-eu mirnae ghaq khav-
eu mae.*

*Ghaq baq-eu Kalizaq-aq,
Miqyaer
aqsurghaq lalaer ngaer-awr,
yawqha
Kali-euq lafkhoer aqsurghaq
lelaer
ngaer-euq mirnae ghaq baq-eu
mae"*

Dzawdeuv 1: Kali-euq Lafkhoer Za-euq Jeqbir

I.Ardanq Bae-eu Dawq

“Ghaq khav-eu Kalizaq-aq, Miqyaer aqsurghaq lalaer signya-awr, yawqha Kali-euq lafkhoer aqsurghaq lelaer signya-eu mae.”

II.Daefluf-eu Tsawrhawr (Eps.1:1-3)

A.Bof-euq Ghaq (1a) *“Miqyaer nuima tsaq-eu mirnae, Yeqsur Kali-euq ghaqkhaer geufluf-eu Pawrluv.”*

Pawrluv, aqsurghaq la? Aqjeq mirnae jancoer paq-aer ghae-eu la? Pawrluv-aq; **Tif**, Yeqsur Kali-euq Ghaqkhaer tiqghaq mae: Yeqsur-euq ghaqkhaer 12 ghaq jawrgar nae, Yurdav shir-euq nar-aq, dzerlar-euq deug nae ‘Maqtir’ laer kur-eu ghaq-anr tserlanq-euq khawf (Ghkh.1:26), Yeqsur nae Pawrluv-anr tser-euq mae (Ghkh. 9:1-9).

Nyif, Pawrluv yawqhar yawqha taqhuiq-awr, dzaw-awr sawx-euq gar maqngeur-eu, *“Miqyaer nuima tsaq-eu”* jeq-anr dawqpaeq taq-awr ngaeq-awr mr-eu mae. Nawr, aqsurghaq le? Aqjeq mirnae, aqcawq, nawq-anr ya’narhaq-eu la?

B.Gui-eu Deuq (1b) *“Kali lafkhoer sarjax zif-eu tsawrhaq pyeuf-eu, Erpersu-anr jawr-eu tsawrshawr deuq-anr sanqbof bofanr lef-eu ma.”*

Pawrluv, aqyawf, Kali-euq lafkhoer aqsurghaq lealer taef-aer maqngeur-eu, Kalizaq aqsurghaq pyeuf-eu lalaer aernoeg naeq-eu mae; **Tif**, *“tsawrhawr”*-guiqlanqdawq-anr jan-awr, Yeqsur-anr hageuf-eu tsawrhaq mae. **Nyif**, *“sarjax zif-eu”*-maqshafdawr-aer maqguvni, maqpov maqpar larni jan-eu lafkhoer sarjax zif-eu tsawrhaq mae. Nawr, yawqha ‘tsawrshawr’ malaer signya-awr, Miqyaer-anr sarjax zif-eu lafkhoer daefluf malaq?

C. Dawqcawq Puq-eu (2) *“Aqda Miqyaer & Yeqsur Kali-euq”*

guiqlanq yawdzanr & nuisar of-eu jeq nawmaf-euq khoertav javluf-ur.”

Zawr muiq-eu Miqyaer-anr dawqpaeq taq-awr dawqcawq puq-eu dawq: **Tif**, guiqlanq 2 jeq; Guiqlanq yawdzanr-maggeux gar za-euq guiqlanq & nuisar of-eu jeq-aqjeq keuvle khawf nuima sarnya-eu nuisar. **Nyif**, Aqda Miqyer & Yeqsur-anr nae oe-euq guiqlanq mae.

D. Tsawrshawrdeuq za-euq Guiqlanq (3) “*Yeqsur Kali-euq Aqda Miqyaer-anr jaceuq kar-ur. Mqtav mirkhanq-anr jav-eu saflar paw-euq guiqlanq yawqjeq navluf, Kali lafkhoer, aqdui-anr bifnaeq laf-euq mae.*”

1. Aqgar nae za-euq le? “*Aqdui-euq Sanqpaq Yeqsur Kali-euq Aqda Miqyaer-anr*” nae za-euq ma. Miqyaer-aq: **Tif, muiq-eu**, aqdui-anr bae-awr bosav luf-eu uqtaf, bibuq-ir-eu Miqyaer pyeuf-eu mae. **Nyif, huiq-eu**, yawqgar navluf jawr-awr, yawqjeq navluf signya-eu uqtaf, yawqjeq navluf janrnya-eu Miqyaer pyeuf-eu mae. Mirtsaq tanqkhawr hawr-eu mirtsaq tanqkhawr heu-euq lafkhoer kharjawr kharjav-eu jeq dawqtawvluf aqyawf-euq taefmae (Jc.24:1).

2. Aqjeq armyavni za-euq le? “*Saflar paw-euq guiqlanq yawqjeq navluf*” za-euq ma. ‘Yawshawr Saflar’ za-eu-aq, yawqjeqyawq taf-aer huiqdzaeq-eu guiqlanq pyeuf-awr, Saflar-euq baoq (Ghkh.1:8), Saflar-euq arsiq (Glt.5:22-23) & Saflar-euq lafsawq (Lm.12; 1Glt.12) za-euq ma. Heumirnae, Kalizaq malaer aer-eu deuq ya’ mawr ngae, Pawrluv narhaq-eu “*Nawmaf janlarngae, Yawshawr Saflar za’maq lor?*” (Ghkh.19:1-7). Miqyaer, aqdui-anr guiqlanq saflarpaw za-euq lof-aer shiqshaq pawkhawf biza mawf-eu mae (3Yh.1:2).

3. Aqjox-aer za-euq le? “*Kali lafkhoer.*” Erpersu sanqbof lafkhoer “Kali lafkhoer” laer 27 pov aertaq-euq mae. Aqdui Kalizaq za-euq guiqlanq dawqtawvluf, “Kali-euq lafkhoer” za-euq ma: Miqyaer naeq-aer tsaqler dzoerler-euq ma (Eps.2:13), Miqyaer naeq-aer nuirluf ma (Eps.2:6-7), yawmuiq jeq bimir-eu gharduq baenaq laf-eu mae (Eps. 2:10), tsawrhaq yawshuif pyeufar-euq ma(2Glt.5:17).

4. Aqgar za-euq le? “*Mqtav mirkhanq-anr.*” Maqjan-eu tsawrhaq-aq, mirtsaq-anr noeqtsov taq-euq mirnae, Yeqsur, aqyawfmaf-anr “*mirtsaq-euq zaqdeuq*” laer kur-eu mae (Lk.16:8). Aerkhawf, Kalizaq-aq, aqyawfmaf-euq tsawrmyanr mqtav mirkhanq-anr jav-awr

(Lk.10:20), mqtav-euq tsawrhaq pyeuf-eu uqtaf (Plp.3:20), mqtav jav-eu jeq-anr noeqtsov taq-euq mae (Gls.3:1-2).

5. Za-euq mirnae aqjeq yajanr-eu la? “Aqdui-euq Sanqpaq Yeqsur Kali-euq Aqda Miqyaer-anr jaceuq kar-eur.” Aqdui nae za-euq guiqlanq-aq, aqdui za-awr, aqdui-anr muiq-eu gar saq-eu maqngeur-a. Miqyaer-euq tsawrmyanr muiq-awr, aqyawf-euq yawshaef khanqsaer dovlarni, Miqyaer-anr ciqhuiq ciqmanr-awr ciqpoeq ciqgor-eu lafkhoer jaceuq-eu jeq dovlargar yabi saqler-eu mae (Plp.1:20).

III. Kali-euq Lafkhoer Aqdui-anr Of-eu Jeqbir **(Eps.1:1:3-14)**

Aqdui, Kalizaq za-euq jeqbir-aq, **Smrtif Miqyaer**; Aqda Miqyaer, Zaqyo Yeqsur & Yawshawr Saflar-anr nae za-euq jeqbir mae. Aqda Miqyaer-euq bawqtoq jav-eu lof-aer, Sanqpaq Yeqsur nae mrshawr-awr, Yawshawr Saflar, aqdui-euq daefzir lafshawr luf-eu mae.

A.Aqda Miqyaer-anr Taf-eu Guiqlanq (1:4-6)

1.Miqyaer, aqdui-anr tserdov naeqlaf-euq mae (4). “Aqdui, Miqyaer-euq maegshi... shawr-eu tsawrhaq pyeuflarni, mirtsaq maqbae-euq minav-aer, gaq-eu lafkhoer Kali-anr ghoe-awr aqdui-anr tserdov taq-euq mae.”

a.Miqyaer, aqdui-anr tser-euq khoer-aq, mirtsaq maqbae-euq minav-aer tserdov naeqlaf-euq mae. Aqdui, aqyawf-anr tser-euq maqngeur-eu, aqyawf, aqdui-anr tser-euq mae. “Nawmaf nae ngaq-anr tsergeuf-euq maqngeur-a...ngaqnae nawmaf-anr tserdov-awr tsaq tsov-euq ma” (Yh.15:16). Aqdui, aqyawf-anr pov-eu maqngeur-eu (Lm.3:10-11), aqyawf, aqdui-anr povle-euq mae (Lk.19:11). Miqyaer teq-eu tsawrhaq-anr khawf tser-euq mae (1Glt.1:27-28; Yk.2:5).

b.Aqdui, aqyawf-euq maegshi yawshawr shawr-aer bidaef-eu laer tserdov naeqlaf-euq mae. Miqyaer-aq, yawshawr mirnae, aqyawf-euq maegshi yawshawr shawr-aer yadaef-eu mae (1Btl. 1:15-16).

2.Aqdui-anr, Miqyaer-euq zaq bipyeuflar

naeqlaf-euq mae (5). *“Miqyaer nuikhanr shir-eu lof-aer, Yeqsur Kali-anr ghoe-awr nae aqdui, aqyawf-euq zaq pyeuflarni, Miqyaer yawbae ngaenae tsaqtsov taq-euq mae.”*

a. Yeqsur Kali baqda nae **Miqyaer-euq zaq** pyeuflar-euq ma. Heu-aq, arhu-yawbae ngaenae Miqyaer nae tsaqtsov taq-euq lof-aer pyeuflar-euq mae. Yeqsur-anr hageuf-euq mirnae mae (Yh. 1:12).

b. Miqyaer nuima tsaq-awr **tsaqtsov** taq-euq lof-aer pyeuflar-eu mae. Aqdui tiqjeqnav mr-euq mirnae maqngeur-a.

3. Miqyaer, aqdui-anr hageuf naeqlaf-euq mae (6). *“Aqdui, guiqlanq yawdzanr-euq yawshaef khangsaer-anr bijaceuq-eu laer, Miqyaer, zawrgaq-eu ghaq-anr ghoe-awr, aqdui-anr hageuf naeqlaf-euq mae.”*

a. Miqyaer, aqdui-anr **hageuf** naeqlaf-euq heu-aq, maqgeux-eu gar za-euq guiqlanq-aqdir Miqyaer-euq guiqlanq yawdzanr mae.

b. Aqyawf-euq guiqlanq yawdzanr-euq yawshaef-anr **bijaceuq-eu** laer hageuf naeq laf-euq mae.

c. Miqyaer, aqyawf zawrgaq-eu Zaqyo (Yeqsur Kali)-anr ghoe-awr nae, aqdui-anr hageuf naeqlaf-euq mae.

B. Miqyaer-euq Zaqyo-anr Taf-eu Guiqlanq (1:7-12)

1. Kali, aqdui-anr kakhof-awr iqbax pyaeqnaeq laf-euq mae (7). *“Miqyaer-euq guiqlanq yawdzanr sanrdui dui-eu lafkhoer, aqdui, Zaqyo-euq shiq baqda 'nae kakhof-eu jeq za-awr, iqbax pyaeqnaeq-eu jeq za-euq ma.”*

a. **Kakhof**-eu-aq, tiqjeqpaq zakhof mawf-eu mirnae arpoeq bif-awr zeurkhof-eu gar aer-eu mae. Aqdui, Miqyaer nae bae-euq khawf, iqbax-euq zaqkhav (Lm.6-7), zanrdawq khofdawq-euq zaqkhav (Lm.5:1), Saqdaq hawr-eu mirtsaq-euq zaqkhav (Glt.1:4; Gl.1:13-14) geuf-ir taq-awr jawrgar, Yeqsur Kali-euq shiq nae zeufkhofdov--kakhof naeqlaf-euq mae (1Btl.1:18). Zaqkhav-aq, irshaq shaq-eu khawf, aqdui, Miqyaer-euq zaq pyeuflar-

awr, smrmuiq smrbaw bawlar-euq ma.

b. **Iqbax pyaeq-eu**-aq, tiqjeqpaq maqnyaeftaeq taqni pyaeqdzae-eu gar aer-eu mae. Yurdav tsawrhaq, 'Iqbax shadzae-eu Arnan' keuvlar nar-aq, cifmyaef 2 mawr tsanrlaf-awr, tiqmawr saef-awr shiq yur-awr nae yawdaef mawr-euq khoer byavshaeq-awr, Irsaqlaqlav tsawrhaq-euq gharduq iqbax sharpyaeq-euq nar-aq, cifmyaef khoermawr bawrtsang-anr pyaeqdzae-ir-eu mae (Lb. 16). Kali, lafyaq khoertav kamrshir-euq-aq, aqdui-euq iqbax pidzae-pyaeqnae-eu laer shirdan-euq mae (Yh.1:29). Iqbaxzaq-aq, yarkhaq dargar yadaq-eu khawf, aqdui, iqbax pyaeq-eu jeq za-awr, yarkhaq dargar maqpar yadaq-eu mae.

2. Miqyaer nae zaftaq-euq jeq panmaeq

naeqlaf-euq mae (8-10). ⁸*Miqyaer guiqlanq yawdzanr khoer-anr ghoe-awr, aqdui-anr ghovshaw nya-eu jeq & zaqsiq*

tsawrganr tiqbyan tiqlaf bifnaeq laf-euq mae. ⁹*Miqyaer, aqyawf nae noeqtsaev taq-euq jeq, aqyawf nuikhanr shir-eu mirnae, zaftaq-euq*

aqyawf nuima tsaq-eu jeq, aqdui-anr bisiq naeqlaf-euq mae. ¹⁰*Zaftaq-euq jeq khoer-aq, aryamq byanlarngae, mq khoertav & mirtsaq khoertav kharjawr kharjav-eu dawqtawvluf, Kali lafkhoer bigawf bibaw lar-eu laermae."*

a. Yeqsur **Kali-anr siqnya**-eu-aq, mirtsaq khoertav nae gordzaeq dzaeq-eu 'ghovshaw-eu jeq' & 'zaqsiq tsawrganr' mae.

b. Yeqsur Kali-anr, siqnyangae, **Miqyaer nuima tsaq**-awr nuikhanr shir-eu jeqkhawf, siqnya-eu jeq pyeuf-eu mae.

c. Kali & Miqyaer nuima tsaq-eu jeq-anr siqnya-eu-aq, Miqyaer nae **zaftaq-euq jeq**-anr siqnya-eu jeq pyeuf-eu mae.

d. Aqdaq baqda'nae, Miqyaer-anr khawf, tiqghaq tirghaq & jawqlaw jawrlawr-anr khawf, maqtsaq maqdzoerler nya-eu Kali lafkhoer **tsaqler dzoerler**-eu garma danrlar-eu mae.

3. Jeqbir of-eu tsawrhaq bipyeuflar naeqlaf-

euq mae (11-12).

“¹¹ *Aqdui khawf Kali lafkhoer jeqbir of-eu tsawrhaq pyeuflar-euq ma. Miqyaer-euq arpyar jav-eu lof-aer, aqyawf yawbae ngaenae tserdov taq-awr, dawqtawvluf lafkhoer aqyawf nuinoeq nuidur jav-awr nuima tsaq-eu lof-aer mr-euq mae.* ¹² *Khoer-aq, aqcawq- euq maeqhu Kali-anr ghoe-euq deug, aqyawf-euq yawshaef khanqsaer-anr bija ceug-eu gharduq mae.*”

a. Aqdui **jeqbir of-eu** tsawrhaq pyeuflar-euq ma. Aqdui jeqbi za'ngae Kali naeq-aer za-eu mae. “*Aqyawf-euq zaq pyeuf-eu ngeurnar-aq, jeqbir khawf of-eu mae. Kali naeq-aer yawshaef khanqsaer za'ni aqdui, aqyawf naeq-aer tiqkawv lof-aer daqnar-aq, Miqyaer-euq jeqbir of-eu tsawrhaq pyeuf-awr, aqdui khawf Kali naeq-aer jeqbir khoer za taef-a.*” (Lm.8:17). Miqyaer-anr gaq-eu tsawrhaq-aq, huiqdui dui-eu jeqbir za-eu mae. “*Myavnuiv maqmawr haw-aer, naqbawr maggaq haw-euq uqtaf, tsawrhaq-euq nuima maqnoeqkeuv coer-eu jeq, Miqyaer nae, aqyawf-anr gaq-eu tsawrhaq-euq gharduq laeqhmq taq-euq mae.*” (1Glt. 2:9).

b. Miqyaer **nuima tsaq-eu** jeq bibyan lar-eu gharduq mae. Miqyaer-euq maeqshi, maqyaef maryaef-aer pyeuflar-euq tiqjeq-iq maqjav-a. Yawqjeq navluf, Miqyaer nae noeqtaq-euq lof-aer pyeuflar-eu mae. Yawkawr yawmya baw-eu lawkhawf yapyeuf lar-eu mae.

c. Aqdui jeqbir of-eu tsawrhaq pyeuflar-euq mirnae, aqdui-euq daefzir-anr nae Miqyaer-euq yawshaef khanqsaer-anr **jaceug-eu** jeq yabi dovlar-eu mae. Pawrluv-euq arpyar uqdzan heu pyeuf-eu lof-aer (Plp.1:20-21), aqdui-euq arpyar uqdzan bipyeuf-eu tsaqmae.

C. Yawshawr Saflar-anr Taf-eu Guiqlanq (13-14)

Miqyaer mqmaq maqbyav yarzir-anr nae gar mrlaf-awr (Eps.1:4-6), dzeurlaf-euq zirga dzanrga lafkhoer mr-euq (Eps.1:7-12), nymq-mr, aqdui-euq daefzir lafkhoer gar mrluf-eu mae

(Eps.1:13-14).

1.Yawshawr Saflar-aq, aqdui-anr tsagtsov-euq "jmq" mae (13). "Nawmaf-anr kakhof nya-eu yawtsaq yawdawr-euq guiqlanq dawq-anr yagaqngae, nawmaf, Kali-anr ghoelar-euq mae. Khoermirnae, jan-eu lafkhoer sarjax biftaq-euq lof-aer, Yawshawr Saflar-anr ghoe-awr nawmaf-anr jmq diqtaq-euq mae." Yaerbof heudeuv, tsawrhaq tiqghaq kakhof-eu jeq za-eu ardeuv artiv, aqjox-aer lalaer aertaq-euq mae.

a.Guiqlanq dawq-anr **yagaq**-euq.

Guiqlanq dawq-aq, Yeqsur Kali, aqdui iqbxzaq-euq gharduq kamrshir-awr, bibaf panq-euq smqnan-anr ghofdaeflar-euq garkawv khoer mae (1Glt.15). Guiqlanq dawq heu, Yurdav tsawrhaq-anr maeghu oe-awr, aqcawq tsawrjeuq tsawrca-anr khawf gaqkeuv-ir-euq mae (Lm.1:16). Jan-eu jeq-aq, Yeqsur Kali-euq garkawv yagaq-euq mirnae janlar-eu mae (Lm.10:17).

b.Kali-anr **ghoelar**-euq. Miqyaer-anr jan-awr Kali-anr ghoe-eu lafkhoer, guiqlanq yawdzanr baqda'nae kakhof-eu jeq za-eu mae (Eps. 2:8-9). Kakhof-eu jeq za-eu ardeuv artiv heu-aq, guiqlanq dawq maeg-eu bawqtov Lm.10:13-15 lafkhoer aertaq-euq gar tsaq-eu mae.

c.Yawshawr Saflar-euq **jmq** za-euq.

Guiqlanq dawq yagaq-awr, Kali-anr jan-euq naeq-aer za-eu mae (Ghkh.10:34-48). Jmq bidiq-eu heu, aqjeq aqjox-aer aermawf-eu la? **Tif**, zeurtsaev ghaq-euq malae aer mawf-eu mae. **Nyif**, yawsanr jawrma laer aermawf-eu mae (1Glt.6:19-20). **Smr**, lofpir hawpir luf-eu laer aermawf-eu lof-aer (Mt.27:62-66); Yawshawr Saflar, aqdui naeq-aer jawrle-euq (Yh.14:16-17), aqdui, aqyawf-euq nuima lavcawv nya-eu mae (Eps.4:30). Aqyawf aqmyanluf aqdui naeq-aer jawr-eu mae (Hby.13:5). **Oeq**, jaqmyawf maqngeur-eu aqmar maelaer aermawf-eu mae. "Tsawrhaq tiqghaq-euq lafkhoer Kali-euq Saflar maqjawr nar-aq, khoerghaq Kali-anr maqtaf-a" (Lm.8:9).

2. Jeqbir za-eu yawduq bawni "kamq-eu jmq" pyeuf-eu mae (14).

"Aqyawf-euq yawshaef khanqsaer-anr jaceuq-eu jeq dovlarni, zeurtsaev taq-euq kakhof-eu jeq maqza-euq khoer keuvni, Yawshawr Saflar-aq, aqdui jeqbir za-eu yawduq bawmae laer kamq-eu ghaq pyeuf-eu mae."

a. Jeqbir tiqbyan'ni **zataef-a** laer bisiqni, jawrle-euq mae. Yoshuif, miqshuif-anr sheuqdanq dzaqma laer myawq yurtaq yaf-euq lof-aer, aqdui-euq yoshuif-Yeqsur, miqshuif pyeuf-eu aqdui-anr aqdir sheuqkhof laqle-awr, mq khoertav-euq jeqbir biza malaer, aqdui naeq-aer Yawshawr Saflar bijawrle naeqlaf-euq mae.

b. Kakhof-eu jeq 3 tiv: **Kali mrshawr** naeqlaf-euq baqda'nae, aqdui-euq saflar, *kakhof-eu jeq za-euq* mae. **Yawshawr Saflar lavshawr** luf-eu baqda'nae, aqdui-euq nuima & daefzir *kakhof-eu jeq zaluf-eu* ma (kakhof-eu jeq maqza-euq khoerkeuvni). **Aqda Miqyaer** arsaq saqngae nan-anr, **yawshawr ngar-a** laer aer *kakhof-eu jeq za'ma*.

IV. Arsaq Saq-eu Dawq

Taqngaer de-eq! Smrtif Miqyaer; Aqda, Zaqyo & Yawshawr Saflar nae, aqdui 'tsawrhsawr' deuq-euq gharduq mr-euq heu-aq, **aqyawf-euq yawshaef khanqsaer** dovlarni gharduq mr-euq mae (Eps.1:6, 12, 14).

Dzawdeuv 2: Kalizaq Siqnya larni Sharcaw-eu

I. Ardang Bae-eu Dawq

Kalizaq myaqmyaqni-aq, yawqha Kali-euq lafkhoer arnavni sanr-eu lelaer maqsiq nya'ni, irshaqzaq-euq nuinoeq anr-awr daefluf-eu mae.

II. Kalizaq-euq Gharduq Guiqlanq Sharcaw-euq

(1:15-23)

A.Aqjeq mirnae Pawlulv Guiqlanq Sharcaw-euq la?

(1:15-16)

⁵*Khoermirnae, nawmaf, Sanqpaq Yeqsur-anr nuijan anr-awr, tsawrshawr dawqtawv luf-anr gaq-eu garkawv, ngar yagaq-awr,*

¹⁶*ngar, nawmaf-euq gharduq maqnaq lerni Miqyaer-anr jaceuq-eu lafkhoer, nawmaf-anr aerkeuv aerkeuv-aer guiqlanq sharluf-eu ma: "*

1.Aqyawfmaf-anr **Yeqsur-anr jan-awr**, tsawrshawr deuq-anr **gaq-eu** mirnae. **noeqmuiq-awr** noeqpoeq-eu mirnae; *"Khoermirnae, nawmaf, Sanqpaq Yeqsur-anr nuijan anr-awr, tsawrshawr dawqtawv luf-anr gaq-eu garkawv, ngar yagaq-awr,"* (Eps.1:15). Kalizaq tiqghaq aqdir Kali-euq zaqlanr ngar-a laer; Miqyaer-anr jan-awr, tsawrhaq-anr gaq-eu garnae siqduq lar-eu mae. Heu 2 jeq maqgheughawq nya-a.

2.Aqmyanluf **maqnaqlerni** Miqyaer-anr jaceuq-awr guiqlanq shar-eu lafkhoer shar-euq mae. *"Ngar, nawmaf-euq gharduq maqnaq lerni Miqyaer-anr jaceuq-eu lafkhoer, nawmaf-anr aerkeuv aerkeuv-aer guiqlanq sharluf-eu ma: "*(Eps.1:16). Guiqlanq shar-eu heu-aq, tsawrkhav khavlar-euq Kalizaq-euq mrjeq sharkawv & shaevdzeuf pyeuf-eu mae. Pawrluv kuv-euq lafkhoer jawr-eu khawf, lafnuyirpaw jawr-eu deuq-euq gharduq guiqlanq sharcaw-euq mae (Eps. 1:15-23; 3:14-21; Plp.1:9-11; Gls.1:9-12).

3.Pawlulv, aqyawfmaf-euq gharduq guiqlanq sharngae, maqjav-eu jeq bijav larni maqngeur-eu, aqyawfmaf jav-eu jeq-anr **javluf-eu jeq-anr bihaw mawrnya-awr bisiq nyalarni** guiqlanq sharcaw-euq mae.

4.Bihaw mawr-awr **bisiq nya'ni maeq-eu ghaq-aq, Yawshawr Saflar mae** (Isy.11:2; Yh.14:25-26; 16:12-14). Kharngeur-eu tsawrhaq yawqha-euq zasiq tsawrganr-anr ghoer-awr nae saflar paw taf-eu jeq maqghofshaw nya-a, Yawshawr Saflar-anr yaghoer-eu mae (1Glt.2:9-16).

5.Yawshawr Saflar, **jan-eu tsawrhaq-eu nuima-anr bihaw mawr-awr** bisiqnya-eu mae (Eps.

1:18). *Nuima* khawf; *Mawrnya-awr* (Jc.119:18; Yh. 3:3), *gagnya-eu* mae (Mt.13:9; Hby.5:1).

Saflarpaw taf-eu jeq-anr maqghovshaw nya-eu-aq, nuima-anr nae ir-eu mae (Mt.13:13).

B.Pawrluv-euq Guiqlanq Shardawq (1:17-23)

Pawrluv guiqlanq **aqsurghaq-anr shar-euq la?** "*Aqdui-euq Sangpaq Yeqsur Kali-euq Miqyaer, Yawshaef khangsaer huiq-eu Aqda-anr*" shar-eu mae (1:17a). Aqsurghaq, aqjox-aer ghaegar shar-eu laer yawduq maqbawni 'mqmir nanrma bala' & 'mirtsaq khoertav kharjawr-eu baoq kharanr-eu deug-anr' shar-eu maqngeur-a.

Pawrluv **aqjerjeq gharduq shar-euq la?** Heu 4 jeq shar-euq mae:

1. Aqyawfmaf, **Miqyaer-anr siqnya** larni.

"*Nawmaf-anr zaqsiq tsawrganr hawr-eu panmaeq-eu Saflar bifnaeq-awr aqyawf-anr siqnya-eu tsawrganr anrlarni, ngar guiqlanq sharluf-eu ma.*" (1:17b). Miqyaer-anr siqnya-eu-aq, kharngeur-eu jeq-anr siqnya-eu garnae gordzaeq dzaeq-eu siqnya-eu tsawrganr mae. Miqyaer-anr maqsiqnya-eu tsawrhaq-aq, tiqjeq-anr-iq yawmuiq-aer maqghovshaw nya-a. Miqyaer-anr maqsiq nya-eu mirnae, Miqyaer maqjawr-a laer aer-awr jawflafni daef-eu mae (Jc.14:1; Lm.1:18-23). Miqyar-anr siqnya-eu aqjox-aer muiq-eu lalaer aernar-aq; *Tif*, siqnya baebaengae '*mrshawr*' naeqlaf-awr (Yh.17:3), *Nyif*, siqnya dzaeqlarngae '*lavshawr*' naeqlaf-eu uqtaf (Plp.3:10), *Smr*, tiqbyan'ni siqnya larngae tiqjawr '*shawrjir*' lar-eu mae (1Glt.13:9-12). Miqyaer, aqdui-anr baengae, aqyawf-euq '*shaevdzeuf-anr*' durni, baenaq laf-eu mirnae (Adb.1:26), aqdui, Miqyaer-anr ngaeeq-aer siqnya larngae, aqdui, *yawqhar yawqha* yawmuiq-aer siqnya lar-eu mae.

2. Miqyaer, **aqdui-anr kur-awr noeqtmq-eu jeq javmae** laer siqduqni. "*Miqyaer, nawmaf-anr kur-euq khoer, noeqtmq-eu jeq aqjox-aer jav-awr,*" (1:18a). Kalizaq armur-aq, Miqyaer nae '**kuruiq laf-eu**' tsawrhaq mae.

Guiqlang yawdzanr baqda'nae, kur-eu yawshawr nae kur-awr (Glt.1:15; 2Tms.1:9), *yawzanr-anr nae* kur-dov-awr yawshaef-anr kuranr-euq uqtaf (1Btl. 2:9), yawshaef *khanqsaer za'ni* kurnaeq laf-eu mae (1Btl.5:10). Miqyaer nae kur-euq *lafkhoer noeqtmq-eu jeq* jav-eu mae (Eps.4:4). Kalizaq noeqtmq-eu-aq, pyeuflar maelaer signya-eu lafkhoer yawduq baw-awr dawqpaq-aer ghae-eu *dawqmanr tsanr-eu jeq-anr aermawf-eu mae*. Kalizaq, Yeqsur *Kali zafka legar noeqtmq-awr dawqluf-eu ma* (1Tsln.4:13-18; 1Yh.3:1-3). Arhu aqdui noeqtmq-eu jeq *maqjav-a* (Eps.2:12). Aerkhawf, Kali-euq lafkhoer aqdui '***noeqtmqkhar zalar-euq***' ma (1Btl.1:3). Noeqtmq-eu jeq ghaq bif-eu mae; *Yawshawr shawr-aer daefni* (1Yh. 2:28-3:3), Miqyaer-euq *dawq narhaq geufni* (Hby. 13:17), hawr-eu *sarjax zifni* (Lk.12:42-48).

3. Aqdui, Miqyaer-euq muiq-awr ***sanr-eu*** jeqbir malaer signya larni. "...*tsawrshawr deug-euq lafkhoer jeqbir-euq yawshaef khanqsaer arnavni sanr-eu ngalae, nawmaf-euq ghovshaw nya-eu myavnuiv panlarni khawf, ngar guiqlang sharluf-eu ma*" (1:18b). Jeqbir heu-aq, aqdui, Miqyaer-anr nae za-eu gar aer-eu maqngeur-a. Miqyaer, aqdui Kalizaq-anr nae za-eu gar aermawf-eu mae. Sanqpaq Yeqsur zafka lengae, aqdui-aq "*aqyawf-euq guiqlang yawdzanr-euq yawshaef khanqsaer-anr bijaceuq-eu*" gharduq mae (Eps.1:6). Miqyaer, aqdui-anr hawngae, dzeurlaf-euq gar hawr-eu nymq-mr jawrluf-eu tiv-anr maqhawni, aqkar pyeuf-eu tiv-anr nae haw-eu mae. Miqyaer, Girdoq guvsaeftaq-awr duqkhanq-anr caer nawqnawq-aer jawrgar "*Ghaq khav-awr guirmr nyazaq-or, Sanqpaq Miqyaer nawqnaeq-aer jawrluf mae*" laer aernaq-euq mae (Ykhd.6:12). Yeqsur, povpov lavlav-aer ghae-eu Aqdaeqlaeq-euq aqnyir-anr aernaq-eu, "*Nawr-aq, Yornav-euq aqli Sirmoq nga. Aqkar nar-aq, nawq-anr Geqpar (khaqlo) laer yakur taef-a*" (Yh.1:42). Arnan, Girdoq guirmr zawrnaya-eu tiqghaq pyeuflar-awr, Sirmoq khawf, Beqtuvlulv—khaqlo yawzif pyeuflar-euq mae. Kali, aqdui-anr Miqyaer-euq maeqshi bijawr mawf-eu mae (Yh.17:24).

Khoerngae nan-anr, Yeqsur, Kalizaq-euq baqda'nae yawshaef khanqsaer za-eu mae (1Tsln.1:10). Aqdui khawf, aqyawf naeq-aer yawshaef khanqsaer za-eu mae (Gls.3:4).

4. Aqdui, Miqyaer-euq **baog-anr** siqnya larni. (1:19-23).

a. **Huiqdui** dui-eu jeq mr-eu baoq mae.

“Aqyawf-euq baog huiq-eu lafkhoer gar mrgar ghoe-awr, jan-eu tsawrhaq pyeuf-eu aqdui-euq khoertav, aqyawf-euq baog arnavni huiq-awr myaq-eu ngalaer, nawmaf siqnya larni khawf, ngar guiqlanq sharluf-eu ma” (19). Aqdui, Miqyaer-euq jeqbir pyeuf-eu mirnae, Miqyaer, aqdui-anr **gaq-eu** maelaer bisiq naeqlaf-awr; aqkar, aqdui aqjeq aqjox-aer yapyef-eu lalaer siqnya ngae, **noeqtmq-eu** jeq bifnaeq laf-eu uqtaf; **jan-eu** kuirtof biciqdov ghaeni gharduq, Miqyaer-euq huiq-awr myaq-eu **baog** aqdui, Kalizaq-anr bifnaeq laf-euq mae. Khoermirnae, aqdui nuima keuv-awr mrmawf-eu khawf, shiqshaq ghaq baq-eu mirnae, maqmr nya-eu jeqkhawf, mrnya lar-eu mae (Mt.26:41). Aqdui taef-aer maqdeuvghaq nya-eu naef sanqpaq-anr khawf, Miqyaer nae bifnaeq laf-euq **baog-anr** ghoe-awr nae, aqdui deuvghaq nya-eu mae (Eps. 1:21; 6:11-12). **Nawr, Sanqpaq Yeqsur-euq lafkhoer baog armyavni jav-eu lelaer siqnya malaq?**

b. Kali-anr **bighof daeflar-awr**

Miqyaer-euq **armarpaw binuir-euq** baoq mae. *“Aqyawf-euq baog khoer Kali-euq lafkhoer gar mringae, aqyawf-anr shir-euq garnae bighof daeflar-awr, mq khoertav, Miqyaer, Kali-anr aqyawf-euq armarpaw binuir-euq mae”* (20). Yaerbof yawoer lafkhoer Miqyaer-euq baoq laer aernar-aq, Miqyaer mqbae mirbae bae-eu gar (Adb.1; Isy. 40:12-27), hawr-eu Irsaqlaqlav tsawrhaq, Irjirtuv mirkhanq-anr nae sheuqdov laf-euq gar toeqmaeq-eu mae (Ylm.16:14). Aerkhawf, Yaerbof yawshuif-euq lafkhoer-aq, Yeqsur Kali kamrshir-awr ghofdaef lar-euq nar-aq, mq khoertav ghovdav ler-awr, Miqyaer-euq armarpaw nuirler-euq gar ghoe-awr Miqyaer-euq **baog-anr** toeqmaeq-eu mae.

c. Kali **dawqtawv luf-euq khoertav huiq-**

eu baoq mae. “*Kali-aq, uvlanr-eu deuq, aryaq deuq, baoqdeuq, sanqpaqdeuq hawr-eu tsawrmyanr kharmyanr taq-euq dawqtawvluf khoertav huiq-eu ghaq pyeuf-awr, heuzir-anr taef-aer maqngeur-eu, aqkar karzir-anr khawf, huiq-eu ghaq pyeuf-eu mae” (21). Yeqsur Kali-aq, Kakhof-eu ghaq pyeuf-eu taef-aer maqngeur-eu, baoq & aryaq jav-awr dzoeqdzaq za-awr uvlanr-eu & sanqpaq yawgor yaw’aw dawqtawvluf-eu khoer ‘huiqdzaeq-awr gordzaeq-eu ghaq’ pyeuf-eu mae. Mq & mir-euq aryaq dawqtawvluf, aqyawf-euq mae, qqyawf, aqdui naeq-aer jawr-eu mae (Mt.28:18, 20).*

d. Yawqjeq navluf **Kali aqkuir uqmov** **bijawr-euq** baoq mae. “*Miqaer nae yawqjeq navluf Kali-euq aqkuir uqmov bijawr bijav-awr” (22a). Yeqsur ghaqler mae! Yawqjeq navluf-anr ghaqler jir-euq mae. Naef sanqpaq, Aqdaq-anr nae shuirgeuf-euq khawf (Adb.1:28), Yeqsur nae parza khof-euq mae. Teumirnae, Yeqsur Kali-anr uqduq tang-eu geuxmae.*

e. Kalizaq armur-euq **uqduq bigeuf-euq** baoq mae. “*Kalizaq armur-anr khartaf-eu yawqjeq navluf khoertav, aqyawf-anr uqduq bipyeuf-euq mae. Kalizaq armur-aq, Kali tiqbyan’ni byan-eu Kali-euq mawrdo mae. Aqyawf-aq, yawqjeq navluf-anr bibyanlar-eu mae” (22b-23). Yeqsur-aq, Kalizaq armur-euq uqduq pyeuf-awr, Kalizaq-aq, Yeqsur-euq mawrdo pyeuf-eu mirnae, Yeqsur, aqdui Kalizaq-anr ghoe-awr, aqyawf-euq gar mrluf-eu mae. Kalizaq armur baqda’nae, Yeqsur Kali byanlar-awr; Yeqsur Kali baqda’nae, Kalizaq armur byanlar-eu mae.*

III. Arsaq Sag-eu Dawq

Kaliqzaq ghaq khav-eu lafkhoer daefnya’ni, *Miqaer-anr* yasiq nya-awr, aqyawf aqdui-anr *kur-awr noeqtmq-eu* jeq jav-eu hawr-eu *Miqaer sanr-awr* baoq huiq-eu maelaer khawf, yasiq nya-eu mae.

Dzawdeuv 3: Kakhof-eu Guiqlanq Yawdzanr

I. Ardang Bae-eu Dawq

Aqdui, Miqyaer-euq zaq pyeuflar-euq naeq-aer jeqbir of-eu taef-aer maqngneur-eu, muiq-eu jawrduq gor-eu nuirmanq khawf za-euq ma. Iqbax-euq lmqbymr-anr nae dovlar-awr, yawshaef khangsaer huiq-eu Miqyaer-euq nuirmanq-euq maeqshi daefluf-eu ma. Heu-aq, Kalizaq yawqghaq navluf-euq sarkir kamq-eu jeq pyeuf-eu mae; Kalizaq maggeuf larngae aqjox-aer daef-euq le? Kalizaq aqjox-aer geuflar-euq le? Kalizaq geuflar-euq nar-aq, aqjox-aer muiq-eu la?

II. Guiqlang Yawdzanr Baqda'nae Kakhof-eu jeq Za-euq (2:1-10)

A. Kali-anr Masiq nya'ngae, Iqbax-euq Zaqxhav geuf-euq (2:1-3)

1. Banq-eu muv-eu & *iqbax lafkhoer shir-euq* mae. “*Dzeurlafngae, nawmaf yawbanq yawlaeq hawr-eu iqbax lafkhoer shir-euq khawf, aqyawf, nawmaf-anr bighof daeflar-euq mae*” (2:1). Shir-euq laer aer-eu-aq, mawrdo shir-euq (Yk.2:26), taef-aer maqngneur-eu Miqyaer-anr nae ‘ghawq-euq’ gar aermawf-eu mae (Isy.59:2). Tsawrhaqzaq yawqghaq navluf ‘iqbax’ mr-euq mae (Lm.3:23; Eps.2:1). Iqbax mr-euq mirnae za-eu arpoeq-aq ‘yashir-eu’ mae (Lm.6:23). Iqbax-euq lafkhoer shirtaq-euq heu-aq, saflarpaw maqdaef-aer Miqyaer nuima tsaq-eu jeq maqmr nya-eu gar aermawf-eu mae. Shir-euq tsawrhaq jawqlaw jawrlawr aqjeq keuvle khawf, tiqjeq-iq maqsiqler-eu lof-aer, saflarpaw shir-euq tsawrhaq khawf, saflarpaw aqjeq pyeufluf-eu laer maqsiqnya-a. Iqbaxzaq-aq, nargawr bawluf-eu taef maqngneur-a, shir-euq tsawrhaq mae. Shir-euq yawbuf arnavni buf-ir-euq laer beugar-eu taefmae. Teumirnae, mirtsaq tanqkhawr-aq, tsawrhaq shirtaq-eu lmqbymr bymrma-anr dur-eu mae. “*Daefluf khawf, shir-euq gar dur-eu mae*” (1Tms.5:6). *Nawr, yawdaef malaq? Mangeur*

nar-aq yawshir lelaq?

2. **Mirtsaq**-euq nuinoeq & **naef** sanqpaq-euq maeqnan cantae-euq mae “*Khoerngae, nawmaf-aq, mq-anr aryaq jav-awr uvlanr-eu ghaq-euq maeqnan & mirtsaq heu-anr taf-eu canjeq cankawv lafkhoer daef-euq mae. Nymq-mr, uvlanr-eu heughaq-aq, maqnarhaq geuf-eu tsawrhaq lafkhoer gar mrluf-eu mae*” (2:2). Miqyaer-euq dawq ‘*maqnarhaq geuf-eu*’ mirnae, tsawrhaqzaq, Miqyaer-anr nae ‘*ghawq-ir-awr*’ saflarpaw shir-euq mae. Miqyaer nae ‘*dzaqnar-aq yashir taef-a*’ laer aer-euq gar (Adb.2:17), tsawrhaqzaq maqnarhaq geuf-aer, naef sanqpaq nae ‘*dzaqkhawf, maqshir-ar, Miqyaer lof-aer durlar taef-a*’ laer shuirgar tawvler-awr (Adb.3:4), saflarpaw shir-awr shiqshaq pawkhawf, shirdanq baelar-euq mae. Khoertaf nar-aq, tsawrhaqzaq, Miqyaer-euq dawq ‘*maqnarhaq geuf-eu*’ lafkhoer daefluf-eu mae. Miqyaer-euq dawq maqbi narhaq geufni, ghaq bif-eu 3 jeq jav-eu mae: **Mirtsaq**-euq nuinoeq, **Naef** sanqpaq (uvlanr-eu ghaq) hawr-eu yawqha-euq **Shiqshaq**. Tif, **Mirtsaq**-euq nuinoeq-aq, cantae paq-aer nyaefsufilar nya-eu mae (Lm.12:2). Yeqsur Kali & Kalizaq-aq, ‘*mirtsaq-euq maqngeur-a*’ (Yh.8:23; 17:14). Nyif, **Naef** sanqpaq (uvlanr-eu ghaq), jaqmyawf-euq aqda pyeuf-awr (Yh.8:44), mirtsaq-euq nuinoeq zmq-awr (Yh.12:31), “*maqnarhaq geuf-eu tsawrhaq lafkhoer gar mrluf-eu mae*” (Eps.2:2; 5:6). Smr, yawqha-euq **Shiqshaq**, heu-aq mawrdo-anr aermawf-eu maqngeur-a. Daefle ngaengae anr-eu Miqyaer-euq dawq maqbi narhaqgeufni, khav-eu tsawrhaq-euq iqbx aryoeq-anr aermawf-eu mae (Jc.51:5; 58:3).

3. Shiqshaq & nuinoeq **nuilov** kharmawf-eu lof-aer daef-awr, Miqyaer **yarkhaq dargar geux-eu** tsawrhaq pyeuf-eu mae. “*Khoerngae, aqdui khawf, aqyawf maf-euq lafkhoer keuq-awr, shiqshaq-euq nuikhanr tiqshir mr-awr, nuinoeq hawr-eu shiqshaq kharlov lar-eu jeq mr-euq ma. Aqdui khawf, aqcawq kharpyeuf-eu jeq pyeuf-awr, nuima paer-eu jeq-euq zaq pyeuf-euq ma*” (2:3). Iqbaxzaq aqjeq mirnae iqbx mr-eu

lalaer aernar-aq, iqbx aryoeq anr-awr, iqbx mr-eu laer lovler-eu mirnae iqbx mr-eu mae. Tsawrhazqazq tiqghaq tirghaq muiqni janrnja-awr (Lk.6:33; Ghkh.28:1-2), zaq-anr muiqnaeq nya-eu mae (Lk.11:13). Aerkhawf, Miqyaer nuima tsaqni maqjanr nya-a (Hby.11:6). Tsawrhazqazq-aq, Miqyaer "nuima paer-eu jeq-euq zaq" pyeuf-awr, Miqyaer nae yarkhaq dargar yadaq-eu mae (Yh.3:18).

B. Guiqlanq Yawdzanr Baqda'nae Kakhof-eu jeq Za-euq (2:4-9)

1. Miqyaer, aqdui-anr **gaqnaeq** laf-euq mae. "*Aerkhawf, ghawqshaq gaq-eu jeq sanr-eu Miqyaer-aq, aqyawf-euq huiqdui dui-eu gaq-eu jeqnae, aqdui-anr gaqnaeq laf-awr...*" (2:4). Miqyaer-aq gaq-eu jeq pyeuf-awr, gaq-eu jeq-aq, Miqyaer-euq shaevdzeuf pyeuf-eu mae (1Yh.4:8). Miqyaer gaq-eu jeq pyeuf-eu khoer, aqdui-anr aqjox-aer panmaeq naeqlaf-euq ngalaer aernar-aq, Miqyaer-aq, '*ghawqshaq gaq-eu jeq*' sanr-awr (Eps.2:4), '*guiqlanq yawdzanr*' khawf sanr-eu (Eps.2:7), Miqyaer ngar-a laer panmaeq naeqlaf-euq mae. Heu nyiqjeq aqjox-aer beugar lalaer aernar-aq, '*ghawqshaq gaq-eu jeq-aq, geux-eu lof-aer maqjanr naeq-eu*' shiqbuir lanma-anr ir-eu geux-eu khawf maqbi ir-eu gar aermawf-eu mae. '*Guiqlanq yawdzanr-aq, maqgeux-eu gar za-euq*' mqtav mirkhanq-anr jawrler-eu maqgeux-eu khawf, bijawrler naeqlaf-eu gar aermawf-eu mae. Miqyaer, iqbx-anr byae-awr iqbxazq-anr gaq-eu, lafyaq-anr bimawr naeqlaf-euq mae (Lm.5:8; Yh.3:16).

2. Miqyaer, aqdui-anr Kali naeq-aer **bighof daeflar** naeqlaf-euq mae. "*...aqdui yawbanq yawlaeq lafkhoer shirdzeur-euq khawf, aqyawf, aqdui-anr Kali naeq-aer yawdaef bidaef larnaeq laf-euq mae. Guiqlanq yawdzanr baqda'nae, nawmaf kakhof-eu jeq za-euq mae*" (2:5). Yeqsur Kali, shir-euq tsawrhazq 3 ghaq-anr bighof daeflar-euq mae; Miqcoeq miqma-euq zaqyo (Lk.7:11-17),

Yaqirluv-euq zaqmiq (Lk.8:49-56), hawr-eu Laqzaqlur (Yh.11:41-46). Heu smrghaq-anr luf dawq ngaeqnaeq-awr shir-euq garnae bighof daeflar-euq mae. Kali-euq dawq-aq, shir-euq garnae bighof daeflar-eu baog anr-eu mae (Yh. 5:24). Kalizaq saflarpaw ghofdaef lar-euq-aq, shiq shaqjirpaw ghofdaef lar-eu navmaqtser huiqdzaeq-eu mae. Aqjeq mirnae aernar-aq, aqdui, Miqyaer-euq baog baqda'nae Kali naeq-aer ghofdaef lar-awr aqyawf naeq-aer gawf-awr taf-eu tsawrhaq pyeufklar-euq ma (Eps.1:19-23).

3.Miqyaer, aqdui-anr Kali naeq-aer **mq khoertav binuir naeqlaf**-euq mae. “*Miqyaer, aqdui-anr Kali naeq-aer tiqkawv lof-aer bighof daeflar-awr, Yeqsur Kali lafkhoer, mq khoertav aqyawf naeq-aer tiqkawv lof-aer binuirnaeq laf-euq mae*” (2:6). Yeqsur Kali ghofdaef lar-euq mawrdo-aq, maqbuf-ir-eu yawshaef khangsaer byan-eu mawrdo mae, aqdui khawf, aqyawf naeq-aer ghofdaef lar-euq mirnae, aryoeq yawshuif za-awr, aqcawq-anr maqdur-eu daefzir, nuinoeq, daefjeq daefkawv yawshuif za-euq ma (Gls.3:1-2). Miqyaer, aqdui-anr bighof daeflar-awr, lmqbymr-anr byaertaq-awr bijawr naeqlaf-euq maqngeur-a. Mqtav mirkhanq-anr **Kali naeq-aer** binuir naeqlaf-euq mae. Aqdui guiqlanq saflarpaw **nuirmanq hawr-eu aryaq** jav-eu tsawrhaq pyeufklar-euq ma.

4.Aqdui **jan-eu** lafkhoer **guiqlanq yawdzanr** baqda'nae **kakhof-eu jeq** za-euq ma. ⁷“*Yeqsur Kali lafkhoer, aqyawf, aqdui-anr ghawqshaq gaqnaeq laf-awr, aqyawf-euq guiqlanq yawdzanr arnavni sanrngga laer, aqkar keuvle-eu zir-anr bisiq bimawr laf-eu laer, Miqyaer khoerlof-aer janrnaeq laf-euq mae.* ⁸*Nawmaf jan-eu lafkhoer, guiqlanq yawdzanr baqda'nae kakhof-eu jeq za-euq mae. Yawqha-euq baqda'nae maqngeur-aer, Miqyaer nae bifnaeq-euq lafsawq pyeuf-eu mae.* ⁹*Mr-awr shar-euq baqda'nae za-euq maqngeur-eu mirnae, tsawrhaq tiqghaq-iq khangsaer jaevkhar maqza-a*” (2:7-9).

a.Miqyaer, aqdui-anr ghawqshaq gaq-awr kharmr-euq jeq aqjeq ghae-eu mr-euq ngalaer aernar-aq, aqkar karzir *“aqyawf-euq **guiqlanq yawdzanr arnavni sanr-eu** ngalaer”* bimawr-eu gharduq mr-euq mae (7).

b.Kakhof-eu jeq-aq, maqmrza nya-a, Miqyaer nae yawqngaef-aer bifnaeq laf-euq lafsawq mae. Teumirnae tiqghaq-iq nuima huikhar maqza-a (8-9). Kakhof-eu gar-aq, Yeqsur Kali nae mrluiv jir-euq mirnae (Yh.17:1-4; 19:30), kakhof-eu jeq za'ni tiqghaq-iq, tiqjeq-iq maqjanr nya-a. Aqdui tiqjeq-iq maqdawvlanq nya-a (Hby.10:1-14). Yeqsur kamrshir ngae, uqduq tanqnymr nymrma-euq saqpar nyiqpav-aer pyaq-ir-euq khoer-aq, Kali nae lawrdanjir **mrluiv jir-awr**, jan nar-aq, aqsurghaq khawf, Miqyaer jawrgar le'urnya maelaer aermawf-eu mae. Heu-aq, maqgeux gar za-euq **guiqlanq-guiqlanq yawdzanr** mae.

C.Kakhof-eu jeq Za-euq mirnae Yawmuiq jeq Mr-eu. *“Aqdui-aq, Miqyaer-euq **lafzar** ma. Yawbae ngaenae aqdui-anr bimr-eu laer, laeqhmq taq-euq **yawmuiq jeq-anr mrmr-aer daefni**, Yeqsur Kali lafkhoer aqdui-anr baenaeq laf-euq mae”* (2:10).

1.Miqyaer, aqdui-anr bae-awr (Adb.1:26), naef sanqpaq & iqbax-euq zaqkhav pyeuf-luf garnae, bibuq-ir-awr tsawrshuif bipyeuflar naeq-laf-euq mae (2Glt.5:17). Khoernar-aq, aqdui-anr, Kali-euq shaevdzeuf biza mawf-awr (Lm. 8:28), aqdui, Miqyaer nuima tsaq-eu jeq **'mrmawfni & mrnya larni'** aqdui-euq lafkhoer gar mrluf-eu mae (Plp.2:13).

2.Aqdui, Kalizaq yawmuiqjeq mr-eu-aq; Miqyaer-anr **lawrnaeq-eu** jeq pyeuf-eu mirnae (Hby.13:16), aqcawq, Miqyaer-anr **jaceuqni** (Mt. 5:16; 1Btl.2:12), **nuima keuv-awr** ya'mr-eu mae (Tt.2:14).

III. Arsaq Saq-eu Dawq

Kalizaq-aq, kakhof-eu jeg za'ni, yawmuiq jeg mr-eu maqngeur-eu; **kakhof-eu jeg za-euq mirnae, yawmuiqjeg mrmr-aer yadaef-eu** mae. Nawr kakhof-eu jeg za-euq yawduq bawma laq? Nawr kakhof-eu jeg zaghaq-euq ngeurnar-aq, yawmuiqjeg mrmr-aer daefluf malaq?

Dzawdeuv 4: Lafyaq Baqda'nae Gawfler-euq

I. Ardanq Bae-eu Dawq

Mirtsaq khoertav ghawqmyaghaq-euq '*tsaqler dzoerler-eu*' shiq-euq dawqma sarjax dzagtaq-euq mae. Aerkhawf, tiqhmq-iq Kali-euq shiq-euq dawqma sarjax lof-aer maqmuiqkeuv maqzif keuv-a.

II. Lafyaq Baqda'nae Gawfler-euq mae (2:11-22)

A. Kali-anr "Masiq nya-eu" Aqcawq-euq Tsawrjeuq (2:11-12)

1. Dawqma sarjax yawoer aertaq-euq lof-aer nar-aq, aqcawq-euq tsawrjeuq tsawrca-aq, '***bawkhov maeqdzaq maqyaeq-euq***' tsawrhaq pyeuf-eu mirnae, Irsagleqlav tsawrhaq za-eu guiqlanq deuq-anr maqza nya-a. "*Khoermirnae, nawmaf taqngaer de-eq. Dzeurlafngae, nawmaf-aq, shiqshaqpaw aqcawq tsawrjeuq tsawrca pyeuf-awr, bawkhov maeqdzaq maqyaeq-euq tsawrhaq laer bikur-euq mae. Bawkhov maeqdzaq yaeq-eu khoer-aq, aqlaf nae shiqshaqpaw yaeq-eu taefmae*" (Eps.2:11). Miqyaer, Aqbyaqhaq-anr tserdov ngaenae, aqyawf nae tserdov-euq tsawrhaq, aqcawq-anr nae bibeugar-awr, Miqyaer-euq tsawrhaq laer bisiqlar-eu gharduq '*bawkhov maeqdzaq biyaeq-euq mae.*' Teumirnae, bawkhov maeqdzaq maqyaeq-euq aqcawq tsawrjeuq-aq, Miqyaer-anr maqtaf-aer guiqlanq maqza nya-eu tsawrhaq laer aermawf-eu mae. Aerkhawf, shiq shaqjirpaw bawkhov maeqdzaq yaeq-eu khawf, aqdir jan-eu laer maqaer nya-a (Lm.2:25-29; Glt.5:6; 6:15). Aerkhawf, *Yeqsur-anr jan-awr* hageuf-euq tsawrhaq-aq '*safllarpaw*' bawkhov maeqdzaq yaeq-euq mae (Gls.2:11).

2. ***Kali-anr maqsiq nya-eu*** tsawrhaq-aq,

noeqtmqkhar maqza-a. “*Khoerngae, nawmaf, Kali-anr maqsiq nya-aer, Irsaqlaqlav tsawrhaq-anr maqtaf-eu tsawrhaq pyeuf-euq uqtaf, dawqma sarjax-anr maqsiq maqsux-eu tsawrhaq pyeuf-euq mirnae, nawmaf noeqtmq khar maqza-aer, mirtsaq khoertav Miqyaer-anr maqsiq nya 'ni daef-euq mae” (Eps.2:12). Kalizaq maqngeur-eu deug heu 5 ‘**maq**’ lafkhoer daefluf-eu mae. *Tif*, Kali-anr **maqsiq** nya-aer, kharngeur-eu jeq-anr uqduq tanqluf-eu mae. *Nyif*, Irsaqlaqlav tsawrhaq-anr **maqtaf**-aer, jeqbir maqza nya-a. *Smr*, Miqyaer sarjax-anr **maqsiq** nya-aer, guiqlanq maqhageuf nya-a. *Oeq*, Noeqtmq khar **maqza**-aer, heuzir aqjeq ghae-eu daef-awr, aqkar karzir gharduq tiqjeq-iq yawduq maqbaw-a (1Tsln.4:13-18). *Ngaq*, Miqyaer-anr **maqsiq** nya-aer, miqyaer jaqmyawf-anr cantae luf-eu mae (Ghkh.17:16-23; 1Glt.8:5). Miqyaer heulof-aer bipyeuf mawf-eu mirnae maqngeur-eu tsawrhaqzaq tser-euq mae (Lm.1:18-23).*

B.Lafyaq "Baqda'nae" Tsaqler dzoerler-euq (2:13-18)

Iqbax nae lavghawq-awr maqbisaq maqbi dzoerlerni kavpyawr tawpav taq-euq gar Yeqsur Kali-euq lafyaq nae bitsaq bidzoer ler-awr bigawfler laf-euq mae; Tiqjeuq tirjeuq yawkaq (Eps.2:13-15), iqbaxzaq hawr-eu Miqyaer (Eps.2:16-18).

1.Lafyaq "baqda'nae" tiqjeuq tirjeuq tsaqler dzoerler-euq (13-15).

a.Aqdui, Kali-euq shiq baqda'nae, aqcawq-euq tsawrjeuq pyeuf-eu khawf, nymq-mr, **Miqyaer-euq dawqpae** jawrlar-euq mae. “*Dzeurlafngae, nawmaf garmanr kaqgar jawr-euq khawf, nymq-mr-aq, Yeqsur Kali lafkhoer, Kali-euq shiq-anr ghoe-awr nae dawqpae sheuqpae laf-euq mae” (2:13). Miqyaer, aqyawf nae noeqtaq-euq jeq mrbyan-eu; aqyawf-euq dawqpae bijawr-awr, Dawqma sarjax bif-eu uqtaf, Kakhof-eu ghaq bif-eu laer Aqbyaqhaq-anr ghoe-awr Irsaqlaqlav tsawrjeuq-anr, tserdov-euq mae. Kakhof-eu ghaq-Yeqsur-anr khanrjan-eu tsawrhaq, Miqyaer-euq dawqpae jawrlar-euq mae. Aqjeq mirnae aernar-aq Kali-aq, ‘*mirtsaqzaq-euq iqbax pidzae-eu Miqyaer-euq yawrzaq*’ mae (Yh.1:29).*

b.Yeqsur nae tiqjeuq tirjeuq yawkaq tawpav

taq-euq **kavpyawr** lof-aer dur-eu **muir-eu jeq-anr pyavdze**-euq mae. "Aqjeq mirnae aernar-aq, Kali, aqyawf-aq, aqdui-euq tsaqler dzoerler-eu jeq pyeuf-awr, aqdui, tsawrjeuq nyiqjeuq pyeuf-euq khawf, tiqjeuq taef-aer bipyeuf lar-awr, yawkaq-anr tawpav taq-euq karpyawr-anr pyavdze-euq mae" (2:14). Aqbyaqhaq-euq zir-anr nae Irsaqlleqlav tsawrhaq-euq zanr, dzaqdzaq & dmghaq dmlmrdeuq aqcawq-anr maqdur-a. Aerkhawf, Beqtuvlulv-anr nae bae-awr aqcawq tsawrjeuq khawf, kakhof-eu jeq za'ni Kali-anr jan'nar-aq, Irsaqlleqlav tsawrhaq naeq-aer gawflar-euq mae. Aqcawq tsawrjeuq Kalizaq geuflarni, Yurdav-euq zanr maeqhu yatawq lar-eu lalaq? Maqngeur-a (Ghkh.10, 15; Glt.3:28).

c.Yeqsur kamrshir ngae, tsawrjeuq yawkaq lavpav-eu zanrdawq khofdawq-euq **zanrtaq khoftaq pidzae-euq** mae. "Aqyawf-euq lafkhoer, tsawrhaq nyiqghaq pyeuf-eu khawf, tsawrshuif tiqghaq taef-aer bipyeuf lar-awr, bitsaq bidzoer ler-eu laer, zanrdawq khofdawq-euq zanr lafkhoer boftaq-euq zanrtaq koftaq-anr taf-eu, tiqghaq tirghaq muir-eu jeq-anr, aqyawf-euq shiqshaq nae lavbyov-euq mae" (2:15). Yurdav-euq zanr 'yawshawr & maqshawr-eu' ghawqmya'ni jav-awr, aqcawq tsawrjeuq-aq, maqshawr-eu tsawrhaq pyeuf-eu mae. Aerkhawf, Kali-anr jan-euq naeq-aer aqdui tsawrhaq yawshuif pyeuf lar-euq ma (2Glt. 5:17; 1Btl.2:5).

2. **Lafyaq "baqda'nae" iqbaxzaq, Miqyaer-anr tsaqler dzoerler-euq** (Eps.2:16-18). Nymq-mr-aq, aqcawq-euq tsawrjeuq khawf, Yurdav tsawrhaq naeq-aer "Mawrdo Tiqdo" taef-aer pyeuf-awr, tiqkawv lof-aer Miqyaer naeq-aer tsaqler dzoerler-eu garma danrlar-euq mae.

a.Lafyaq baqda'nae tsawrjeuq yawkaq tsaqler dzoerler-euq taef-aer maqngeurni, **Miqyaer-anr khawf tsaqler** dzoerlernya lar-euq mae. "Kali, lafyaq-anr ghoe-awr, tsawrjeuq nyiqjeuqluf Miqyaer naeq-aer bitsaq bidzoer ler-euq lafkhoer, mawrdo tiqdo taef-aer bipyeuf larni, tiqjeuq tirjeuq muir-eu jeq-anr lavbyov-euq mae" (2:16). Kalizaq

armur lafkhoer, khoerjeuq heujeuq maqngneur-eu, Miqyaer-anr tsaq-awr dzoer-eu tsawrjeuq yawshuif pyeuflar-euq ma 1Btl.2:9). Dzeurlafngae, Miqyaer-anr puig-awr muir-eu lafkhoer guirdeuv deuv-euq khawf, Kali-euq lafyaq baqda'nae, Miqyaer naeq-aer tsaqler dzoerler-euq ma.

b.Yeqsur, dawqpae & garmanr jawr-eu tsawrhaq-anr, **tiqghaq tirghaq & Miqyaer-anr tsaqler** dzoerlerni guiqlanqdawq maegle-euq mae. "*Kali oe-awr, garmanr kaqgar jawr-eu nawmaf-anr hawr-eu dawqpae jawr-eu deuq-anr khawf, tsaqler dzoerler-eu jeq dawqmaeq maegle-euq mae*" (2:17). Kali-euq guiqlanqdawq-aq, Yurdav tsawrhaq-euq gharduq taef-aer maqngneur-eu yawqjeuq yawqca navluf-euq gharduq mae (Mt. 28:19). Heuq-aq, Aqbyaqhaq-euq zir-anr nae laeqhmq taq-euq guiqlanqdawq mae (Adb.12:1-3).

c.Yawqghaq navluf-euq gharduq, **Yawshawr Saflar lafkhoer** Aqda Miqyaer jawrgar le-eu garma danrlar-euq mae. "*Aqjeq mirnae aernar-aq, Kali baqda'nae aqdui tsawrjeuq nyiqjeuqluf, muiq-eu Saflar aqyawf tiqghaq-anr ghoe-awr, Aqda jawrgar urlernya lar-euq ma*" (2:18). Aqda Miqyaer-euq bawqtov, Yeqsur Kali nae mrbyan-eu heu ghovshaw-awr jan-eu lafkhoer hageufni, maeqnaeq laf-eu ghaq-aq Yawshawr Saflar mae (Yh.16:14).

C.Kali-euq "Lafkhoer Jawr-eu" Aqcawq-euq Tsawrjeuq (2:19-22)

Kali baqda'nae Yawshawr Saflar-euq baoq lafkhoer, Yurdav tsawrhaq & mirkhanq-euq tsawrjeuq tsawrca dawqtawvluf; Miqyaer-euq **mirkhanq-euq zaq** pyeuflar-awr, Miqyaer-euq **nymrkhanq-euq zaq** pyeuf lar-euq uqtaf, Miqyaer-euq uqduq tanqnymr **nymrma tiqnymr** taef-aer pyeuflar-euq mae. Lafyaq nae, tsawrjeuq tsawrca garmanr kaq-awr, maqtaf-eu maqpae-eu maqdzoer-eu jeq lavbyov jir-euq mae.

1.Nymq-mr "Tsawrshawrdeuq naeq-aer **Miqyaer**

mirkhang-euq zaq" pyeuflar-euq mae. "*Khoermirnae, nawmaf-aq, yawqkhang yawqmir yawq-euq tsawrhaq... maqpar ngeurmae. Tsawrshawrdeuq naeq-aer mirkhang tiqkhang-euq tsawrhaq... pyeuflar-euq mae" (2:19). Irsaqlaqlav tsawrhaq-aq, Miqyaer nae tserdov-euq tsawrhaq mae. Aerkhawf, aqyawfmaf, kakhof-eu ghaq-anr maqha geuf-euq mirnae, Yeqsur, Yurdav tsawrhaq-anr aernaeg-eu, "*Miqyaer uvlanr-eu jeq nawmaf-euq lafkhoer nae yurdov-awr, Miqyaer uvlanr jeq-euq arsiq sigle-eu tsawrjeuq tsawrca-anr bifnaeq taef-a*" (Mt.21:43). Arsiq sigle-eu tsawrjeuq tsawrca heu-aq, Kalizaq armur mae. "*Aerkhawf, nawmaf-aq, Miqyaer nae tserdov taq-euq heuzir-euq tsawrhaq pyeuf-awr, sanqpaq hawr-eu pirma pyeuf-eu uqtaf, shawr-eu tsawrjeuq tsawrca pyeuf-awr, aqdir Miqyaer-euq tsawrhaq pyeuf-eu mae..." (1Btl.2:9). Yaerbof yawoer-euq lafkhoer, mirtsaq-euq tsawrjeuq tsawrca-aq, Sheqmav, Haqmav & Yaqpev-euq zaqdeuq laer birpav-eu mae (Adb.10). Ghaqkhaer sanqbof lafkhoer tsawrhaq heu 3 ghaq-eu lafjudeuq Kali-euq nymrkhang-euq zaq pyeuflar gar ya'mawr-eu mae; Ghkh.8 lafkhoer *Haqmav-euq lafju 'Aerdagyorpir'* gawflar-awr, Ghkh.9 lafkhoer *Sheuqmav-euq lafju 'Sawrluv'* gawflar-euq uqtaf, Ghkh.10 lafkhoer *Yaqpev-euq lafju Lorma-euq guirdzoeq 'Gawrneqlir'* gawflar-euq mae. Garmanr kaqgar jawr-eu boermiqsiqkhaq pyeufyaf-euq khawf, nymq-mr-aq, dawqpae jawr-eu '*Miqyaer mirkhang-euq zaq*' pyeuflar-euq mae (Plp.3:20-21).**

2.Nymq-mr "Miqyaer-euq **nymrkhang-euq zaq**" pyeuflar-euq mae. "*Khoermirnae, nawmaf-aq, ...maqsiq maqsux-eu tsawrhaq maqpar ngeurmae. ...Miqyaer-euq nymrkhangzaq pyeuflar-euq mae*" (2:19). Yeqsur-anr jan-awr hageuf-euq tsawrhaq-aq, aqjeq tsawrjeuq tsawrca pyeuf-eu khawf, lafyaq baqda nae '**shiqshaq taf-eu**, Kali-euq shiqshaq taf-euq tiqpaeqzaq pyeuflar-euq mae. Aqdui, Yeqsur-anr noeqkeuv-eu laer kaqmur dzaq-awr aggaf dzaruir khardawrngae, yawtsaq yawdawr heu, aqdui-anr byacaevni

toeqmaeq naeqlaf-eu mae. ¹⁶“Aqdui, Miqyaer-anr jaceuq-eu quiqlanq-euq khmqmaq heu-aq, aqdui, Kali-euq shiq-anr tafluf malaer aermawf-eu maqngeur-a lor? Aqdui ngawqpyaeq-eu kaqmur-aq, aqdui, Kali-euq mawrdo-anr gawfluf malaer aermawf-eu maqngeur-a laq?

¹⁷Aqdui tsawrhaq ghawqmyaghaq pyeuf-eu khawf, kaqmur tiqsiq hawr-eu mawrdo tiqdo taef-aer pyeuf-eu ma. Aqjeq mirnae aernar-aq, aqdui yawqghaq navluf kaqmur tiqsiq-anr taef-aer taf-eu ma” (1Glt. 10:16-17).

3. Nymq-mr “**shawr-eu uqduq tanqnymr** nymrma” tiqnymr-anr taf-eu tsawrhaq pyeuf-lar-euq mae.

“²⁰Nawmaf-aq, ghaqkhaerdeuq hawr-eu Miqyaer gharduq ngaeqdan-eu deuqnae, dawqpaeq baetaq-euq gar tsovtasaf davlef-euq nymrmae.

Kali-aq, lafcoer-euq lozif pyeuf-eu mae. ²¹Aqyawf-anr ghoe-awr nymr nymrlanni, tiggar gheutsaf tsaqtaq-awr, Sanqpaq Miqyaer-euq lafkhoer, shawr-eu uqduq tanqnymr nymrma pyeuf-larni huiqlar luf-eu mae.

²²Aqyawf, nawmaf-anr khawf, Miqyaer-euq jawrduq pyeuf-larni, muiq-eu Saflar-anr ghoeghoe-aer, aqyawf-euq lafkhoer tsovanr luf-eu mae” (2:20-22).

Kali-aq, lafcoer-anr gawrtaq-euq **khaqlo lozif** pyeuf-awr, Ghaqkhaer & Miqyaer-euq gharduq ngaedan-eu deuq-eu khoertav gawrdav-euq mae. Ardangbae-eu sanqbof lafkhoer, Miqyaer, aqyawf-euq tsawrhaq naeq-aer ‘can-euq’ mae (Adb.5:22, 24; 6:9). Aerkhawf, Dovir-eu sanqbof lafkhoer, Miqyaer, aqyawf-euq tsawrhaq naeq-aer ‘jawrle-euq’ mae (Di.25:8). Miqyaer saqpar saeqghawv lafkhoer jawrle-euq mae (Di.40:34-38). Aerkhawf, Irsaqlaqlav tsawrhaq-euq iqbox baqda’nae “Miqyaer-euq yawshaef khangsaer dov-ir-euq mae” (Sml.4). Miqyaer, uqduq tanqnymr nymrma lafkhoer parjawrle-euq mae (1Sp.8:1-11). Aerkhawf, ghawqcawx cawv-aer Irsaqlaqlav tsawrhaq iqbox parmr-euq mirnae, Miqyaer-euq yawshaef khangsaer pardov-ir-euq mae (Ezk. 10:18-19). Khoernar-aq, Yaerbof yawhuif-euq zir-

anr keuvle nga-eaq, Miqyaer, *Kali-euq mawrdo* lafkhoer jawrle-euq mae (Yh.1:14). Aerkhawf, tsawrhaqzaq nae nyaef-awr darkawq lafyaq-anr tafsaef-euq mae.

Iqnan, Miqyaer, tsawrhaq nae tsov-euq uqduq tanqnymr-anr jawr-eu maqngeur-a (Ghkh.7:48-50). Miqyaer, muiq-eu Saflar-anr ghoe-awr nae, aqdir Miqyaer-euq uqduq tanqnymr nymrma pyeuf-eu *Kalizaq*-euq nuima lafkhoer jawrluf-awr (1Glt. 6:19-20), *Kalizaq armur*-euq lafkhoer jawrluf-eu mae (Eps.2:20-22). *Kalizaq armur*-aq, Miqyaer jawr-eu 'uqduq tanqnymr' mae. Ghaqkhaer & Miqyaer gharduq ngaeqdan-eu deuqnae dawqpaeq baetaq-awr, *Kali*-aq, dawqpaeq duqpur & lafcoer-euq lozif pyeuf-eu mae (1Glt.3:11; Jc.118:22; Isy.8:14; Eps.2:20). Lafcoer-euq lozif-aq, nymr-euq mawrkawr geugawf-awr gheutawf-eu mae. Yeqsur *Kali*, Yurdav tsawrhaq & aqcawq-euq tsawrjeuq tsawrca gheugawf-awr gheutawf-euq mae. Uqduq tanqnymr nymrma laer aerngae, Irsaqlaqlav tsawrhaq-aq, Heqlor nae tsovmuiq par-euq Yeqlursaqlaeq meuq-anr jav-eu Yurdav-euq uqduq tanqnymr nymrma-anr noeqkeuv-awr, aqcawq tsawrjeuq tsawrca-aq, Erpersu meuq-anr tsovtaq-euq huiqdui dui-eu '*Aqdeqmir*' miqyaerma-euq uqduq tanqnymr nymrma-anr noeqkeuvler-eu mae (Ghkh.19:24, 35). Uqduq tanqnymr nymrma heu nyiqnymrluf bilavcawv jir-euq mae. Aerkhawf, *Kali* nae tsov-euq uqduq tanqnymr-Kalizaq armur-anr *shir-eu larghov magghaqlar nya-a* (Mt.16:18).

Aqdui, Miqyaer jawr-eu nymr pyeuflarni, Yawshawr Saflar-anr ghoer-awr *Kalizaq*-anr gawranr ghardu, aqyawf, aqdui-anr lanyaq lafkhoer nae gheudov-awr zifdan'ni ghae-eu khaqlo khoertav bijawr naeqlaf-awr (Jc.40:2), daef-eu khaqlo bipyeuf lar-awr, Miqyaer-euq uqduq tanqnymr nymrma tsovgar zmqnaeq laf-euq mae (1Btl.2:5). Uqduq tanqnymr heunymr-aq,

yawmuiq-aer tsoftsaf-awr huiqlar manqlar luf-eu mae (Eps.2:21; 4:16).

III. Arsaq_Saq-eu_Dawq

Nawr, yawqhar yawqha yawmuiq-aer siqnya malaq? Iqnan, nawr aqgeu tiv-anr jawrluf-eu le? Guiqlanq saflarpaw *yawshir* lelaq? Maqngeur nar-aq, guiqlanq saflarpaw *garmanr kaggar jawrluf-eu* lelor? Shirtaq-euq tsawrhaq, jan-awr hageuf nar-aq, Yeqsur, bighof daeflar nya-awr, garmanr kaggar jawrluf-euq tsawrhaq, jan-awr cantae nar-aq, Yeqsur, Miqyaer-euq dawqpae sheuqpae naeqlaf nya-eu mae.

Dzeurlafngae, daefyaf-euq artiv hawr-eu nymq-mr aqdui, Kali-euq lafkhoer za-awr daefluf-eu artiv arnavni beugar-eu nga?

Arhu, Kali-anr maqsiqnya-aer noeqtmqkhar maqza-eu khawf, nymq-mr-aq, Miqyaer naeq-aer khawf, tsawrhaqzaq-euq yawkaq khawf, tsaqler dzoerlernya lar-awr, Miqyaer-euq mirkhanqzaq hawr-eu Miqyaer nymrkhanq-euq zaq pyeufklar-euq uqtaf, Miqyaer jawr-eu uqduq tanqnymr yapyeufklar-euq guiqlanq heu aqnavni huiq-awr, arnavni muiq-eu guiqlanq nga! *Haleluya-Miqyaer-anr jaceuqma*.

Nawr kakhof-eu jeq zaq-euq ngeurnar-aq, shir-euq garnae ghofdaef lar-euq tsawrhaq yawshuif lof-aer daefluf malaq? (Lm.6:4). Nawr, aqcawq-anr Miqyaer naeq-aer tsaqler dzoerler-eu laqkhaqcaer-eu guiqlanq dawq maeqnaeqluf malaq? Nawr, gar heuhmq za-euq mirnae ya'mr-eu (2Glt. 5:18), Kali-euq 'danzar' mae (2Glt.5:20). Saeqnawv nawqtaq-euq lof-aer guiqlanq dawq maeq-eu laeqhmq-awr mrngae (Eps.6:15; Lm.10:15; Isy. 52:7), guiqlanq za-eu mae (Mt.5:9).

Dzawdeuv 5: Huiq-eu Miqyaer nae Zaftaq-euq jeq.

I. Ardang Bae-eu Dawq

Miqyaer nae zaftaq-eu jeq heu-aq, arhunae zaftaq-euq jeq pyeuf-eu khawf, nymq-mr bisiq bimawr naeqlaf-awr, Kali-anr maqjan-eu tsawrhaqdeuq maqsignya-eu khawf, Kalizaq-aq signya-awr, maqsignya-eu deuq-anr bisiq nya'ni ya'mr-eu mae. Miqyaer nae zaftaq-eu jeq heu-aq, oeqpyawq-euq gharduq huiq-eu garkawv mae.

II. Zawr Huiq-eu Miqyaer nae Zaftaq-euq jeq (Eps. 3:1-13)

A. Pawrluv-euq gharduq huiq-eu garkawv mae (Eps. 3:1-5).

¹*“Ngar-aq, aqcawq tsawrjeuq tsawrca pyeuf-eu nawmaf-euq gharduq, Yeqsur Kali baqda'nae, kuv-anr binyaefur taq-euq Pawrluv ma.*

²*Miqyaer-euq guiqlanq yawdzanr baqda'nae, nawmaf-euq gharduq gar mrni, ngaq-anr khaerdar taq-euq maelaer, nawmaf yagaq-euq mae.*

³*Miqyaer, aqyawf nae zaftaq-euq jeq ngaq-anr aqjox-aer panmaeq naeqlaf-awr bisiq nya'naeq laf-euq garkawv, dzeurlafngae, nawmaf-anr sanqbof yawnymr nymr-aer bofanr lef-euq ma. ⁴Nawmaf guinar-aq, ngar, Kali-anr taf-eu zaftaq-euq jeq-anr ngaq-euq signya-eu tsawrganr garkawv, nawmaf ghovshaw nyalar taef-a. ⁵Dzeurlaf-eu zir-anr, zaftaq-euq jeqkhoer, tsawrhaqzaq-anr maqbi signya-aq. Aerkhawf, nymq-mr-aq, muiq-eu Saflar-anr ghoe-awr, aqyawf-euq shawr-eu ghaqkhaerdeuq hawr-eu, aqyawf-euq gharduq ngaeqdan-eu deuq-anr panmaeq naeq-euq mae.”*

Miqyaer nae zaftaq-euq jeq heu Pawrluv-euq gharduq arnavni huiq-eu ngalaer aernar-aq, heu-euq baqda'nae “*kuv-anr binyaefur taq-awr*” (Eps. 3:1), heu-euq gharduq “*gar mrzaq pyeufklar-euq*” malaer aer-eu mae (Eps. 3:2, 7). **Zaftaq-euq jeq** heu aqjeq aqjox-aer lalaer aernar-aq, dzeurlafngae, Yurdav & aqcawq tsawrhaq maqtsaq maqdoer ler-a. Yurdav tsawrhaq-aq, aqcawq tsawrhaq-anr ‘*aqkuiq*’ laer sawxtaq-euq mae (Mt.

15:26-27). Arhu ba'nae, Yaerbof Yawoer lafkhoer khawf maqpanmaeq taq-euq, Miqyaer nae zaftaq-eu jeq pyeuf-eu mae. Aerkhawf, Yeqsur baqda'nae Yurdav & aqcawq tsawrhaq tsaqler dzoerler-eu heu-aq, Yaerbof Yawshuif-euq lafkhoer, "*muiq-eu Saflar-anr ghoe-awr, aqyawf-euq shawr-eu ghaqkhaerdeuq hawr-eu, aqyawf-euq gharduq ngaeqdan-eu deug-anr panmaeq naeq-euq mae.*" Pawrluv-anr khawf panmaeq naeq-euq mae (Eps.3:3-4; Ghkh.9; Glt. 3:28).

Pawrluv; ardanq baengae-aq, *Yurdav-euq zanr-anr tafler-awr* nae sheuqghae-eu tiqghaq geuf-awr (Glt.1:11-24; Plp.3:1-11), Kalizaq-anr khaeqluf ngae, *Miqyaer nae kur-euq* mae (Ghkh.9:1-31). Yurdav & aqcawq tsawrhaq keuq-eu Aqdirawq Kalizaq armur naeq-aer Miqyaer-euq *gar mrdanq bae-awr* (Ghkh.11:19-26), nuima khaquqni, aqcawq tsawrhaq *bawkhov maeqdaq maqyaeqni* Kalizaq geuf-eu garkaww ja-euq mae (Ghkh.15; Glt.2:1-10). Pawrluv-aq, aqcawq-euq tsawrjeuq-anr maeq-eu ghaqkhaer pyeuqlar-euq mae (Ghkh.9:15; 26:13-18; Lm.11:13; 15:15-16; Eps.3:8; 1Tms.2:7). Aerkhawf, aqyawf-euq tsawrjeuq Yurdav tsawrhaq-anr gaq-eu byacaevni mawrlar-eu mae (Lm.9:2; 10:1; 11:2). Aqyawfmaf shaqngae cawba naeq-eu gar mawrlar-eu mae (Lm. 15:25-33; Ghkh.21:17-19; 2Glt.8-9).

B.Mirkhanq tsawrjeuq-euq gharduq huiq-eu garkaww

mae (Eps.3:6-8). ⁶*Zaftaq-euq khoer-aq heulof-aer mae.*

Guiqlanq dawq baqda'nae aqcawq tsawrjeuq tsawrca khawf, Kali lafkhoer Yurdav tsawrhaq naeq-aer tiqkaww lof-aer jeqbir of-awr, mawrdo tiqdo taef-aer pyeuflar-euq uqtaf, aqyawf-euq sarjax-anr khawf tiqkaww lof-aer za-euq mae. ⁷*Miqyaer-euq baoq gar mr-eu lafkhoer, Miqyaer, ngaq-anr lafsawq lof-aer, aqyawf-euq guiqlanq yawdzanr bifnaeq laf-euq mirnae, ngar guiqlanq garmrzaq pyeuflar-euq ma.* ⁸*Kali lafkhoer anr-eu, maqpov mawrjir coerni sanr-eu guiqlanq deug, aqcawq tsawrjeuq tsawrca-anr dawqmaeq bimaq-ir-eu gharduq, tsawrshawr dawqtaww luf-anr nae tegdzaeq-eu ghaq pyeuf-eu ngaq-anr, guiqlanq yawdzanr khoer bifnaeq laf-euq mae.*"

Yaerbof yawoer Adb.12:3 lafkhoer, Miqyaer, Aqbyaqhaq ovnae tsawrjeuq tsawrca dawqtawvluf guiqlanq zataef-a laer sarjax dzaqtaq-eu khoer, aqjox-aer pyeuflar nya-eu laer-aq, zaftaq-euq

jeq pyeufyaf-euq mae. Nymq-mr siqlar nga-eaq, Kali-euq lafkhoer za-eu gar aer-eu law hawrngaq laer byacaevni mawrlar-eu mae (Glt.3:28). Aqcawq tsawrjeuq khawf Kali-euq lafkhoer; Yurdav tsawrhaq lof-aer **jeqbir** of-awr, Yurdav tsawrhaq naeq-aer **mawrdo tiqdo** taef-aer pyeufklar-eu uqtaf, Miqyaer nae **sarjax** dzaqtaq-euq lof-aer za-eu mae. Teumirnae, Kalizaq-aq, Yeqsur Kali-euq lafkhoer guiqlaq saflarpawq Irsaqleqlav tsawrhaq pyeufklar-awr, Yaerbof lafkhoer 'Irsaqleqlav, Heqbyaer & Yurdav' laer kharaer-eu jeq, aqdui-anr khawf taflar-euq mae. Heu-aq, arhunae zaftaq-euq, Kali nae panmaeq naeqlaf-euq mae.

Guiqlanq yawdzanr-aq, "maqgeuxgar za-euq guiqlanq"-kakhof-eu jeq za-euq (Eps.2:8-9) uqtaf, "aqdui-anr mrlaer khaer-euq jeq-anr bimr nya'ni bifnaeq laf-eu guiqlanq" deug-anr khawf aermawf-eu mae. Pawrluv guiqlanq heu nyiqjeqluf za-awr mr-euq mae. Guiqlanq yawdzanr-euq lafkhoer, Miqyaer-euq "**baog**"-bafpur miqsiq, ghaq & miqdzaq za-eu dawqpaeq duqpur khawf anr-eu mae. Kali-euq lafkhoer anr-eu **guiqlanq**-aq, maqaernya paq-aer huiq-awr myaq-eu-sanr-eu guiqlanq mae. **Pawrluv**, Yeqsur naeq-aer ngaeq-aer cawqnar-aq, nuinang nuiyu ngaeq-aer anrlar-awr **yawqhar yawqha** aqjox-aer kur-euq nga? Ardang baengae 'ghaqkhaer deug-anr nae teqdzaeq-eu ghaq' laer kur-awr (1Glt:15:9), heugar 'tsawrshawr deug-anr nae teqdzaeq-eu ghaq' laer kur-euq (Epw.3:8), arsaq saq-ir ngae 'iqbaxzaq-anr nae teqdzaeq-eu ghaq' laer kur-eu mae (1Tms. 1:15).

C.Mqtav ghaqkhaer-euq gharduq huiq-eu garkaww

mae (Epa.3:9-10). ⁹*Yeqsur Kali-anr ghoe-awr dawqtaww luf-anr bae-euq Miqyaer lafkhoer, ardanqbae ngaenae daeqkaq taq-euq jeq-anr taf-eu zaftaq-euq jeq lafkhoer, cawq cawqtaf-eu jeq aqjox-aer*

ghaenga laer, tsawrhaq dawqtawv luf-anr bimawr nikhawf, bimirnaeq laf-euq mae. ¹⁰ Khoer-aq, nymq-mr Kalizaq armur-anr ghoe-awr, Miqyaer-euq zaqsiq tsawrganr ghawqmyajeq, uvlanr-eu deuq hawr-eu aryaq deuq-anr bisiq-eu laer laeqhmq taq-euq mae.”

“**Uvlanr-eu** deuq hawr-eu **arya**q deuq” heu-aq, mqtav ghaqkhaer deuq-anr aermawf-eu mae. Mqtav ghaqkhaer yawmuiq—Miqyaer-euq mqtav ghaqkhaer hawr-eu *coq-ir-euq* mqtav ghaqkhaer—naef sanqpaq & aqyawf-euq baqmaf laer jawr-eu mae (Eps.1:21; 6:12; Gls.1:16; 2:15). Mqtaav ghaqkhaer-aq, yawqjeq navluf-aer siqnya-eu maqngeur-a. Miqyaer, zaqsiq tsawrganr byan-eu lafkhoer, mqmir maqbae-euq mirnav-aer—ardanq baengaenae, tsawrhaq-anr kakhof-eu bawqtov javtaq-euq mae. Aerkhawf, mqtav ghaqkhaer deuq-anr khawf, maqbi siqnya’ni ‘zaftaq-euq’ mae. Aerkhawf, aryamq tsaqlarngae, yawqghaq navluf-anr bisiq bimawr-eu laer laeqhmq taq-euq mae.

Kakhof-eu jeq-euq garkawv mqtav ghaqkhaer mawrmawf-awr (1Btl.1:10-12), iqbaxzaq kakhof-eu jeq za’ngae laqkhaqcaer-eu mae (Lk.15:10). Mqtav ghaqkhaer, Kalizaq-anr hawluf-eu mae (1Glt.11:10; 4:9). Kakhof-eu jeq maqzaq-euq tsawrhaq-aq, kakhof-eu jeq-anr yawlaf dawrga laer haw-eu mae (1Glt.1:18-31; 2Glt.4:4).

D.Kalizaq-euq gharduq huiq-eu garkawv mae (Eps.

11-13). ¹¹ Miqyaer nae mqmaq maqbyav yarzir noeqtsaev taq-euq lof-aer, aqdui-euq Sanqpaq Yeqsur Kali lafkhoer bibyan lar-euq mae.

¹² Aqdui, Yeqsur lafkhoer nuima khaqduqni taq-awr, aqyawf-anr jan-awr yawduq baw-eu mirnae, Miqyaer-euq maeqshi urler nya-eu ma.

¹³ Khoermirnae, ngar, nawmaf-euq gharduq shaq-awr zang-eu jeq yadaq luf-eu baqda’nae, nuighaq taqbaq laer ngar, nawmaf-anr shar-eu ma. Heu-aq, nawmaf-euq gharduq yawshaef khaqsaer pyeuf-eu mae.”

Miqyaer nae zaftaq-euq jeq-poeg-eu guiqlanqdawq-euq yawtsaq yawdawr heu-anr, Pawrluv **za**-awr (1Tms.1:11), aqcawq-anr **biftsaf** ghae-euq uqtaf (2Tms.2:2; 1Tms.6:20), arsaq yawmuiq-aer **saq**-euq mae. “Jan-eu jeq-anr yawmuiq-aer nyaeftaeq taq-euq ma” (2Tms.4:7). Pawrluv, ‘**Mqyaer nae zaftaq-euq jeq**’ hageuf-awr, jeqhmq-awr biftsaf-euq uqtaf, nyaeftaeq-awr

arsaq yawmuiq-aer saq-euq mae. Aqdui, Kalizaq yawqghaq navluf khawf, teulof-aer janr-eu tsaqmae. Aerkhawf, garma-anr ghawmyajeq lavtaeq lavbyov yaf-awr, tsawrhaq-euq zanr, daefjeq daefkawv & mrjeq sharkawv daeqpar-euq mae. Aerkhawf, Miqyaer ghawqshaqqaq-eu lafkhoer, Miqyaer nae 'zaftaq-euq' garnae 'panmaeq-euq' khawf, Kalizaq nae lavbyov-euq heudeuq '**parpanq maeqnaeq lafluf-eu**' mae; Jan-eu baqda'nae kakhof-eu jeq za-eu garkawv, Yawshawr Saflar-euq garkawv, ghaq khav-eu Kalizaq lof-aer daef-eu garkawv, Miqyaer uvlanr-eu jeq-euq garkawv...

Miqyaer nae 'Yaerbof Yawoer' lafkhoer-*Zanrdawq khofdawq, Zirga dzanrga, Zaqnyi zmqdawq & Zaftaq-euq jeq panmae-eu* lafkhoer kharaertaq-euq kharzaftaq-euq jeq Yeqsur Kali lafkhoer byanlar-euq mae. Aqdui, Yeqsur-anr siqnya-awr jan nar-aq, nuima khaqduqni, yawduq baw-eu lafkhoer Miqyaer-euq maeqshi urler nya-eu mae. Teumirnae, aqdui, Miqyaer nae zaftaq-euq khawf, panmaeq naeqlaf-euq 'yawtsaq yawdawr' heu-anr *jan-awr hageuf-eu* uqtaf, yawmuiq-aer *jeqhmq-awr biftsafghae-eu* taef-aer maqghaqni, jan-eu arsaq *yawmuiq-aer saq-eu* tsaqmae.

III. Arsaq Saq-eu Dawq

Miqyaer nae zaftaq-euq khawf panmaeq naeqlaf-euq-yawtsaq yawdawr heu-euq gharduq, daefkhawf daefmanr tsanr-awr shirkhawf shirmanr tsanr-eu mae (Pm.12:11).

Dzawdeuv 6: Kalizaq Daefnya larni Sharcaw-eu

I. Ardang Bae-eu Dawq

Erpersu sanqbof lafkhoer, Pawrluv nae guiqlanqshar-euq nyiqgar bofanr taq-euq mae: *Tif*, Eps.1:15-23 laf khoer Kalizaq '*siqnya larni*' shar-euq mae. *Nyif*, Eps.3:14-21) lafkhoer Kalizaq '*daefnya larni*' shartaq-euq mae. Pawrluv

guiqlanq sharngae, heu nyiqgar taef-aer maqngeur-eu, yawqgaryawq khawf (Plp.1:9-11; Gl. 1:9-12), lafnuyir paw taf-eu jeq maqngeur-eu, *lafkhoerpaw taf-eu jeq* shar-eu mae. Lafkhoerpaw tsaqnar-aq, lafnuyirpaw arlawv lawv-aer tsaqlar-eu mae.

II. Pawrluv, Kalizaq Gharduq Guiqlanq Shar-euq (Eps. 3:14-21)

A. Pawrluv Dawqghaq Lawq-eu (Eps. 3:14-15)

“¹⁴Garkawv heudeuq baqda’nae, ngar, aqdui-euq Sanqpaq Yeqsur Kali-euq Aqda Miqyaer-euq maeqshi, pawqtsuif pawqdmq dmq-awr guiqlanq sharluf-eu ma. ¹⁵Mq hawr-eu mirtsaq khoertav jawr-eu arjeuq arca dawqtawv luf-euq tsawrmyanr-aq, aqyawf nae biftaq-euq taefmae.”

Miqyaer, aqcawq tsawrjeuq-anr ghawqshaqqaq-eu gar noeqmawr-awr nae Pawrluv, Aqda Miqyaer-euq maeqshi pawqtsuif pawqdmq dmq-awr guiqlanq shar-euq mae (14). Miqyaer-aq, mqtav ghaqkhaer & mirtsaq-euq tsawrjeuq tsawrca deuq-euq Aqda yawdzanr ghaq maelaer toeqmaeq naeqlaf-euq mae (15).

Guiqlanq sharngae; gawqyawf yawf-awr naekhawf sharnya-awr (Aqbyaqhaq-Adb.18:22; Sorlaqmoq-1Sp.8:22), nuir-awr naekhawf sharnya-eu uqtaf (Daqbir-1Zg.17:16), mirtsa awbyav-awr naekhawf sharnya-eu mae (Yeqsur-Mt.26:39). Aerkhawf, Pawrluv aqkuir *pawqtsuif pawqdmq dmq-awr* shar-euq mae (Eps.3:14). Zirga dzanrga-anr hawngae, Miqyaer-euq tsawrhuiq tsawrma ghawqmyaghaq ‘lawtaw-euq aqkuir pawqtsuif’ laer tsawrmyanr zaq-euq mae. Khoer-aq, nuinanq nuiyu anr-awr guiqlanq sharcoer-eu gar aermawf-eu mae.

Kalizaq luvlav mr-eu ghawqmyajeq jav-eu mae: Miqyaer, aqdui-anr *shir-euq* garnae (Eps. 2:1), bighof *daeflar-awr*, Kali naeq-aer *binuir naeqlaf-euq* mae (Eps.2:4-6). Miqyaer nuima

tsaqni *daefnya-can'nya* lar-awr (Eps.4:1, 17; 5:2, 8, 15), naef sanqpaq-anr ghaqlerni *yawfzifnya lar-euq* ma (Eps.6:10-13). Kalizaq luvlav mr-eu heudeuq, nuima nanqyu'ni taq-awr, aqdir Miqyaer-anr ghoejir gar taf-eu mae.

B.Pawrluv-euq Guiqlanq Shardawq (Eps.3:16-19)

Pawrluv, Kalizaq-euq gharduq guiqlanq sharngae, tiqkhaeq larkhaeq taef-aer muiq-eu lafnirpaw taf-eu jeq-euq gharduq maqngeur-eu, myanrni muiq-eu lafkhoerpaw taf-eu jeq-euq gharduq shar-euq mae. Guiqlanq sharngae, Miqyaer kharngeur-eu jeq lavmuiq lavpar nya-eu taef-aer maqngeur-eu, tsawrhaq khawf lavmuiq lavpar nya-eu mae. Pawrluv, Erpersu Kalizaq-euq gharduq 4 jeq sharcaw-euq mae; Tif, Miqyaer-euq Saflar baqda'nae aqyawfmaf-euq nuima **ghaq** anrlarni (16). Nyif, jan-eu mirnae Kali lafkhoer **jawrzif** nyalarni (17). Smr, Kali-euq ghoer-eu gaq-eu jeq-anr **ghovshaw** nyalarni (18). Oeq, Miqyaer byan-eu jeq Kali zaq-euq lafkhoer **byanlarni** shawrcaw-euq mae (19).

• **Nuima ghaq anrlarni:** “¹⁶*Ngar guiqlanq heulof-aer shar-eu ma: Miqyaer-euq yawshaef khanqsaer sanrdui duigar geuxni, aqyawf-euq Saflar-anr ghoear-awr, nawmaf-euq nuima, ghaq bianr lar-awr ghaq bikhav larlaw.”* Pawrluv, Kalizaq ‘*nuima ghaq anrlar-awr ghaq khavlarni*’ gharduq shar-euq mae. Aqdui tiqghaq taefkhawf, nyiqghaq-anr dur-eu mae: Lafnyir ghaq—‘Mawrlar-eu’ shiqshaq-euq mawrdo & Lafkhoer ghaq—‘Maqmawrlar-eu’ nuima saflar. Aqdui Kalizaq, lafnir paw-euq shiqshaq ghaq baq-ir khawf, lafkhoer paw-eu nuima saflar ghaq khavlar nya-eu mae (2Glt.4:16-18). Lafkhoer paw-euq ghaq, ghaq bikhav larni, Yawshawr Saflar tiqbyan’ni bijawr-awr, nuima saflar-euq dzar yabidzaq-eu mae (Mt.4:4). Kalizaq-euq ‘*nuima ghaq anrlar-awr ghaq khavlarni*’, ‘*Miqyaer-euq Saflar—Yawshawr Saflar-anr*’ ghoear-awr nae taef-aer ghaq anrlar-eu mae. Yawshawr Saflar baqda'nae, aqdui; *kakhof-eu* jeq za-awr (Lm.8:9), *sarkir kamq-* eu Miqyaer-euq *baeq* za (Ghkh.1:8), Saflar-euq *arsiq* siqle (Glt.

5:22-23), Saflar-euq *lafsawq* za-eu ma (Lm.12:6-8; 1Glt.12). Yeqsur Kali khawf, Miqyaer-euq gar mrngae, Yawshawr Saflar-anr ghoer-awr nae mr-euq mae (Lk.4:1, 14; Ghkh.10:38). Pawrluv, Kalizaq-eu gharduq guiqlanqshar-eu armyavni shar-eu ngalaer aernar-aq, '*Miqyaer-euq yawshaef khangsaer sanrdui duigar geuxni*' shar-eu mae. Tiqghaq, guiqlanqdawq maeq-ir gar cawba-eu laer pyur 1,000, 000 baf javgar, 100 baf taef-aer bifnae-aq, maqgeux-a. Aqyawf jav-eu lof-aer geuxni bifle laer nar-aq, 100,000 baf laqlaer yabif-eu mae. Miqyaer-anr geuxni bifnaeqqlaf-eu *guiqlanq—ghaq, baoq, pyur...*, armyav myaq-awr arnavni huiq-eu jeq-a laer sharnoeq hawsher-eq.

- **ziflarni:** "¹⁷*Nawmaf jan-eu mirnae, Kali, nawmaf-euq nuima lafkhoer jawrle-eu uqtaf, nawmaf gaq-eu jeq lafkhoer, duqcir ka'naf ghae-awr, dawqpaeq bizif larlaw.*" Kalizaq ziflarni gharduq ghaq bif-eu Pawrluv arbar 3 jeq zmqtaq-euq mae: *Tif*, Kali nuima lafkhoer *jawrle*-eu; Aqdui, Miqyaer-anr janlarngae, Yeqsur, aqdui naeq-aer jawrle-euq mae. Nawr, Yeqsur-euq gharduq aqjox-aer ghae-eu nymr pyeuf-eu le? Yeqsur, nawq-euq lafkhoer jawrmawf-awr jawrmuiq-eu jeqmae laq? Iqbax yawjawf, aqdui-eu lafkhoer anrluf nar-aq, maqjawrmuiq-eu nymr pyeufar-eu mae. Miqyaer-euq mqtav ghaqkhaer—Kali, Aqbyaqhaq jawrgar ir-awr hawq dzaq-ir-euq khawf, Lortav jawrgar maqir-aq (Adb.18-19). *Nyif, Duqcir* ka'naf ghae-eu; Arbawr tiqbawr duqcir ngaeq-aer ka'naf ghae nar-aq, ngaeq-aer ziflar-awr dzarmuiq & ircuf khawf za'nya-eu mae. Khoerlof-aer durni, aqdui khawf, ziflarni & huiqlar manrlarni Yaerdawq siqnya-awr ghovshawni yalaejae-eu mae (Jc.1:1-3; Ylm.17:5-8). *Smr, Dawqpaeq* bizif-eu; Nymr tsovngae, dawqpaeq maqzif-eu kharshuif lof-aer ghaegar yawawq awq-aer tsovnar-aq, jaqlaer bawlar ngae, coq-ir-eu mae. Teumirnae, Miqyaer, aqdui-anr shaqdzaeq lawkhawf khaqlo lof-aer zif-eu dawqpaeq-euq khoertav bitsov mawf-eu mae (Mt. 7:24-29).

- **Miqyaer Gaq-eu jeq-anr ghovshaw nyalarni:** "¹⁸*Nawmaf, tsawrshawr dawqtawvluf naeq-aer,*

Kali-euq gaq-eu jeq, arnavni jer-awr arnavni manr-eu, arnavni naf-awr, arnavni gor-eu ngalaer bighovshaw larlaw.” Tiqjeqpaq ghovshaw-eu-aq, siqnya-eu gar taef-aer aer-eu maqngeur-a. Ghovshaw-eu-aq, siqnya-eu taf-aer gordzaeq-eu mae. Ghovshaw-eu-aq, siqnya-eu lof-aer daefgar aermawf-eu mae. Kalizaq, ‘Miqyaer, ngaq-anr gaqmae’ laer siqnya-eu taef-aer maqghaq-a. Miqyaer gaq-eu lafkhoer daef-awr, Miqyaer gaq-eu lof-aer yagaq nya-eu mae. Nawr, Miqyaer, nawq-anr arnavni gaq-a laer ghovshaw-awr, aqcawq-anr arnavni khawf, gaqma laq? (1Yh.4:19).

• ***Miqyaer lafkhoer byan-eu jeq***

byanlarni: “¹⁹*Khoeruqtaf, tsawrhaqzaq-euq siqnya-eu tsawrganr taf-aer dzaeq-eu, Kali-euq gaq-eu jeq-anr nawmaf siqnya lar-awr, Miqyaer-euq lafkhoer byan-eu yawqjeq navluf, nawmaf-euq lafkhoer bibyan larlaw.*”Nawr ciqcaev paq-aer maqghae-eu, maqbyan-eu deuq-anr ciqcaev ciqcaev-aer nuima taqhuiq. Kali-euq lafkhoer byangar haw-awr, nawrkhawf, Kali byan-eu lof-aer byanlar mawf-awr, byanlarni bishaevbyan-awq (Eps.5:18).

C. Pawrluv, Miqyaer-anr Jaceuq-awr Saq-euq Dawq (Eps. 3:20-21)

“²⁰*Aqdui-euq lafkhoer gar mrluf-eu aqyawf-euq baeq-anr ghoe-awr, aqdui sharnoeq-awr tanqshar-eu navmaqtser, ardzaeq paw-aer tiqbyan tiqluf mrpyeuf nya-eu Miqyaer-anr taqhuiq taqmanrnaeqvma.* ²¹*Yeqsur Kali-anr ghoe-awr, Kalizaq armur lafkhoer tiqzir sair tiqzir, li-eu maqbawni Miqyaer-euq yawshaef khanqsaer huiqluf-ur.* Aqmeq.”

Miqyaer-euq baq, aqdui-euq lafkhoer mrluf sharluf-awr, aqdui noeqdov shardov nya-eu navmaqtser Miqyaer mrnya-eu mirnae, Miqyaer-anr taqhuiq taqmanr-awr (20), Yeqsur Kali baqda’nae Mirtsaqzaq tiqzir sair tiqzir li-eu maqbawni, Kalizaq armur-euq lafkhoer Miqyaer-euq yawshaef khanqsaer huiqluf-ur (21) laer Pawrluv, Miqyar-anr jaceuq-euq mae. Miqyaer-aq, yawdoer maqdoer-aer zawrbymr-eu ‘**gar mrluf-eu**’ Miqyaer mae. Miqyaer gar mr-eu khoer aqjox-aer mr-eu ngalaer

aernar-aq, aqyawf-eu 'baoq-anr' ghoew-awr nae mreu mae. **Baoq** laer aer-eu heudawq-aq, Yawshawr Saflar, aqdui-euq daefzir lafkhoer gar mrluf-eu gar toeqmaeq mawf-eu mae (Eps.3:16; Plp. 2:12-13). Miqyaer-aq, huiqmae laer, aqdui noeqdov nya-eu nav maqtser huiq-awr, aqdui mawfnya mrnaeqlaf laer, sharnya-eu myav maqtser mrnya-eu huiq-awr muiq-eu Miqyaer mirnae jaceuq-eu tsaqmae. Kalizaq armur-anr nae, '*tiqzir sair tiqzir, li-eu maqbawni Miqyaer-euq yawshaef khangsaer*' dovlargar, Miqyaer mawrmawf-eu mae. Aerkhawf, Kalizaq armur ghawqmya mur-anr nae Miqyaer-euq yawshaef khangsaer maqdovlar luf-a. Kalizaq ghawqmyaghaq-euq daefzir-anr nae, Miqyaer-euq yawshaef khangsaer dovlargar maqya mawr-a. Aqjeq mirnae aernar-aq, aqyawfmaf *maqjan-eu, iqbax maqpyaeq-eu, mirtsaq-anr gaq-eu, yawqha-euq nuikhanr geuf-eu...* heudeuq-euq yawzanr nae biuvtaeq taq-euq mae.

III. Arsaq_Saq-eu_Dawq.

Pawrluv-eu guiqlanq shardawq heu-aq, aqdui-euq guiqlanq shardawq bipyeuflar-awr, nan-anr nae aqdui siqnya-eu tsawrhaq deuq-eu gharduq, aqdui-euq Kalizaq armur gharduq guiqlanqshar-eu tsaqmae. *Kalizaq; Nuima ghaq anrlarni, Ziqlarni, Miqyaer-euq gaq-eu jeq ghovshawnya larni, Miqyaer byan-eu lof-aer byanlarni hawr-eu Kalizaq armur-anr nae Miqyaer-euq yawshaef khangsaer dovlarni* guiqlanq shar-eu tsaqmae.

Dzawdeuv 7: Nuima Gm-awr Daef-awq

I. Ardang Bae-eu Dawq

Erpersu sanqbof, deuvma 6 deuv anr-eu 2 pav birnya-eu mae. **Eps.1-3** keuvni, **Kalizaq-euq noeqjeq jankaww** boftaq-euq mae: Kali-euq lafkhoer za-eu guiqlanq (1:1-14), Kalizaq siqnya

larni guiqlanq shar-euq (1:15-23), guiqlanq yawdzanr baqda'nae kakhof-eu jeq za-euq (2:1-10), lafyaq baqda'nae tsaqler dzoerler-euq (2:11-22), Miqyaer nae zaftaq-euq jeq (3:1-13) hawr-eu Kalizaq daefnya larni guiqlanqshar-eu (3:14-21). **Eps.4-6** keuvni, **Kalizaq-eu daefjeq cankawv** boftaq-euq mae: Nuima gm-awr daef-eu (4:1-16), yawshawr shawr-aer daef-eu (4:17-5:17), tiqghaq-euq laqov tiqghaq daef-eu (5:18-6:9) hawr-eu guir deuv-eu keuka dm-awr daef-eu (6:10-24).

Kalizaq, yawqha mrluf sharluf-eu jeq, aqjox-aer aqgar aqjeq-anr dawqpaeq taq-awr mrluf sharluf-eu lelaer, yawha jan-eu jeq-anr yawmuiq-aer siqnya-awr mrcaw mrcaw-aer daef-eu tsaqmae. Aqdui jan-eu jeq aqjox-aer jan-eu lelaer yawmuiq-aer siqnya nar-aq, mrcaw-eu khawf yawmuiq-aer mrcawnya-eu mae.

II.Muiq-eu Saflar Lafkhoer Nuima Gm-awr Daef-awq (Eps.4:1-16)

A.Nuima Gmnya'ni Yalaejae-eu 'Shaevdzeuf 7 jeq' (Eps.4:1-3)

¹*Sanqpaq Yeqsur-euq gharduq kuv-anr urluf-eu ngar, nawmaf-anr heulof-aer shar-eu ma. Miqyaer, nawmaf-anr kur-euq lof-aer, kur-euq gar geuxni daef-awq.* ²*Yawqjeq navluf lafkhoer, nuinanq nuiyu anr-awr, nuima nanqyuni ghae-eu uqtaf, nuinoeq ghawrmanrni noeq-awr, gaq-eu lafkhoer tiqghaq tirghaq or-awq.* ³*Tsaqler dzoerler-eu jeq lafkhoer tiqghaq tirghaq biganr dzanq-awr, muiq-eu Saflar lafkhoer nuima tiqsiq taef-aer taq-eu jeq maqbi byov-ir ni laejae-awq.*”

Kakhof-eu jeq za-euq Kalizaq-aq, yawmuiqjeq za'ni yawmuiq jeq mr-eu maqngneur-eu, yawmuiqjeq za-euq mirnae, yawmuiqjeq ya mr-eu mae. Yaerdawq aer-eu, “*Miqyaer, nawmaf-anr kur-euq lof-aer, kur-euq gar geuxni daef-awq*”(4:1). Eps.1-3 keuvni-aq, Kalizaq yawmuiq aqjeq zadzeur-euq lealer aertaq-awr, Eps.4-6 keuvni-aq, Kalizaq yawmuiq khoerdeuq zadzeur-euq mirnae, yawdaef aqjox-aer yadaef-eu lalaer aertaq-euq lafkhoer, Eps.4:1-16 keuvni-aq, Miqyaer nae kur-euq gar geuxni daef-eu “*nuima gm-awr daef-awq*” laer aertaq-

euq mae. Kalizaq nuima gmnya'ni "Yawshawr Saflar lafkhoer nuima tiqsiq taef-aer yataq-eu mae." Kalizaq armur, Yawshawr Saflar-euq lafkhoer nuima tiqsiq taef-aer taqnya'ni, Kalizaq shaevdzeuf heu 7 jeq ya'anr-eu mae:

- **Nuinanq nuiyu**, Miqyaer-anr taqhuiq-awr, aqcawq-anr noeqpoeq nya-eu, 'anrma laer noeqngae byov-ir-eu tiqjeq pyeuf-eu mae.'
- **Nuima nanqyuni ghae-eu**, ghaq baq-eu maqngeur-eu ghaq khav-eu arbar mae. Morseq khawf, anr-awr (Bts.12:3), Yeqsur Kali khawf, anr-eu mae (Mt.11:29).
- **Nuinoeq ghawrmanrni noeq-eu**, anrnar-aq, ciqtanq ciqtuv lar-eu shaqzanq-anr ghawqmyanrni daqcoer-eu mae.
- **Gaq-eu**, tiqjeppaq zakhofni maqngeur-eu Miqyaer gaq-eu lof-aer *agape* gaq-eu jeqnae gaqnar nuima gmnya-eu mae.
- **Tiqghaq tirghaq or-eu**, gaq-eu jeq & Yawshawr saflar-euq arsiq mae (1Glt.13:4; Glt.5:22-23).
- **Tsaqler dzoerler-eu**, maqcae-aer guirdeuv maqdeuv, nuima maqbawni cawqnar-aq, aqsurghaq-anr khawf cawqnya-eu mae.
- **Laejae-eu**, Aqda Miqyaer-euq bawqtov, Zaqyo Yeqsur nae mrbyan-euq, Yawshawr Saflar aqdui-euq lafkhoer mrluf-eu naeq-aer, aqdui khawf laejae-awr nuima gmlarni ya'mr-eu mae.

B.Nuima Gm-eu Dawqpaeq duqpur '7 jeq' (Eps.4:4-6)

⁴Miqyaer, nawmaf-anr kurngae, *noeqtmqjeq tiqjeq taef-aer jav-awr, mawrdo tiqdo taef-aer baw-eu uqtaf, muiq-eu Saflar tiqghaq jawr-eu taefmae.*

⁵*Sangpaq Miqyaer tiqghaq taef-aer jawr-awr, jan-eu jeq tiqjeq taef-aer jav-eu uqtaf, bartirsaq mr-eu tiqjeq jav-eu taefmae.* ⁶*Miqyaer khawf tiqghaq taef-aer jawr-awr, tsawrhaqzaq dawqtawv luf-euq Aqda pyeuf-eu uqtaf, dawqtawvluf khoertav jawr-awr, dawqtawvluf lafkhoer gar mr-awr, nawmaf yawqghaq navluf lafkhoer khawf jawrluf-eu mae."*

Aqdir nuima gm-eu—zif-awr gmq-eu nuima gm-eu jeq-aq, tsaq-

awr dawr-eu dawqpaeq—yawtsaq yawdawr-anr nae yabae-eu mae. Dawqpaeq maqzif nar-aq, gm-eu gar dur-eu khawf, arsaq saqlar ngae-aq, gm-eu khoer maqgmaq maqzif nya-a. Kalizaq nuima gmnya’ni, garkawv yawhuiq deuq-anr-aq, nuima tiqgar yatsaq-awr, garkawv yawzaq deuq-aq, tiqghaq tirghaq maqdur ler-eu gar nuikhanr yashir coer-eu mae. Garkawv yawzaq deuq-aq, tsaqtsaqni maqtsaq maqdzoeur-eu jeq yabi jav-eu mae. Aerkhawf, Kalizaq nuima gmnya’ni gharduq ‘*noeqjeq jankawv*’ yawhuiq heu 7 jeq-aq, nuima tiqgar yatsaq-eu mae.

- **Noeqtmqjeq** tiqjeq taef-aer Miqyaer kurngae za-awr, Yeqsur zafka legar noeqtmq-eu & shirnar-aq Miqyaer naeq-aer yajawrler malaer, kakhof-eu jeq za-euq yawduq bawgar aermawf-eu mae.

- **Mawrdo** tiqdo taef-aer, Kalizaq laer aernar-aq, yawqmaf yawqmur navluf, yawqjeuq yawqca navluf, yawqyamq yawqzir navluf Kali-euq mawrdo tiqdo-anr taef-aer taf-eu mae.

- **Muiq-eu Saflar** tiqghaq taef-aer, Kalizaq yawqghaq navluf-euq lafkhoer jawr-awr maqdurler-eu lafsawq bif-eu mae.

- **Sanqpaq Miqyaer** tiqghaq taef-aer, Kalizaq yawqghaq navluf-euq sanqpaq uqdzan ghaq-aq, Yeqsur Kali ngeurnar-aq, aqyawf-euq zaqlanrdeuq maqtsaq maqdzoeurler paq-aer maqghae-a.

- **Jan-eu jeq** tiqjeq taef-aer—Kalizaq jan-eu jeq Yaerbof jav-awr, tiqjeqnav dawqtsuif yur-eu maqdurler-eu khawf, arhunae za-euq Kalizaq jan-eu jeq durler-eu mae (Yd.1:3; 2Tms.2:2).

- **Bartirsaq mr-eu** tiqjeq taef-aer —ircuf-anr daeqpuf-eu & ircuf byavshaeq-eu, ircuf nae & miqdzaq (Yawshawr Saflar) nae laer beugar-eu khawf, Smrtif Miqyaer; Aqda Miqyaer, Zaqyo Yeqsur & Yawshawr Saflar-anr taf-eu bartirsaq mr-eu taefmae.

- **Aqda Miqyaer** tiqghaq taef-aer, tsawrhaqzaq dawqtawv luf-euq Miqyaer & Aqda—Aqda Miqyaer tiqghaq taef-aer jawr-awr, dawqtawvluf khoertav jawr-awr, dawqtawvluf lafkhoer gar mr-awr, aqdui yawqghaq navluf lafkhoer khawf jawrluf-eu mirnae, tiqda-euq zaq-aq, nuima maqgm paq-aer

maqghae-a.

C.Nuima Bigmlar-eu Lafsawq ‘5 jeq’ (Eps.4:7-11)

“⁷Kali-euq lafsawq-anr geuxni, aqdui yawqghaq navluf guiqlanq yawdzanr zataq-euq ma. ⁸Aqyawf aer-eu, “Aqyawf yawgor-anr ghofdav lerngae, bikalanr taq-euq deuq-anr sheuq dav lef-awr, tsawrhaqzaq-anr lafsawq bifnaeq-euq mae.” ⁹“Aqyawf ghofdav ler-euq” laer aer-eu-aq, mirtsaq dawqdan jeqhu irka-euq maqngneur-a lor? ¹⁰Irka-euq khoerghaq, dawqtawv luf-anr jawrbyan-eu gharduq, mq ledzeugar keuvni ghofdav ler-euq khoerghaq mae. ¹¹Aqyawf, tiqghaq nav-anr ghaqkhaer bigeuf-awr, tiqghaq nav-anr Miqyaer gharduq ngaeqdan-eu tsawrhaq bigeuf-euq mae. Tiqghaq nav-anr guiqlanq dawq maeq-eu tsawrhaq bigeuf-awr, tiqghaq nav-anr saqlaq bigeuf-euq uqtaf, tiqghaq nav-anr maeqzaq bigeuf-euq mae.”

Kalizaq yawqghaq navluf, dawqpaeq duqpur tiqgar durler-eu mirnae nuima gmnya-eu ma (Eps.4:4-6). Aerkhawf, Kalizaq nuima gm-eu gmqnya zifnya’ni, Miqyaer, aqdui Kalizaq yawqghaq navluf-anr maqdurler-eu lafsawqdeuq bifnaeq laf-eu mae (Eps.4:11). Kalizaq yawqghaq navluf, Kali-euq ‘laf sawq’ zaq-euq heu-aq, Miqyaer gharduq ngaeqdan taq-euq lof-aer za-euq jeq pyeuf-eu mae. Yeqsur Kali, mq-anr ghofdavler-awr, Yawshawr Saflar zafkale-euq nar-aq, yawjqeqnav bibyanlar-euq mae (7-10). Kalizaq armur nuima gm-eu Kalizaq armur pyeufni, ‘laf sawq’ 5 jeq bifnaeq laf-euq mae (11):

- **Ghaqkhaer**, aqdir Yeqsur-euq ghaqkhaer, Kalizaq armur-euq dawqpaeq duqpur-aq 12 ghaq jawr-eu taefmae (Mt.10:1-4; Ghkh. 1:15-22; 1Glt.9:1-2). Aerkhawf, Miqyaer nae kur-euq yawduq baw-awr nuima khaqduqni, jawrduq yawshuif-anr, Kalizaq armur maqngneur nar-aq, Miqyaer-euq gar yawshuif shuif-aer baedov-eu heu-aq, ghaqkhaer-euq gar mr-eu jeq pyeuf-eu mae.
- **Miqyaer gharduq ngaeqdan-eu**,

nymq-mr pyeufluf-eu & aqkar keuvle-eu garkawv, Miqyaer-euq danzar dan-awr Miqyaer-euq nuinoeq & dawq za-awr nae, ngaeq-eu jeq pyeuf-eu mae. Lafsawq heu za-euq deuaq-aq, Miqyaer-euq dawq aeq-awr, ghaq bif-eu gharduq mae (Ghkh.2:17-18; 11:27-28; 1Glt.14:3, 23-25). *Aqgaqbur & Pirlirpuv-eu zaqmiq 4* ghaq za-euq mae (Ghkh.21:8-11).

- ***Guiqlanqdawq maeq-eu***, Miqyaer kur-eu 2 jeq jav-eu mae; yawqghaq navluf-anr kur-eu & tsagtsov-awr kur-eu. Miqyaer Kalizaq yawqghaq navluf-anr guiqlanqdawq maeqlaer khaer-eu mae. Aerkhawf, tiqghaqlav-aq, tsagtsovnya paq-aer guiqlanq dawq maeq-eu lafsawq za-euq mae. *Pirlipuv* (Ghkh.8:4-13; 21:8).

- ***Kalizaq armur-anr bosav-eu***, yawrmaf lof-aer dur-eu Kalizaq armur-anr haw-awr pyav-eu lafkhoer Miqyaer-euq dawq-anr dawqpaeq taq-awr; sheuqghae, bidzaq bidawr, hawpir, ghaq bif, aernoq-eu gar heudeuq ya'mr-eu mae (Ghkh.20:28). Beqtuvluv (Yh. 21:15-17|Btl.5:1-15).

- ***Maeqnaeq tsovnaeq-eu*** ‘*Maeqzaq*’, Miqyaer-euq dawq—Yaerbof yawmuiq-aer povtser-awr, yawtsaq yawdawr-anr yawmuiq paq-aer ghovshaw-awr, aqcawq khawf bighovshaw nya’ni maeqnaeq tsovnaeq-eu gar nuikhanrshir-eu mae (Mt.4:23; 22:16; 1Tms. 2:12). *Aqpawrluv & Pawrluv* (Ghkh.18:24-28; 2Tms.1:11).

D.Nuima Gmnya lar-euq ngalaer Siqlar-eu ‘4 jeq’ (Eps.4:12-16)

“¹²*Heu-aq, tsawrshawr deuq-anr maeqbym-awr, Miqyaer-euq gar mr-eu mirnae, Kali-euq mawrdo bihuiq bimanr lar-eu gharduq bifnaeq laf-euq mae.*”

Miqaer, Kalizaq armur-anr aqjeqghae-eu; *ghaqkhaer*, *Miqaer gharduq ngaeqdan-eu*, *guiqlanqdawq maeq-eu*, *Kalizaq armur-anr bosav-eu* & *maeqnaeq tsovnaeq-eu* lafsawq heudeuq bifnaeq-euq ngalaer aernar-aq, *Kalizaq armur huiqlar manrlar-awr saflarpaw tsawrkhav khavlarni*, *Kalizaq Miqaer-euq gar mrnya larni*, *Kalizaq-anr bimaeqbym-eu* gharduq bifnaeq-euq mae (12). Kalizaq guiqlanq saflarpaw huiqlar manrlar-awr tsawrkhav khavlar-euq mirnae taef-aer, Kalizaq aqdir nuima gmnya-eu mae. Teumirnae, lafsawq za-euq sheuqghae-eu tsawrhaqdeuq, Kalizaq saflarpaw huiqlar manrlarni, Miqaer-euq gar mrnya larni, Kalizaq-anr ya' maeqbym-eu mae. Kalizaq huiqlar manrlar-awr saflarpaw tsawrkhav khavlar-euq ngalaer shaevdzeuf heu 4 jeq-anr nae siqlar-eu mae.

1. Kali lof-aer durlar-euq (4:13). ¹³ *Aqdui dawqtawvluf Miqaer-euq Zaqyo-anr siqnya-eu tsawrganr hawr-eu jan-eu jeq lafkhoer nuima tiqsiq taef-aer taqnya lar-awr, aerkhar maqza-eu tsawrhaq pyeuflar-eu uqtaf, Kali byan-eu lof-aer byanlarngae keuvni mr-eu gharduq mae.*” Aqdui, Kali lof-aer durlarni, kharcuiv-eu heu 4 jeq ya'anr lar-eu mae; **Tif**, *Miqaer-euq Zaqyo-anr siqnya-eu tsawrganr*; heu-aq, nan-anr nae Kali naeq-aer dawqpae taeqni cawqcawqgar aermawf-eu mae. **Nyif**, *jan-eu jeq lafkhoer nuima tiqsiq taef-aer taqnya-eu*, guiqlanq saflarpaw-euq arner zaqnanq—*jan-eu maqzif-eu tsawrhaq-aq, aqcawq naeq-aer maqgawflernya maqgmler nya-a. Smr*, *aerkhar maqza-eu tsawrhaq pyeuflar-eu*, aqcawq khoerheu laer aer-awr iqbox taqkhar maqza-eu gar aermawf-eu mae. **Oeq**, *Kali byan-eu lof-aer byanlarngae keuvni mr-eu*, heu-aq, guiqlanq saflarpaw tsawrkhav khavlar gar aermawf-eu mae (Lm.8:29).

2. Povpov lavlav-aer maqghaeni zif-eu (4:14). ¹⁴ *Khoerngae tiqjawr, aqdui, zaq maqpar pyeuf-eu uqtaf, tsawrhaq-euq tsawrganr hawr-eu jaqmyawf maershuir-euq bawqtov zmq-eu lafkhoer, kharngeur-eu dawqmaeq dawqtsov-euq jaqlaer bawlarngae, kharbawpyawr ghae-eu paw maqpyawr-ir-ar.*” Zaqaq, povpov lavlav-aer tiqkhaeq mar-eq tiqjeq, tsawqtoeq tsawqдав myaq-eu lof-aer, guiqlanq saflarpaw-euq arner zaqnanq khawf khoerlof-aer ghae-eu mae. Aerkhawf, guiqlanq saflarpaw

tsawrkhav khavlar-euq deuq-aq, *zaq maqpar pyeuf-eu uqtaf, tsawrhaq-euq tsawrganr hawr-eu jaqmyawf maershuir-euq bawqtov zmaq-eu lafkhoer, kharngeur-eu dawqmaeq dawqtsov-euq jaqlaer bawlarngae, kharbawpyawr ghae-eu paw maqpyawr-ir-a.*

3. *Gaq-awr dawrcoeni ngaeq-eu* (4:15). “¹⁵*Gaq-eu lafkhoer, yawtsaq yawdawrjeq ngaeq-awq. Khoerlof-aer nar-aq, uqduq pyeuf-eu Kali lafkhoer, yawqpaw navluf huiqlar manrlar taef-a.*”

Kalizaq tiqghaq, guiqlanq saflarpaw tsawrkhav khavlar-euq ngalaer *Gaq-eu lafkhoer, dawrcoeni ngaeq-eu* garnae siqlar-eu mae. Tsawrkhawv maqkhavlar-euq Kalizaq-aq heu 2 jeq-anr nae tiqpyawq-anr taef-aer ardzaeq irdzeur-eu mae. *Gaq-eu mirnae, laer aer-awr ngaeq paq-aer ghae-eu jeq maqngaeq, maeqpaq-aer ghae-eu jeq maqmaeq, dawrcoeni—yawtsaq yawdawr maqngaeq-eu mirnae, gaq-eu jaqmyawf pyeuf-ir-eu mae. Tiqghaqnav-aq, dawrcoeni—yawtsaq yawdawr ngaeqle, laer aer-awr coeqler deuqler paq-aer ngaeq-eu mirnae arsaq yawmuiq-aer maqsaq nya-a.*

4. *Tsoftsaf-awr huiqlar manrlar luf-eu* (4:16). “¹⁶*Aqyawf-euq lafkhoer, mawrdo dolan-aer yoeqtsuif yawqtsuif navluf nae gheutsaf-awr dzeuftaq-euq mirnae, arsaer yawqsaer navluf, yawqha-euq gar yawqha mrlufngae, mawrdo dolan-aer gaq-eu lafkhoer huiqlar manrlar luf-eu mae.*” Kalizaq yawqghaq navluf, Kali-euq mawrdo-anr tsoftsaf luf-eu arsaer deuq pyeuf-eu mirnae. Yawqha lafsawq aqjeq za-awr, arsaer aqgeujeq pyeuf-eu lealaer yawmuiq-aer siqduq-awr, aqcawq-anr khawf, yawqhar yawqha khawf noeqpoe-awr, tiqghaq tirghaq ghoer-awr gaq-eu lafkhoer gagm-awr Kalizaq armur huiqlar manrlarni, yawqha-euq lafsawq yazmq-eu mae. Arsaer yawqsaer navluf, yawqha-euq gar yawqha yawmuiq paq-aer ya'mr-eu mae.

III. Arsaq_Saq_eu_Dawq

Aqdui Kalizaq nuima gmnya'ni, Aqda Miqyaer nae laeqhmq taq-euq lof-aer Sanqpaq Yeqsur nae mrbyan-euq uqtaf, aqdui ya'mr-eu jeq yawmuiq-aer mrnya'ni, Yawshawr Saflar, aqdui-euq lafkhoer jawr-awr nae mrlufgar ghoe-awr nae mnrar-aq, Miqyaer-euq yawshaef

khanqsaer huiq-eu nuima gm-eu Kalizaq armur ya'mawr-eu mae.

Dzawdeuv 8: Yawshawr shawr-aer Daef-awq

I. Ardang Bae-eu Dawq

Yaerdawq-aq, dzaw-awr siqnya-eu gharduq taef-aer maqngneur-a, narhaqgeuf-awr daef-eu gharduq mae. Naqbawr nae narhaq-eu taef-aer maqngneur-eu, yadaefcaw-eu mae (Yk.1:22). Eps. 4:1-16 lafkhoer, Kalizaq-anr Muiq-eu Saflar-euq lafkhoer nuima gm-awr daef-awq laer aerghaq-euq nar-aq, Eps.4:17-32 lafkhoer, Kalizaq tsawroer lof-aer maqsharnoeq-aer tsawrshuif lof-aer noeq-awr (17-19), tsawrshuif-euq mrjeq sharkawv mrmr-aer daef-awq (20-32) laer maeqnaeq laf-euq mae. Teumirnae, Kali-euq lafkhoer "tsawroerghaq laevdzae yaf-awr... tsawrshuifghaq dmdav-awq!" (Eps.4:22, 24).

II.Kali-euq Lafkhoer Yawshawr shawr-aer Daef-awq (Eps.4:17-32)

A.Nuinoeq Tsawrshuif lof-aer Noeq-awq (Eps.4:17-24)

1.Nuinoeq tsawroer lof-aer taqnoeq (Eps.

4:17-19). ¹⁷*Khoermirnae, ngar, Sanqpaq Miqyaer-euq maeqshi sarkir kamq-eu lafkhoer nawmaf-anr aer-eu ma. Nawmaf, aqcawq tsawrjeuq tsawrca daef-eu lof-aer taqparadaef. Aqyawf maf-euq nuinoeq nuidur-aq, tiqjeq-iq gardanr maqtsoeq-a. ¹⁸Aqyawf maf-euq nuima myavbaef baef-ir-euq mirnae, aqyawfmaf tiqjeq-iq maqsiq nya 'ni pyeuf-ir-awr, Miqyaer nae biftaq-euq yawdaef daef-eu jeq-anr nae zanrdof kaq-ir-euq uqtaf, ghovshaw nya-eu jeq zanrtsuini pyeuf-ir-euq mae. ¹⁹Aqyawfmaf shafdawr maqbawni pyeuf-ir-awr, banq-awr muv-eu jeq mrni yawqha-euq mawrdo a'naeq-eu uqtaf, jawflafni ghae-eu jeq taef-aer mrmawf duidui-eu mae."*

Yaerbof lafkhoer 'aqcawq tsawrjeuq tsawrca' laer aerngae dawqtsuif 2 jeq jav-eu mae: Tif, Yurdav tsawrhaq maqngneur-eu yawqjeuq

yawqayawq. Nyif, Miqyaer-anr maqsiqnya-eu tsawrhaq. Yaerbof heudeuv-euq lafkhoer, “*Nawmaf, aqcawq tsawrjeuq tsawrca daef-eu lof-aer taqpar daef*” laer aertaq-euq heu-aq, Miqyaer-anr maqsiqnya-eu tsawrhaq daef-eu lof-aer taqpardaef laer aermawf-eu mae (17b).

Tsawrhaq-euq daefjeq daefkawv-aq, nuima lafkhoer anr-eu nuinoeq-anr nae ir-eu mae (Dd.4:23). Tsawrhaq tiqghaq-euq nuinoeq-aq, tsawrhaq khoerghaq-euq shaqmar mae (Dd.23:7). Aqjeqmirnae, tsawrhaq tiqghaq ‘gardanr maqtsoeqni’ daefcawv-eu ngalaer aernar-aq, “*Aqyawf maf-euq nuinoeq nuidur-aq, tiqjeq-iq gardanr maqtsoeq-eu*” mirnae mae (17c). *Gardanr maqtsoeq-eu* laer aer-eu heudawq-aq; *Maqmuiq-eu, maqpoeq-eu, yawqngaef, noeqtmq-eu arpyar & bawqtov maqjav-eu* gar aermawf-eu mae. Jawflafni ghae-eu yawqha-euq shiqshaq nuikhanr gharduq, yawkawr-aer yawkuir & yawsar yawbyawq zalarni taef-aer sharnoeq-eu nuinoeq-aq, ‘gardanr maqtsoeq-eu’ nuinoeq mae. Teumirnae, tsawrhaq tiqghaq gardanr tsoeqni daefmawf nar-aq, aqdir ‘*noeqpov noeqpar-awr*’ nae taef-aer marmarni ‘daefpov daefpar’ nya-eu mae.

Nanrma-anr maqmawrnya-eu tsawrhaq tiqghaq-aq, nanrma-euq yawshaef nae bya’ mawr naeq-euq jeq-anr khawf, maqmawr nya-a. Khoerlof-aer ghae-eu tsawrhaq-anr ‘*myavbaef*’ laer kur-eu mae. Miqyaer-anr maqsiqnya-eu tsawrhaq-aq, aqyawfmaf-euq nuima-euq myavnuiv Miqyaer-anr maqmawrnya-a. Miqyaer-anr maqmawrnya-eu tsawrhaq-aq, Miqyaer nae panmaeq naeq-euq jeq-anr khawf maqmawrnya-a (18a). Miqyaer-anr maqmawrnya-eu tsawrhaq-aq, ‘*nuima myavbaef baef-awr tiqjeq-iq maqsiqnya-eu*’ khawf, maqsiqnya-eu maqgeuf-aer, siqnya malaer noeq-eu mirnae ‘*yawlaf dawrga— aqdzawq argan*’ pyeuflar-euq mae (Lm.1:22). Khoermirnae, Miqyaer-anr bidaefmawf-eu lof-aer ‘tiqbyan tiqluf daef-eu’ (Yh.10:10), jeq-anr nae ‘*garmanr kaq-ir-awr, zanrtsuini ghae-eu*’ lafkhoer daefluf-eu mae (18). Miqyaer-anr maqsiqnya-eu tsawrhaq-aq, aqyawfmaf-euq myavnuiv-anr naef sanqpaq nae nuima-euq myavnuiv bilavbaef-awr zanrtsuini ghae-eu lafkhoer daefluf-eu mirnae (2Glt.4:3-4), ‘*shafdawr-eu maqsiqnya’ni, banq-awr muv-eu jeq mrni yawqha-euq mawrdo a’naeq-eu uqtaf, jawflafni ghae-eu jeq taef-aer mrmawf-eu*’ lafkhoer yaeqbawq saerlu-aer daefluf-eu mae (19). Aqyawfmaf, iqbax-euq lanyaq-anr tiqtiv-anr nae nar-aq, tiqtiv-anr ga’nuif-ir duidui luf-eu khawf, guvlar paq-aer, yawqha aqgeu tiv-anr jawrluf lelaer maqsiqnya-

a.

2. Nuinoeq tsawrshuif lof-aer noeq-awq (Eps.4:20-24).

„²⁰*Aerkhawf, nawmaf-aq, Kali-anr khoerlof-aer dzawgeuf-euq maqngeur-a.* ²¹*Yeqsur lafkhoer yawtsaq yawdawr anr-eu lof-aer; aqyawf nae nawmaf-anr bimaef-awr, nawmaf, aqyawf-euq dawq yagaq-euq ngeurnar-aq,* ²²*nawmaf, dzeurlafngae mr-euq yawqha-euq mrjeq sharkawv yawoer khoer laevdzae yaf-awq. Tsawroer khoerghaq-aq, jaqmyawf maershuir anr-eu nuikhanr nuilov baqda'nae cawv-ir duidui luf-eu mae.* ²³*Khoermirnae, nawmaf-euq nuima saflar, yawshuif bilavshuif-awq.* ²⁴*Nawmaf, aqdir tsaq-awr dawr-eu hawr-eu shawr-eu lafkhoer; Miqyaer-euq arghaer-anr durni baetaq-euq tsawrshuifghaq dmdav-awq.*”

Kalizaq-aq, 'noeqpov noeqpar-awr daefpov daefpar-euq' tsawrhaq pyeuf-eu mirnae, 'myavbaef lof-aer zanrtsuini ghae-eu lafkhoer, gardanr maqtsoeq-eu jeq sharnoeq sharnoeq-aer, shafdawr-eu maqbaw-eu lafkhoer, jawflafni' Miqyaer-anr maqsiqnya-eu tsawrhaq daef-eu lof-aer maqparadaef-a. Aqjeq mirnae aernar-aq, aqdui, *Kali-anr khoerlof-aer dzawgeuf-euq maqngeur* (20). Kalizaq, Yeqsur-euq garkawv dzaw-eu navmaqtser, nan-anr nae Yeqsur naeq-aer cawqcawq-eu lafkhoer, Yeqsur-anr nae yadzawgeuf-eu mae. Nawr, nan-anr Yeqsur-euq tersar narhaq narhaq-aer, Yeqsur nae, aqyawf-euq yawtsaq yawdawr bimaef lufma laq? Yeqsur Kali-euq yawrzaq-aq, Kali-euq tersar narhaq-awr (Yh.10:27), Kali-euq nuinoeq geuf-eu mae (2Glt.10:5). Yeqsur maeqgar narhaq nar-aq, aqyawf, aqdui-anr 'yawtsaq yawdawr' maeqnaeq laf-eu mae (21). Kalizaq, aqdir Kali-euq 'zaqlanr' geufle laernar-aq, *tsawroer yalaevdzae yaf-awr* (22), *nuima yabi lavshuif-awr* (23), *tsawrshuif yadmdav-eu mae* (24). Maeqtsoeq yawjawf laevdzaeu lof-aer, daefzir yawoer laevdzae yaf-awr, maeqtsoeq yawshawr dmdav-eu lof-aer daefzir yawshuif dmdav-eu heu-aq, Yeqsur Kali nae maeqnaeq laf-euq yawtsaq yawdawr-anr jan-awr hageuf-eu baqda'nae mrnya-eu mae. Nawr, nan-anr ane; *tsawroer laevdzae-awr, tsawrshuif dmdav* lufma laq? Nan-anr nae, tsawrshuif lof-aer, sharnoeq lufma laq? (2Glt.10:5; Plp.4:8).

B. Tsawrshuif-euq Mrjeq sharkawv (Eps.4:25-29)

Kakhof-eu jeq aerngae, Kalizaq-euq *saflar*-aq, *Kali nae mrshawr-euq* gar jan-euq naeq-aer *kakhof-eu jeq zaghaq-euq* ma. Aerkhawf, Kalizaq-euq *nuima* & *daefzir*-aq maqshawrjir-a siq, nan-anr nae *Yawshawr Saflar* nae yabi *lavshawr-eu* mirnae, *kakhof-eu jeq zaluf* ma (Plp.2:12-13). Mqtav mirkhanq-anr lekeuv-awr nae taef-awr *nuima*, *saflar* & *daefzir* shawrjir-awr, *yawshawr* ngar-a laer *Aqda Miqyaer* lafsawq bifnaeq laf-eu *kakhof-eu jeq za'* ma. Teumirnae, Kalizaq, mirtsaq khoertav khardaef-eu khoerkeuvni, daefzir shawrlarni, daefzir yawoer-anr khartaf-eu jeq yalaevdzae yaf-eu mae.

1. Jaqmyawf Laevdzae yaf-awq (Eps.4:25). ²⁵*Nwmaf jaqmyawf myawf-eu jeq-anr byaerzdae-awr, "Nawmaf yawqghaq navluf yawqha-euq dawqpae jawr-eu tsawrhaq naeq-aer, yawtsaq yawdawrjeq ngaeq-awq." Aqjeq mirnae aernar-aq, aqdui-aq, tiqghaq tirghaq-euq arsaer pyeuf-eu ma.* Zanrdawq khofdawq 9 dawq tiqdawq, *"Nawr, maqtsaq maqdawr-eu tsawrkaq taqgeuf"* laer aertaq-euq heu-aq *"jaqmyawf taqmyawf"* laer aermawf-eu mae. Arhu, Miqyaer-anr maqsiqnya-aer, naef sanqpaq-euq zaqkhav geufluf nga-eaq, jaqmyawf-euq zaq pyeuf-euq mae. Aqjeq mirnae aernar-aq, naef Saqdaq-aq, *'jaqmyawf-euq yawsanr & jaqmyawf-euq aqda'* mae (Yh.8:44). Khaqlaq-euq zaq khaqlaq mar-iq, jaqmyawf-euq zaq jaqmyawf mae. Jaqmyawf myawf luf-eu tsawrhaq-aq, naef Saqdaq-euq zaqma laer aer-eu gar dur-eu mae. *"... jaqmyawf myawf-eu tsawrhaq dawqtawvluf, miqdzaq hawr-eu miqdzar dzarshuir dofluf-eu lan-anr yadaq taef-a. Khoer-aq, nyiqpov tiqpov shir-eu jeq pyeuf-eu mae"* (Pm.21:8/ 22:14-15). Aqdui, Kalizaq geuflar-euq naeq-aer, jaqmyawf-anr ghawqtsaev tsaev-awr, yawtsaq yawdawr-euq zaq—Miqyaer-euq zaq & Kali lof-aer dur-eu Kalizaq pyeufar-euq ma. Yawtsaq yawdawr garma-anr canlar-euq ma (Yh.14:6). Teumirnae, Kalizaq tiqghaq tirghaq jaqmyawf maqpar myawfma nae.

2. Nuima paer-eu jeq Laevdzae yaf-awq (Eps.4:26-27). “

²⁶*Nuima*

paernya taef-a, aerkhawf iqbax taqmr." Nanrma ga'anrngae keuvni nuima paerpaer-aer taqjawr. ²⁷*Naef sanqpaq-anr jawrduq taqbif."* Nuima kharpaer-eu dawqtawvluf iqbax laertaef maqngeur-a. Teumirnae, Yaerdawq aer-eu, *"Nuima paernya taef-a, aerkhawf iqbax taqmr."*

Miqyaer khawf, nuima paer-awr (Dm.9:8, 20; Jc.2:12), Yeqsur khawf, nuima paer-eu mae (Mt.21:12-13). Kalizaq nuima paer-eu; paerpaq-aer ghae-eu jeq-anr, paerpaq-aer ghae-eu yamq-anr, paerpaq-aer ghae-eu navni paernya larni, nuima yapaer dzaw-eu mae. Iqbax maqmri, iqbaxzaq-anr maqngneur-eu, iqbax-anr nuima paernya-eu tsaqmae (Jc. 97:10). Nuima paer-eu iqbax taqbi pyeuf-ir, nuima paer-eu iqbax aqmyan pyeuf-ir lalaer aernar-aq; *Tif*, nuuima paer-eu baqda'nae iqbax mrrngae. *Nyif*, ghawqmyanrni paerpaer-aer jawrngae. *Smr*, naef sanqpaq-anr jawrduq bifngae. Teumirnae, nuima paer-eu iqbax maqbi pyeuf-ir ni, nuima maqtsaq-eu tsawrhaq naeq-aer dawq yawnanq nanq-aer ngaeq-awr (Dd.15:1), yawmuiq-aer lavtsaq-awq (Mt.5:25; 18:15). Zanrdawq khofdawq 6 dawq tiqdawq, "*Nawr, tsawrhaq-anr taqlavsae*" laer aertaq-euq heu-aq, nuima paer-awr iqbax mrgar taqbikeuv laer aermawf-eu mae. Aqjeq mirnae aernar-aq, aqdui nuima paer-eu jeq-anr maqghaqlerni, naef sanqpaq-anr jawrduq bifnar-aq, tiqghaq tirghaq lavtanq lavnar-awr safe-eu garkhawf keuvnya-eu mae (Yh.8:44).

3.Smrkhoeq Laevdzae yaf-awq (Eps.4:28). ²⁸*Dzeurlafngae, smrkhoeq khoeq-euq tsawrhaq taqpar khoeq. Mawf-eu tsawrhaq-anr bif-eu tiqjeqnav javni khawf, laejae-awr yawqha-euq aqlaf nae gar yawmuiqjeq mr-awq.*" Zanrdawq khofdawq 8 dawq tiqdawq aer-eu, "*Nawr, aqcawq-euq myawq-anr taqkhoeq.*" Maqyanr nar-aq, yawqghaq navluf smrkhoeq pyeuf-ir nya-eu mae: Dzaq-eu maqjav-eu khoedzaq-eu, javgarnae javmyaq dzaeqlarni, gar mrzaq maqlaejae-aer aryamq maqmrbyan-eu, yawsanrdeuq bifpaq-aer geux-eu lof-aer maqbif-eu... *Dzeurlafngae, smrkhoeq khoeq-euq tsawrhaq taqpar khoeq!* Miqyaer-euq tserbymr tiqbymr ngeurdzaeq taqkhoeq de-eq (Mlk.3:7-12). Maqkhoeq-eu taef-aer maqngneur-eu, *laejae-awr yawqha-euq aqlaf nae gar yawmuiqjeq mr-awq.* Garmr-eu-aq, Miqyaer-anr, yawqha-anr & aqcawq-anr muiq-eu mae—*Mawf-eu tsawrhaq-anr bif-eu tiqjeqnav jav-eu mae.* Yaerbof aer-eu, "*Gar maqmrnanr-eu tsawrhaq-anr hawq taqbidzaq*" (2Tsln.3:10).

4.Dawqdoer Laevdzae yaf-awq (Eps.4:29). ²⁹*Nawmaf-euq khaqmae-anr nae dawqdoer taqbi dovre. Yagaq-eu tsawrhaq guiqlanq yawdzanr za'ni, huiqlar manrlargar gardanr tsoeq-eu dawqmuiq ngaeq-awq.*" Nuima yawshuif za-euq tsawrhaq-aq, Miqyaer-anr taf-eu

yawmuiqjeq nuima lafkhoer shardawv-eu mirnae, dawq ngaeqngae, dawqdoer maqngeur-eu dawqmuiq taef-aer ngaeqdov laf-eu mae. Aqjeq mirnae aernar-aq “*nuima lafkhoer tiqbyan anr-eu lof-aer dawq ngaeqdov laf-eu mae*” (Mt.12:34). Kalizaq-aq, *mirtsaq-euq saqdeuf* pyeufklar-euq mirnae (Mt.5:13), dawq ngaeqngae, byawqsharni maqnarhaqmuiq paq-aer maqghaeni, gardanrtsoeq-eu *saqdeuf dawvkuir taq-euq dawq* ngaeqnya-eu mae (Gls.4:6/ Dd.15:23; 25:11). Saqdeuf-aq gardanr tsoeq-eu mae!

5.Yawshawr Saflar-euq nuima cawvpaq-aer taqmr (Eps.4:30).

“³⁰*Miqaer-euq Yawshawr Saflar nuima cawvpaq-aer taqmr. Miqaer, Yawshawr Saflar-anr ghoe-awr nawmaf-anr kakhof naeqlaf-eu arnan gharduq, jmq diqtaq-euq mae.*” Kalizaq-euq daefzir lafkhoer maqmuiq-eu jeq muiqlar parlar-euq dawqtawvluf & parbi muiqdav larni lavmuiq lavpar luf-eu, daefzir lavshawr luf-eu ghaq-aq, aqdui Kalizaq geufklar-euq nar-aq, yawqgar navluf yawqjawr navluf aqdui naeq-aer jawr-eu Yawshawr Saflar mae. Yawshawr Saflar, aqdui naeq-aer jawr-awr baoq bifnaeq laf-awr (Ghkh.1:8), lafsawq bifnaeqlaf-eu uqtaf (Lm.12:6-8; 1Glt.12:8-10), Saflar-eu arsiq bisiqle naeqlaf-eu mae (Glt.5:22-23). Teumirnae, “*Yawshawr Saflar nuima cawvpaq-aer taqmr.*”

6.Nuima maqmuiq-eu jeq Laevdzae yaf-awq (Eps.4:31).

“³¹*Nawmaf, nuima khaqjawfni ghae-eu jeq, nuima baw-eu jeq, nuima paer-eu jeq, pyaerdzaq-eu jeq, dawqdoer ngaeq-eu jeq hawr-eu, aqcawq-anr coeqler civlerni janrmawf-eu yawqjeq navluf, nawmaf-euq lafkhoer nae byaerdzae jir-awq.*” Shaevdzeuf yawdoer *Tif, nuima khaqjawfni ghae-eu jeq*—iqbax maqpyaeq-aer yawdoer janrkhof mawf-eu, *Nyif, nuima baw-eu*—nuima maqsar miqdzaq dof-eu lof-aer lanrluf-eu, *Smr, nuima paer-eu*—nuima cawv-awr lavtanq lanar lavsaef lavbyov mawf-eu, *Oeq, pyaerdzaq-eu*—aqcawq-anr gurghaq khavghaq-eu laer pyawq-eu, *Ngaq, dawqdoer ngaeq-eu*—aqcawq-anr coeqler deuqlerni ngaeq-eu, *Kof, aqcawq-anr coeqler civlerni janrmawf-eu*—nuima lafghof baw-eu. Kalizaq, nuima maqmuiq-eu, naef sanqpaq & tsawroer-euq shaevdzeuf heudeuq byaerdzae yaf-awr, laevdzae yaf-awr, Kali-eu shaevdzeuf ghawqshaqqaq-awr iqbax pyaeq-eu jeq, nan-anr nae dmdav-eu tsaqmae.

7.Ghawqshaqqaq-awr iqbax pyaeq-eu jeq Dmdav-awq (Eps.

4:32).

“³²*Kali lafkhoer, Miqyaer, nawmaf-anr iqbox pyaeqnaeq-euq lof-aer, nawmaf khawf tiqghaq tirghaq gahwqshaqgaq-awr, nuima nanqyuni ghae-eu lafkhoer, tiqghaq tirghaq iqbox pyaeq-awq.*” Shaevdzeuf yawmuiq; *Tif, gahwqshaq gaq-eu*—noeqgaq-eu mirnae yawshaq-anr teufar-eu, *Nyif, nuima nanqyuni ghae-eu*—Miqyaer-anr taqhuiq-awr aqcawq-anr noeqpoeq noeqmuiq-eu, *Smr, iqbox pyaeq-eu*—yawdoer-anr yawdoer maqpar aer-aer, yawlaeq-anr yawlaeq laer maqparsawxni, dzirdzov sivbyov jir-eu. *Ghawqshaqgaq-awr, nuima nanqyuni ghae-eu & iqbox pyaeq-eu* Kali & tsawrshuif-euq shaevdzeuf yawmuiq heu 3 jeq-aq, *nuima khaqjawfni ghae-eu jeq, nuima baw-eu jeq, nuima paer-eu jeq, pyaerdzaq-eu jeq, dawqdoer ngaeq-eu jeq hawr-eu, aqcawq-anr coeqler civlerni janrmawf-eu* tsawroer-euq shaevdzeuf yawdoer heu 6 jeq-anr ghaqler-eu mae.

III. Aarsaq_Saq_eu_Dawq.

Nawr, nan-anr nae sharnoeq sharsawx-eu tsawroer lof-aer maqngeur-eu, tsawrshuif lof-aer sharnoeq-awr; tsawroer-anr taf-eu jeq laevdzae-awr tsawrshuif-anr taf-eu jeq dmdavluf malaq? “*Yawshawr Saftar nuima maqbicawv paq-aer*” tsawroer-anr taf-eu; jaqmyawf, nuima paer-eu, smrkhoeq, dawqdoer & nuima maqmuiq-eu jeq laevdzae yaf-awq. Khoernar-aq, “*iqghaq tirghaq gahwqshaq gaq-awr, nuima nanqyuni ghae-eu lafkhoer, tiqghaq tirghaq iqbox pyaeq-awq.*”

Dzawdeuv 9: Aqda Miqyaer-anr Daefcaw-awq

I. Ardang_Bae_eu_Dawq.

“*Khaqlaq-euq zaq khaqlaq*” ngeurnar-aq, aqdir Miqyaer-euq zaq-aq, Miqyaer-anr yadur-eu mae. “¹*Nawmaf-aq, Miqyaer zawrgaq-eu zaqdeuq pyeuf-eu mirnae, Miqyaer mr-eu lof-aer mrcaw-eu tsawrhaq pyeufar-awq*” (Eps.5:1). Zaq-aq, aqda lof-aer pyeufmawf-awr mrmawf-eu gar durni, aqdui, Miqyaer-euq zaq khawf, Miqyaer lof-aer pyeuf mawf-awr, mrcaw gar Miqyaer nuima tsaq-eu mae. Khoermirnae; Miqyaer, **gaq-eu jeq** pyeuf-eu mae (1Yh.4:8), gaq-eu lafkhoer daef-awq (Eps.5:1-2). Miqyaer, **yawshaef** pyeuf-eu mae (1Yh.1:5), yawshaef-euq zaq lof-aer daef-awq (Eps.5:3-14). Miqyaer, **yawtsaq yawdawr** pyeuf-eu

mae (1Yh.5:6), zaqsiq tsawrganr anr-eu tsawrhaq lof-aer daef-awq (Eps. 5:15-17). Miqyaer-aq, ***muiq-eu Saflar*** pyeuf-eu mae (Yh.4:23-24), Yawshawr Saflar tiqbyan'ni daef-awq (Eps.5:18-21).

I.Aqda Miqyaer-anr Daefcaw Mrcaw-awq (Eps.5:2-21)

A.Gaq-eu Lafkhoer Daef-awq (Eps.5:2) ²*Kali, aqdui-anr gaq-awr, aqyawf-euq mawrdo, Miqyaer-anr damqnaeq-eu jeq hawr-eu lawrnaeq-eu yawsawjeq lof-aer aqdui-anr bifnaeq laf-euq mae. Khoermirnae, nawmaf khawf gaq-eu lafkhoer daef-awq.*”

Aqjeq mirnae, Kalizaq ***'gaq-eu'*** lafkhoer daef-eu tsaqla laer aernar-aq; *Tif, Miqyaer-euq zaq* pyeuf-lar-awr, Miqyaer-euq shaevdzeuf zadzeur-euq minae, gaqnya lar-euq ma (2Btl.1:4). *Nyif, Miqyaer zawrgaq-eu zaq* pyeuf-lar-euq ma (Eps.5:1). Miqyaer, Yeqsur-anr gaq-eu lof-aer aqdui-anr gaq-awr (Yh.17:23), “*Ngar zawrgaq-eu ngaq-euq Zaqyo*” laer kurluf-eu mae (Mt.3:17). *Smr, Kali gaq-eu arpoeq bif-awr* aqdui-anr zeurkhof naeqlaf-eu mae (Yh.15:13; Eps.5:2). *Oeq, muiq-eu Saflar za-euq* arsiq siqle-eu jeq pyeuf-eu mae (Glt.5:22). *Ngaq, Miqyaer-euq zanrdawq khofdawq* dawqtawvluf mrbyan-eu jeq pyeuf-eu mae (Mt. 22:37-40; Lm.13:8). *Kof, Miqyaer, aqdui-anr jeqhu gaq-euq mirnae,* aqdui khawf, Miqyaer-anr gaq-awr aqcawq-anr khawf, gaqnya lar-euq ma (1Yh.4:19). *Shif, Yeqsur, aqdui-anr gaq-awr shirdan-euq mirnae,* aqdui gaq-eu jeq siqnya lar-awr, aqduiq, aqcawq-eu gharduq shirdan-eu tsaqmae (1Yh.3:16). “*Khoermirnae, nawmaf khawf gaq-eu lafkhoer daef-awq*” (Eps.5:2).

B.Yawshaef-euq Lakhoer Daef-awq (Eps.5:3-14)

1.Yawzandr-euq zaq lof-aer jawflafni taqdaef (Eps.5:3-7)

1.1 Aqdui 'Tsawrshawr—Kalizaq' pyeuf-lar-euq mirnae,

yawzandr-euq zaq lof-aer maqpar yadaef-a (Eps.5:3-4). ³*Nawmaf-aq, tsawrshawr pyeuf-eu gar tsaqni, maqbar-eu gar banq-awr joe-eu, maerjuir juir-eu hawr-eu jawflafni ghae-eu garkawv, nawmaf-euq yawkaq ja-eu taef-aer khawf taqjadov.* ⁴*Jawflafni ghae-eu dawq, aqdzawq argan-euq dawq hawr-eu caeflaef ka'nixgha-eu dawq heudeuq, nawmaf tiqpawf-iq ngaeq-eu maqtsaq-a. Miqyaer-anr jaceuq-eu dawq taef-aer ngaeq-eu tsaqmae.*”

Heugar, yawzandr-euq zaqdeuq mr-eu iqbox 2 pyawq aerkeuv taq-euq

mae; **Tif**, aqdui Kalizaq *ja-eu taef-aer khawf* jadov paq-aer maqghae-eu, aqbur aqli-euq garkawv: 1. *Maqbar-eu gar banq-awr joe-eu*, 2. *maerjuir juir-eu*, 3. *jawflafni ghae-eu* garkawv. **Nyif**, aqdui Kalizaq *tiqpawf-iq ngaeq-eu maqtsaq-eu* jeq: 1. *Jawflafni ghae-eu dawq*, 2. *aqdzawq argan-euq dawq*, 3. *caeflaef ka'nixgha-eu dawq heudeuq* garkawv. Kalizaq, yawzanr-euq zaq lof-aer maqdaefni, iqbox heu 2 pyawq-anr ghaqlerni, *Miqaer-anr jaceuq-eu dawq taef-aer ngaeq-eu tsaqmae*. Miqaer-anr jaceuq ngaе, Miqaer uvlanr le-eu mae (Jc.22:3).

1.2 Yawzanr-euq zaq lof-aer daefnar-aq, Miqaer uvlanr-eu

lafkhoer jeqbir maqza-a (Eps.5:5-7). “⁵ *Aqjeq mirnae aernar-aq, maqbar-euq gar banq-awr joe-eu tsawrhaq, maqshawr-eu tsawrhaq, maerjuir juir-eu tsawrhaq hawr-eu, tanqpanq aqma mawrkawr-anr uqduq tanq-eu tsawrhaq-aq, Kali hawr-eu Miqaer uvlanr-eu lafkhoer jeqbir maqza nya-a laer nawmaf siqnya-eu mae.* ⁶ *Gardanr maqtsoeq-eu dawq zmq-awr tiqghaq nae-iq nawmaf-anr maershuir taqbi shuirtawvlar. Aqjeq mirnae aernar-aq, heudeuq baqda nae Miqaer nuima paerdui dui-eu jeq, maqnarhaq geuf-eu tsawrhaq-euq khoertav keuvle taef-a.* ⁷ *Khoermirnae, nawmaf khoerlof-aer ghae-eu tsawrhaq naeq-aer taqgmler.*”

Yawzanr-euq zaq lof-aer daef-eu tsawrhaq; 1. *maqbar-euq gar banq-awr joe-eu tsawrhaq*, 2. *maqshawr-eu tsawrhaq*, 3. *maerjuir juir-eu tsawrhaq*, 4. *tanqpanq aqma mawrkawr-anr uqduq tanq-eu tsawrhaq-aq*, iqnan, Kali nae maqbi uvlanr lufnga laer byacaeni mawrlar-eu mae. Heulof-aer ghae-eu tsawrhaq, maqnoeqpov maqnoeqpar nar-aq, aqkar karzir mqtav mirkhanq-anr maqya jawrlar—Miqaer uvlanr-eu lafkhoer maqya urler-eu uqtaf, Miqaer nuima paer-eu jeq, aqyawfmaf-euq khoertav keuvle-awr—shiqbuir lanma-anr ya'ir-eu mae. Kalizaq malaer aer-eu khawf, iqbox heudeuq-euq zaqkhav geufluf-eu tsawrhaq-aq, Miqaer-euq jeqbir maqza-a. Khoermirnae, *Gardanr maqtsoeq-eu dawq zmq-awr tiqghaq nae-iq nawmaf-anr maershuir taqbi shuirtawvlar*. Iqnan, jawwflafni ghae-eu, aqbur aqli garkawv, khaqmiqsheu-eu garkawv Miqaer-anr maqjan-eu hawr-eu TV, CD, DVD, internet, sanqbof, sarlmq—naqgaq, ... pawnae larluf-eu mae. Maqyanr nar-aq, yaw'awq-aer nyawqler-awr zaqkhav pyeuf-ir nya-eu mae. *Khoermirnae, nawmaf khoerlof-aer ghae-eu jeq-euq maeqnan cantae-eu tsawrhaq naeq-aer taqgmler.*

2.Yawshaef-euq Zaq lof-aer Daef-awq (8-10) ⁸*Dzeurlafngae, nawmaf yawzanr pyeuf-euq khawf, nymq-mr-aq, Sanqpaq Miqyaer-euq lafkhoer yawshaef pyeuf-lar-euq mae. Khoermirnae, yawshaef-euq zaq lof-aer daef-awq.* ⁹*(Aqjeq mirnae aernar-aq, muiq-eu Saflar-euq arsiq-aq, tsaq-awr dawr-eu jeq, yawtsaq yawdawrjeq hawr-eu yawmuiqjeq dawqtawv luf-euq lafkhoer anr-eu mae.)* ¹⁰*Nawmaf, Sanqpaq Miqyaer nuima tsaq-eu jeq aqjeq ngalaer povduq-awq.*”

Kalizaq, dzeurlafngae, yawzanr-euq lafkhoer daef-euq taef-aer maqngeur-eu, yawzanr pyeuf-euq khawf; nymq-mr-aq, Kalizaq pyeuf-lar-awr, Kali yawshaef pyeuf-eu lof-aer (Yh.9:5), yawshaef-euq lafkhoer canlar-euq taef-aer maqngeur-eu yawshaef pyeuf-lar-euq mae “*Nawmaf-aq, mirtsaq-euq yawshaef mae...*” (Mt.5:14-16). “*Sanqpaq Miqyaer-euq lafkhoer yawshaef pyeuf-lar-euq mae*” (Eps.5:8).

Khoermirnae, *yawshaef-euq zaq lof-aer* yadaef-eu mae. Yawshaef-euq zaq lof-aer daefnar-aq, muiq-eu Saflar-euq arsiq heudeuq siqle-eu mae; *1.tsaq-awr dawr-eu jeq*—Miqyaer naeq-aer tsaq-awr daefzir dawrcoeni daef-eu, *2.yawtsaq yawdawrjeq*—maqpv maqpar larni yawqgar navluf yawqjavr navluf tsaq-awr ngeur-eu jeq, *3.yawmuiqjeq dawqtawvluf*—Miqyaer nuikhanrshir-eu jeq. Kalizaq geuf-awr, ircuf shawr, uqduq tanqnymr-anr ir-eu taef-awr maqngeur-eu; yawshaef pyeuf-awr, yawshaef-euq arsiq siqlegar Miqyaer nuima tsaq-eu maelaer povduq-awq (10).

3.Yawzanr-anr maqgm lerni yawshaef pyeuf-lar-awq (11-14)

“¹¹*Yawzanrjeq naeq-aer gardanr maqtsoeq-eu gar mrgar maqgm ler-aer, gar khoer yawbya-anr bidov lar-awq.* ¹²*Aqyawfmaf barzaf-anr mrkhoeq luf-eu khoerdeuq-aq, ngaeqkeuv-eu taef-aer khawf, shafdawrlar paq-aer ghae-eu mae.* ¹³*Aerkhawf, yawbya-anr bidov lar-euq yawqjeq navluf, yawshaef baqda 'nae byacaevni mawrlar-eu mae. Aqjeq mirnae aernar-aq, byacaevni bimawr lar-eu jeq-aq, yawshaef mae.* ¹⁴*Khoermirnae, aqyawf aer-eu, “Yufkhav taq-euq tsawrhaq-or, noeqlar-awr, shir-euq garnae ghofdaef lar-awq. Kali, nawmaf-anr yawshaef bya 'naeqlaf taef-a.”*”

Yawshaef-euq zaqdeuq, yawzanrjeq naeq-aer gardanr maqtsoeq-eu gar

mrgar maqgm ler-eu taef-aer maqngurni, yawzanr-euq yawdoer yawbya-anr bidov larni yatoeq maeqnaeq nya-eu mae (11). Jabu jadoer-eu gar maqgmler-eu taef-aer maqngneur-eu, jabu jadoer-eu maqmuiq ngalaer yatoeq maeqnaeq-eu mae. Yawzanr-euq zaqdeuq ngaeqkeuv-eu taef-aer khawf, shafdawrlar paq-aer ghae-eu jeq barzaf-anr mrkhoeq luf-eu mae. Heulof-aer ghae-eu jeq jav-eu mirnae taqcaevbyov, yawdoer-anr lavbyov-eu laer maqngneur-aq, tsawrdoer-anr lavbyov-eu laer taqjanr. Yawbya-anr bidov larni “gaq-eu lafkhoer yawtsaq yawdawr ya ’ngaeq-eu mae” (Eps.4:15). Yawbya-anr bidovlar-awr yawshaef bipyeuf larni, Miqyaer, Kalizaq malaer aer-eu khawf, yawzanr lafkhoer canluf-eu deuq-anr hawr-eu Kalizaq maqngneur-eu deuq-anr khawf heulof-aer kurluf-eu mae; “Yufkhav taq-euq tsawrhaq-or, noeqlar-awr, shir-euq garnae ghofdaef lar-awq. Kali, nawmaf-anr yawshaef bya ’naeqlaf taef-a.”

C.Zaqsiq tsawrganr Anr-eu Lafkhoer Daef-awq (15-17)

¹⁵*Khoermirnae, nawmaf yanryanr-aer daef-awq. Aqdzawq argan lof-aer maqngneur-eu, zaqsiq tsawrganr anr-eu tsawrhaq lof-aer daef-awq.*

¹⁶*Nymq-mr-euq arnan aryamq-aq, doerdui dui-eu mirnae, aryamq-anr dzoeqdzaq yawmuiq-aer mr-awq. ¹⁷Khoermirnae, maqganr-eu tsawrhaq taqgeuf. Sanqpaq Miqyaer nuima tsaq-eu aqjeq lalaer ghovshaw nya-awq.*

Miqyaer, aqdui yawshaef-euq zaqdeuq-anr maqganr maqyanr-aer, zaqsiq tsawrganr maqanr-eu tsawrhaq lof-aer maqbi daefni. *Yanryanr-aer daef-awq. Aqdzawq argan lof-aer maqngneur-eu, zaqsiq tsawrganr anr-eu tsawrhaq lof-aer daef-awq* laer yawkhav-aer aernoeq naeqlaf-eu mae (15).

Aqdzawq argan lof-aer maqngneur-eu yanryanr-aer zaqsiq tsawrganr anr-eu tsawrhaq lof-aer daef-eu tsawrhaq-aq, heu 2 jeq-anr nae siqlar-eu mae: *Tif, aryamq-anr dzoeqdzaq mrnya-eu* (16), arnan aryamq-aq, tsawrhaq-euq daefzir-anr nae poequid dui-eu jeq pyeuf-awr, zaqsiq tsawrganr anr-eu tsawrhaq-aq, dzoeqdzaq mr-awr zmqpoeq nya-eu mae. *Nyif, Sanqpaq Miqyaer nuima tsaq-eu jeq ghovshaw-eu* (17), Miqyaer nuima tsaq-eu jeq ghovshaw-eu laer aer-eu heu-aq, siqnya-eu taef-aer

maqghaqni mrcaw-eu gar aer-eu mae. Ghawqmyaghaq, Miqyaer nuima tsaq-eu jeq siqnya-eu khawf, maqmrcaw-eu mirnae, Miqyaer nuima tsaq-eu jeq maqghovshaw-euq ngalaer aernya-awr, maqghovshaw-eu mirnae *maqganr-eu tsawrhaq* ngalaer aernya-eu mae. Siqnya-awr mrcaw-eu tsawrhaq-aq, ghovshaw-euq ngalaer aernya-awr, zaqsiq tsawrganr anr-eu tsawrhaq laerkhawf, sawxnya-eu mae. Siqnya-eu khawf, maqmrcaw-eu tsawrhaq-aq, maqganr maqyanr-eu taef-aer maqngeur-eu, iqbox mrluf-eu jeq khawf, pyeuf-eu mae (Yk.4:17).

D.Yawshawr Saflar Tiqbyan’ni Daef-awq (18-21) ¹⁸*Jirbaq taqdawryaef. Dawryaef nar-aq, yawuq uq-ir nya-eu mae. Aerkhawf, nawmaf-euq lafkhoer muiq-eu Saflar bibyan lar-awq.* ¹⁹*Nawmaf, tiqghaq tirghaq ngaeqcawqngae, jaceuq-eu dawq, jaceuq-eu cardawq hawr-eu saflar paw-euq cardawq nae ngaeqcawq-awq. Nuima lafkhoer keuvni carcar-aer Sanqpaq Miqyaer-anr jaceuq-awq.* ²⁰*Aqdui-euq Sanqpaq Yeqsur Kali-euq tsawrmyanr-anr ghoe-awr, aqmyanluf yawqjeq navluf lafkhoer, Aqda Miqyaer-anr jaceuq-awq.* ²¹*Miqyaer-anr yawzeu baw-eu lafkhoer, tiqghaq-euq lafov tiqghaq yawmuiq-aer jawr-awq.”*

Yawshaef-euq zaq-aq, Yawshawr Saflar tiqbyan’ni daef-eu tsaqmae. *“Nawmaf-euq lafkhoer muiq-eu Saflar bibyan lar-awq.”* Aqdui, Kalizaq geufnarngae, Yawshawr Saflar za-euq ma (1Glt.12:13). Aerkhawf, muiq-eu Saflar tiqbyan’ni daefnya’ni, nan-anr nae bishaev byanbyan-aer yadaef-eu mae (Ghkh.2:4; 10:44-48; 11:15-17; 19:1-7). Yawshawr Saflar tiqbyan’ni daef-eu tsawrhaq-aq, guiqlanq dawq maeq-awr sarkirkamq-eu baoq anr-eu mae (Ghkh.1:8; 4:8, 31; 6:3, 5; 7:55; 13:9). Teu’uqtaf; Yawshawr Saflar tiqbyan’ni daef-eu tsawrhaq heudeuq-anr nae khawf siqlar-eu mae; *jirbaq maqdawryaef, laqkhaq caertavni carcar-aer jaceuq-eu hawr-eu yawqjeqnav lafkhoer Aqda Miqyaer-anr jaceuq nya-awr tiqghaq-euq lafov tiqghaq yawmuiq-aer jawrnya garnae siqlar-eu mae.*

• **Jirbaq maqdawryaef-a (18).** Jirbaq dawrnyawq taq-awr dawryaef-eu tsawrhaq-aq, jirbaq-euq zaqkhav pyeuf-ir-eu mae. *Dawryaef nar-aq, yawuq uq-ir nya-eu mae.* Tsawrhaqzaq dzaqnyaw-awr dawryaef-eu maqmuiq-eu jeq, jirbaq taef-aer maqngeur-eu, ghawqmyawjeq dzaqnya-awr dawryaef nya-eu mae; Yakhawq, yapir, yabax, pyur, aqbur aqli,

baoq... Aqdir, Yawshawr Saflar tiqbyan'ni daef-eu tsawrhaq-aq, yawcaf yawnuiv, yawdoer yawcawv heudeuq-anr ghaqler-eu uqtaf; *gaq-eu, laqkhaqcaer-eu, nuisar of-eu, nuinoeq ghawqmanrni noeq-eu, ghawqshaqgaq-eu, yawmuiqjeq mr-eu, sarjax zif-eu, nuima nanqyuni ghae-eu hawr-eu yawqha-euq nuima-anr ghaqler-eu* arsiq heudeuq, Yawshawr Saflar-euq arsiq heudeuq siqle-eu gar ya'mawr-eu mae (Glt.5:22-23).

• **Laqkhaq caertavni carcar-aer jaceuq-eu mae (19).** Miqyaer naeq-aer yawmuiq-aer tsoftsaf-awr ngaeqcawq nya-eu lof-aer, aqcawq-anr yawmuiq-aer ngaeqcawq nya-eu mae. Miqyaer naeq yawmuiq-aer tsoftsafluf ngar-a laer heulof-aer siqlar-eu mae: *Tif, jaceuq-eu dawq*—Jaceuq-eu sanqbof lafkhoer jaceuq-eu lof-aer tersar lavmanr-eu keuka zmqzmq-aer jaceuq-eu (Jc.150). *Nyif, jaceuq-eu cardawq*—tersar lavmanr-eu keuka maqzmqni, tersar ghawqmyajeq bir-awr nae car-eu cardawq (Jaceuq-eu pardmq). *Smr, saflar paw-euq cardawq*—yawshuif shuif-aer yawluiv luiv-aer ghae-eu, Miqyaer-euq yawhuiq & yawmuiq-anr jaceuq-eu sarkirkamq-eu cardawq. Yawshawr Saflar tiqbyan'ni daef-eu tsawrhaq-aq, aqdir Miqyaer-anr uquduqtanq-awr (Yh.4:23-24), *nuima lafkhoer keuvni carcar-aer Sanqpaq Miqyaer-anr jaceuq-eu mae.*

• **Yawqjeqnav lafkhoer Aqda Miqyaer-anr jaceuq nya-eu mae (20).** Yawshawr saflar tiqbyan'ni daef-eu tsawrhaq-aq, Miqyaer-anr gaq-eu tsawrhaq deuq-eu gharduq yawqjeq navluf-euq lafkhoer nae yawmuiqjeq bidovlar-eu mae laer siqnya-eu mirnae (Lm.8:28), *Sanqpaq Yeqsur Kali-euq tsawrmyanr-anr ghoe-awr, aqmyanluf yawqjeq navluf lafkhoer, Aqda Miqyaer-anr jaceuq nya-eu mae.* Shaqzanq-aq, tsawrhaq-anr lavmuiq lavdoer-eu maqngeur-eu, tsawrhaq-euq yawmuiq yawdoer panmaeq naeq-eu jeq pyeuf-eu mae. Kalizaq tiqghaq, Yawshawr Saflar tiqban'ni daefluf ngalaq laer, shaqzanq keuvlengae siqzdae q lar-eu mae. Yawshawr Saflar tiqbyan'ni daef-eu tsawrhaq-aq, shaqzanq keuvlengae, Miq-anr jaceuq nya-eu mae.

• **Tiqghaq-euq lafov tiqghaq yawmuiq-aer jawrnya-eu mae (21).** Yawshawr saflar tiqbyan'ni daef-eu

tsawrhaq-aq, yawqhaq-euq ardeuv artiv siqnya-awr, *Miqyaer-anr yawzeu baw-eu lafkhoer, tiqghaq-euq lafov tiqghaq yawmuiq-aer jawrnya-eu mae*: Khaqdzerzaq, aqma aqdadeuq & gar mrduq yaw-sanrdeuq, Sanqpaq Yeqsur-euq lafov yawmuiq-aer jawrnya-awr, zaqmiqzaq-aq, khaqdzerzaq-euq lafov yawmuiq-aer jawrnya-awr (Eps.5:22-33), zaqdeuq, aqma aqda-euq lafov yawmuiq-aer jawrnya-eu uqtaf (Eps.6:1-4), zaqkhawf, gar mrduq-euq yaw-sanr deuq-eu uqmov yawmuiq-aer jawrnya-eu mae (Eps.6:5-9).

III. Arsaq_Saq_eu_Dawq

Nawr, Aqda Miqyaer-euq zaq pyeuf-eu ngeurnar-aq, Aqda Miqyaer-anr yawmuiq-aer daefcaw lufma laq?

Dzawdeuv 10: Miqsawr Yozaq-euq Arduq Arzar

I. Ardanq_Bae_eu_Dawq

Yaerdawq, “*Miqyaer-anr yawzeu baw-eu lafkhoer, tiqghaq-euq lafov tiqghaq yawmuiq-aer jawr-awq*” (Eps.5:21), laer maeqnaeq laf-euq mirnae, Kalizaq-euq zawfjir, miqsawr yozaq-aer daeftaf-eu; khaqdzerzaq-aq, Yeqsur Kali-euq lafov yawmuiq-aer yajawr-awr, miqzaq ghaq-aq, khaqdzerzaq-euq uqmov yawmuiq-aer yajawr-mae (Eps.5:22-33).

IV. Miqzaq Hawr-eu Khaqdzerzaq Daeftaf-eu (Eps.5:22-33)

A. Zaqmiqzaq, Khaqdzerzaq-euq Lafov jawr-awq (22-24)

“²²*Miqzaq deuw-or, Sanqpaq Miqyaer-euq uqmov jawr-eu lof-aer yawqha-euq khaqdzerzaq-euq lafov yawmuiq-aer jawr-awq.* ²³*Aqjeq mirnae aernar-aq, Kali-aq, Kalizaq armur-euq uqduq pyeuf-awr, aqyawf-euq mawrdo pyeuf-eu Kalizaq armur-anr Kakhof-eu ghaq pyeuf-eu lof-aer khaqdzerzaq-aq, miqzaq deuw-euq uqduq pyeuf-eu mae.* ²⁴*Khoermirnae, Kalizaq armur Kali-euq uqmov jawr-eu lof-aer, miqzaq deuwkhawf, yawqjeq navluf lafkhoer, yawqha-euq khaqdzerzaq-euq lafov yajawr-eu mae.*”

Kalizaq-euq zawfjir-euq arduq arzar hawr-eu ardeuv artiv-anr aerngae, zaqmiqzaq-euq jawrduq jawrzar-aq, khaqdzzeriaq-euq lafov yajawr-eu mae. Heu-aq, zaqmiqzaq-aq, maqpoeq-aer yawteq teqdzaeq-eu mirnae maqngeur-a, nuinyir nyir-eu jeq maqngeur-a. *‘Manq tiqmawr-anr tsawrhaq nyiqghaq dziqnar-aq, tiqghaq narkhanpaw yadziq-eu’* lof-aer durni, Miqyaer nuima tsaq-eu lof-aer jawrduq jawrzar biftaq-euq jeq pyeuf-eu mae. Miqzaqdeuq, khaqdzzeriaq deuq-euq lafov aqjox-aer yajawr-eu lalaer aernar-aq, *Tif, Sanqpaq Miqyaer-euq uqmov jawr-eu lof-aer* (22). *Nyif, uqduq-euq uqmov mawrdo pyeuf-awr, Kali-euq uqmov Kalizaq armur jawr-eu lof-aer* (23-24). Teumirnae, miqzaq deuq yawqha-euq khaqdzzeriaq-euq lafov jawrnya’ni, Miqyaer-euq dawq narhaq geuf-awr, Kali-anr ghoe-awr daef-eu lafkhoer Miqyaer & Kali-euq uqmov maeqhuq yajawr nya-eu mae. Miqyaer-euq uqmov yawmuiq-aer jawr-eu zaqmiqzaq-aq, khaqdzzeriaq-euq lafov jawr-eu maqshaq-a. Aerkhawf, Kali-anr uqduq maqbi pyeuf-euq zaqmiqzaq-aq, khaqdzzeriaq-euq lafov yawmuiq-aer maqjawrnya-a. Heu baqda’nae, Kalizaq cawq yurbawngae, Kalizaq yawkaq taefa-aer yur-eu tsaqmae. *“Kali-anr maqjan-eu tsawrhaq-anr taqgawf”* (2Glt.6:14-18).

B.Khaqdzzeriaq, Zaqmiqzaq-anr Gaq-awq (25-32)

²⁵ *Khaqdzzeriaq deuq-or, Kali, Kalizaq armur-anr gaq-awr, aqyawf-euq mawrdo bifnaeq-euq lof-aer, yawqha-euq miqzaq-anr gaq-awq.*

²⁶ *Kalizaq armur-anr lavshawr-awr tsiqshawr-eu laer, ircuf nae tsiqshawr-eu lof-aer, Yaerdawq-anr ghoe-awr shawr-euq mae.* ²⁷ *Khoer-aq, marbyawf marnar tiqjeq-iq maqbaw-aer, aerkhar maqza-eu uqtaf, shawrjaevni ghae-awr, yawshaef khanqsaer byan-eu Kalizaq armur pyeuf-awr, aqyawf-anr bi’a naeq-eu gharduq mae.* ²⁸ *Khoerlof-aer durni, khaqdzzeriaq deuqkhawf, yawqha-euq mawrdo-anr gaq-eu lof-aer, yawqha-euq miqzaq-anr gaq-eu tsaqmae. Yawqha-euq miqzaq-anr gaqnar-aq, yawqhar yawqha gaq-eu mae.* ²⁹ *Tsawrhaq tiqghaq-iq yawqha-euq mawrdo-anr maqbyae-eu uqtaf, yawmuiq-aer bidzaq bidawr-awr ngaeqghae-eu mae. Sanqpaq Yeqsur khawf, khoerlof-aer durni, Kalizaq armur-anr bosav-eu mae.* ³⁰ *Aqjeq mirnae aernar-aq, aqdui-aq, aqyawf-euq mawrdo-euq arsaer pyeuf-awr, aqyawf-euq*

shiqshaq hawr-eu aqyawf-euq shaqyoeq deuqma. ³¹ “*Khoermirnae, khaqdzerzaq-aq, yawqha-euq aqma aqda-anr nae ghawq-ir-awr, yawqha-euq miqzaq naeq-aer gawf-ir-eu lafkhoer, nyiqghaq khawf tiqghaq taef-aer pyeuflar-eu mae.*” ³² *Heu-aq, zaftaq-euq huiqdui dui-eu tiqjeq pyeuf-eu mae. Aerkhawf, ngar-aq, Kali hawr-eu Kalizaq armur-anr taf-eu garkawv aermawf-eu ma.*”

Pawrluv, Kalizaq maqgeuflar-euq khoer-aq, Yurdav-eu zanr-anr yawkhav-aer tawqzif taq-euq myavpyawq narmaer jav-eu Paqlisaer tiqghaq pyeuf-euq mae. **Paqliqsaer** deuq-aq, zaqmiq aqbur deuq-anr yawkhav-aer hawdoer-awr ardzaeq-aer hawteq-eu mae. **Lormav** tsawrhaq-aq, zaqmiq aqbur-anr maqgar noeqpoeq-eu mae. Aerkhawf, anqnya-awr zeurnya-eu mrmyawq tiqjeq lof-aer khawf sawx-eu mae. **Heqleqsar** tsawrhaq-aq, zaqmiq aqbur-anr zaqyo aqli navmaqtsar taqhuiq-awr ciqpoeq-eu mae. Aqyawfmaf-euq ‘aqma miqyaer’ deuq-aq huiqzdae qordzaeq dzaeq-eu miqyaer laer sawxtaq-euq mae. **Kalizaq** lawrnae, zaqmiq aqbur-anr aqjox-aer haw-awr sharnoeq-eu tsaqla? Pawrluv, Kalizaq geuflar-awr Gaqlaqtiv sanqbof boftaq-euq lafkhoer aer-eu, “²⁸ *Nawmaf dawqtawvluf Yeqsur Kali-euq lafkhoer tiqghaq lof-aer pyeuf-eu mirnae, Yurdav tsawrhaq hawr-eu Heqlaqsar tsawrhaq laer maqbeugar-aer, zaqkhav hawr-eu buq-ir-euq tsawrhaq laer maqbeugar-eu uqtaf, zaqyo aqli hawr-eu zaqmiq aqbur laer khawf, maqpar beugar-eu mae*” (Glt.3:28). Teumirnae, Kalizaq-euq nuinoeq-aq, Kali-euq lafkhoer zaqyo aqli maqgor dzaeq-eu mirnae, nuima huiqkhar maqza-aer, zaqmiq aqbur maqteq dzaeq-eu mirnae, nuinyir nyirkhar maqza-a.

Khaqdzerzaq, Zaqmiqzaq-anr Aqjox-aer Yagaq-eu la?

Yaerdawq, zaqmiqzaq deuq-anr maeq-eu myavmaqtsar (deuvzaq 3 deuv—22-24), khaqdzerzaq deuq-anr maeqmyaqdzaeq taq-euq mae (deuvzaq 8 deuv—25-32). Khaqdzerzaq, Zaqmiqzaq-anr gaq-eu heu shawrdui dui-eu gordui dui-eu artiv-anr noetmq taq-euq mae. “*Kali, Kalizaq armur-anr gaq-eu lof-aer gaq-awq*” laer aertaq-euq mae. Kali, Kalizaq armur-anr gaq-eu lafkhoer, aqyawf-euq mawrdo lawrnaeq-awr (25), Kalizaq armur lavsawr-eu uqtaf (26-27), Kalizaq armur-anr nuikhanrshir-eu mae (28-31).

1.Kali, Kalizaq armur-anr gaq-awr, aqyawf-euq mawrdo lawrnaeq-

euq mae (25). Khoerlof-aer durni, Kalizaq-euq khaqdzertzaq khawf, yawqha-eu miqzaq-anr gaq-awr, maqbif maqlawrnaeq peuq-eu tiqqj-iq maqya bijava-a. Yaqkov, Laqkeqlar-anr gaq-awr 14 khof khof mr-euq mae. Bawrzaq, Lurta-anr gaq-awr smqgar maqguv-aer kakhof naeq-euq mae. *Kali, Kalizaq armur-anr gaq-awr, aqyawf-euq mawrdo bif naeq-euq lof-aer* Yawshawr Saflar byan-awr, Kali-euq uqmov yawmuiq-aer jawr-eu khaqdzertzaq-aq, yawqha-euq gharduq taef-aer maqshar noeqni (1Glt.13:5), yawqha-euq miqzaq Kali-euq uqmov yawmuiq-aer bijawr nya'ni & Miqyaer-euq yawshaef khanqsaer dovlarni bimir nya'ni, bif-awr lawrpaq-aer ghae-eu jeq bifpeuq lawrpeuq-eu mae. *Nawr aryamq, lafsawq, dawqmuiq... bifpeuq malaq?*

2. Kali, Kalizaq armur-anr gaq-awr, Kalizaq armur lavshawr-eu mae (26-27). “*Yawshawr*” laer aer-eu heu-aq, *tsershawr yurshawr-awr, yawqjeyawq maqkeuq-eu* gar aermawf-eu mae. Aqdui, Kalizaq geufnar ngae, Kali, aqdui-euq saflar-anr mrshawr naeqlaf-awr, aqdui-euq daefzir muiqlar shawrlarni, Kali, Yaerdawq-anr ghoe-awr aqdui-anr lavshawr naeqlaf luf-eu mae (Yh.15:3; 17:17). *Ircufnae tsiqshawr-eu lof-aer, Yaerdawq-anr ghoe-awr shawr-eu mae.* Miqzaq & khaqdzertzaq oermrbar ngaenan, Miqyaer & tsawrkaq-euq maeqshi tiqghaq tirghaq tsershawr yurshawr-euq jeq pyeuf-eu mae. Tiqghaq tirghaq tsershawr yurshawr taq-euq heu-anr, yawqghaqyawq keuqlar anrlar nar-aq, banq-awr muv-eu iqbox pyeuf-ir-eu mae. Tiqnan, yoshuif pyeuf-eu Kali, miqshuif pyeuf-eu Kalizaq armur-anr, sheuqkhof laqle-eu mae. Khoerngaenan, yoshuif Kali, miqshuif Kalizaq armur-anr aqjox-aer bipyeuf mawf-eu ngalaer aernar-aq, ‘*marbyawf marnar tiqjeq-iq maqbaw-aer, aerkhar maqza-eu uqtaf, shawrjaevni ghae-awr, yawshaef khanqsaer byan-eu Kalizaq armur pyeuf-eu*’ gar mawrmawf-eu mae. Khoerlof-aer, durni khaqdzertzaq khawf, yawqha-euq miqzaq shawrnya'ni yawqha khawf, yashawr-eu mae (Yk.1:27; 1Btl.1:15-16). Kalizaq armur shawrnya'ni, Kali; *Pirma* pyeuf-awr Miqyaer-anr tanqshar-awr, *Miqyaer gharduq ngaeqdan-eu* ghaq pyeuf-awr Yaerdawq maeq-eu uqtaf, *Sanqpaq* pyeuf-awr, Kalizaq-anr uvlanr-awr hawpir-eu mae. Khoerlof-aer durni, Kalizaq-euq khaqdzertzaq-aq, yawqha-euq zawfjir gharduq *Pirma* geuf-awr Miqyaer-anr tanqshar-awr, Miqyaer gharduq ngaeqdan-eu ghaq geuf-awr Yaerdawq-anr dawqpaq taq-eu uqtaf, *sanqpaq* geuf-awr

zawfjir-euq nuima saflar mawrdo-anr ya'uvlanr-awr yahawpir-eu mae.

3. Kali, Kalizaq armur-anr gaq-awr, Kalizaq armur-anr nuikhanrshir-eu mae (28-31). Gaq-eu laer aerngae, Heqleqsar dawq 4 dawq jav-eu mae: *Tif, stoges*—shiqshaq taf-eu aqyuif aqnyir aqma aqda gaq-eu jeq. *Nyif, phileos*—nuinoeq tiqgar tsaq-eu cawq gaq-eu jeq. *Smr; eros*—aqbur aqli yuftaf jawrtaf-eu gaq-eu jeq. *Oeq, agape*—Miqyaer gaq-eu lof-aer aqjeq aqjox-aer lawkhawf gaq-eu jeq. Kalizaq-euq miqshuif & yoshui oermrbar ngae, gaq-eu heu 4 jeqluf byanlar-eu eu mae. Nuikhanr shirdui duilar paq-aer ghae-eu gaq-awr gawf-eu jeq pyeuf-eu mae. Aerkhawf, nuikhanr shirlar paq-aer ghae-eu gawf-eu jeq heu dovlarni ghawq-eu jeq yajav-eu mae. “*Khoermirnae, khaqdzerzaq-aq, yawqha-euq aqma aqda-anr nae ghawq-ir-awr, yawqha-euq miqzaq naeq-aer gawf-ir-eu lafkhoer, nyiqghaq khawf tiqghaq taef-aer pyeuflar-eu mae*” (Eps.5:31). Aqdir ghawq-eu jeq maqjav nar-aq, aqdir gawf-eu jeq maqjavlar nya-a. Miqshuif hawr-eu yoshuif tiqghaq tirghaq nuikhanr arnavni yashir-eu ngalaer aernar-aq, miqshuif-aq, yoshuif za'ni gharduq & yoshuif khawf, miqshuif-anr za'ni gharduq tsawrhaq yawqghaq navluf-anr yabyaerdae peuq-eu mae. Nuighaq-anr gaq-eu navmaqtser, yawqha oermrbar-eu laer ghae-eu ghaq-anr yagaq dzaeq-eu mae. Yawqha oermrbar dzaq-awr gawf-ir-eu laer ghae-eu ghaq-euq gharduq, aqyuif aqnyir aqma aqda & cawq yawghoer dawqtawvluf yaghawq peuq-awr yabyaerdae peuq-eu mae. Byaerdae peuq-awr, oermrbar ngae, miqsawr yozaq-euq yawkaq-aq, yawqha-euq paeqzaq navmaqtser paedzaeq-eu yawqha paeqzaq pyeuflar-awr, yawqha-euq cawq navmaqtser paedzaeq-eu cawq pyeuflar-euq uqtaf, mirtsaq khoertav nae, yawqha gaqdzaeq dzaeq-eu ghaq pyeuflar-awr *nyiqghaq khawf tiqghaq taef-aer pyeuflar-eu mae*. Nyiqghaq kahwf, tiqghaq taef-aer pyeuflar-euq mirnae, yawqha-euq miqzaq-anr arnavni yagaq-eu lalaer aernar-aq, yawqha-euq mawrdo-anr gaq-eu lof-aer yagaq-eu mae. *Yawqha-euq mawrdo-anr gaq-eu lof-aer, yawqha-euq miqzaq-anr gaq-eu tsaqmae. Yawqha-euq miqzaq-anr gaqnar-aq, yawqhar yawqha gaq-eu mae. Tsawrhaq tiqghaq-iq yawqha-euq mawrdo-anr maqbyae-eu uqtaf, yawmuiq-aer bidzaq bidawr-awr ngaeqghae-eu mae*. Teumirnae, khaqdzerzaq, yawqha-euq miqzaq-anr gaq-eu heu-aq, yawqha-anr muiq-eu jeq pyeuf-eu mae. Maqganr-eu yawlaf dawrga maqngeur nar-aq, yawqha-euq yawqha mawrdo-anr gaq-awr yawqha-euq miqzaq-anr

gaq-eu mae. Miqsawr yozaq-aer daeftaf-eu heu-aq, poeq-awr dawqtsuif nafdui dui-eu jeq pyeuf-eu mae. *Zaftaq-euq huiqdui dui-eu tiqqeq pyeuf-eu mae. Kali hawr-eu Kalizaq armur-anr taf-eu garkawv aermawf-eu ma.* Maqshir tiqzir misawr yozaq-aer gaq-eu lafkhoer daeftaf-eu heu-aq, mqmaq maqbyav yarzir, miqshuif—aqdui Kalizaq hawr-eu yoshuif—Kali cawq cawqtaf gar toeqmaeq-eu jeq pyeuf-eu mae.

C.Miqzaq & Yozaq Ya'mr-eu jeq (33) ³³*Khoerlof-aer lawkhawf, nawmaf yawqghaq navluf yawqha-euq mawrdo-anr gaq-eu lof-aer, yawqha-euq miqzaq-anr gaq-awq. Miqzaq deuqkhawf, yawqha-euq khaqdzerzaq-anr yawzeu baw-eu tsaqmae.*”

Miqsawr yozaq-aer daeftaf-eu aqsurghaq aqjox-aer yaghae-eu lalaer aernar-aq, yawluiv luiv-aer aerngae, “*khaqdzerzaq, miqzaq-anr gaq-awr, miqzaq, khaqdzerzaq-anr yawzeubaw-awq*” laer aernya-eu mae. Lafkhawv tiqpyawq taef-aer taevnae-aq, maqmanrlar-eu lof-aer durni, miqzaq & khaqdzerzaq tiqghaq taef-aer laejae na-aq, zawfjir maqzif maqlmrlar nya-a. Teumirnae, miqsawr yozaq nyiqghaqluf yagm-awr yalaejae-eu mae. Guiqlanq tiqhuiq-aer, aqdui Kalizaq, aqdui dzawgeuf hawgeufduq Yeqsur Kali jawr-awr, Yawshawr Saflar, aqdui naeq-aer jawr-awr Miqyaer nuima tsaq-eu lof-aer arsiq siqleni cawba luf-eu mae (Glt.5:22-23). Ghawqmyapov miqsawr yozaq zawfjir maqteqzif nya-eu-aq, iqbx baqda'nae mae. Iqbx-euq dawqpaeq duqpur-aq, yawqhar yawqha dawqpaeq taq-awr yawqha-eu gharduq taef-aer sharnoeq-eu khoermae. Kali-euq lavov hawr-eu tiqghaq-euq lafov tiqghaq jawr-awr nae taef-aer, yawqha-eu gharduq taef-aer sharnoeq-eu jeq-anr ghaler nya-eu mae. Tiqghaq tirghaq tsaqler dzoerler-eu, miqzaq, khaqdzerzaq-anr yawzeubaw-awr; khaqdzerzaq, miqzaq-anr gaq-eu miqsawr yozaq-aq, mirtsaqzaq-anr mqtav mirkhanq daefmaeq daefmawr naeq-eu jeq pyeuf-eu mae.

Miqsawr Yozaq-aer Daeftaf-eu Aqqeq Aqjox-aer Muiq-eu la?

1. Cawq bawlar-eu mae. Miqyaer aer-eu, “*Tsawrhaqzaq, aqyawf tiqghaq taef-aer jawr-eu maqmuiq nga. Aqyawf-anr bicawba-eu gharduq, aqyawf-anr geux-eu cawq tiqghaq, ngar baema*” (Adb.2:18).

2. Gaq-eu jeq byanlar-eu mae. ³⁷*Yeqsur, aqyawf-anr heulof-aer aerkhof naeq-euq mae: “Nawq-euq nuima dawqtaawvluf, saflar*

dawqtawvluf, nuinoeq nuidur dawqtawvluf nawq-euq Sanqpaq
Miqyaer-anr gaq-awq.’³⁸Heudawq-aq, huiqdzaeq-awr; dawqma
yawdzanr dawqmae.³⁹Nyiqdawq tiqdawq khawf khoerdawq-anr dur-eu
mae. ‘Yawqhar yawqha gaq-eu lof-aer; yawqha-euq dawqpaq jawr-eu
tsawrhaq-anr gaq-awq’ laer aer-eu khoerdawq mae.⁴⁰Zanrdawq
khofdawq dawqtawvluf hawr-eu Miqyaer gharduq ngaeqdan-eu
tsawrhaq deuq-euq dawq dawqtawvluf, heu nyiqdawq-anr dawqpaq
taqtaq-euq mae.” (Mt.22:37-40).

3.Miqyaer-euq yawshaef khanqsaer dovlar-eu mae. Miqyaer
nae biuvlanr-euq zawfjir-aq, mqtav mirkhanq-anr durlar-eu mae. “Nawr
uvlanr-eu jeq bikeuv lelaw. Mq khoertav, nawr nuikhanr shir-eu jeq
byan-eu lof-aer, mirtsaq khoertav khawf bibyan le-awq” (Mt.6:9-10).

4.Maqa laeq-ir ni khmq-eu jeq pyeuf-eu mae. “Zaqyo aqli-aq,
zaqmiq aqbur-anr maqtoeq civni jawrnya nar-aq yawmuiq mae.
Aerkhawf, maqtsaq-eu lafkhoer banq-awr joe-eu jeq javluf-eu mirnae,
zaqyo aqli yawqghaq navluf miqzaq sheuq-awr, zaqmiq aqbur
yawqghaq navluf khawf khaqdzerzaq baw-eu tsaqmae. Khaqdzerzaq-aq,
yawqha-euq miqzaq-anr ghoer-awr mrnaeq paq-aer ghae-eu lof-aer
tsaqtsaqni mrnaeq-awq. Miqzaq ghaqkhawf, yawqha-euq khaqdzerzaq-
anr khoerlof-aer mrnaeq-awq” (1Glt.7:1-3).

5.Zaqdeuq uvdeuq jeuqle ovle-eu mae. Khoerngae, Miqyaer,
aqyawf maf-anr dawq ngaeqghae naeq-awr aer-eu, “Bawle zale-awr
myaqlar baerlar-awq. Mirtsaq khoertav jawrbyan jir-awr, mirtsaq-anr
uvlanr-awq. Iqma lavshav-euq ngaqshaq, mqtav-euq arjir hawr-eu
mirtsaq khoertav kharcan-eu yawdaef jeq-anr khawf uvlanr-
awq.” (Adb1:28/ 4:1).

**6.Guiqlanq saflarpaw-euq garkawv ghovshawnya dzaeqclar-eu
mae.** “Heu-aq, zaf taq-euq huiqdui dui-eu tiqjeq pyeuf-eu mae.
Aerkhawf, ngar-aq, Kali hawr-eu Kalizaq armur-anr taf-eu garkawv
aermawf-eu ma” (Eps.5:32/ 2Glt.11:2-3).

III.Arsaq Saq-eu Dawq

Miqsawr yozaq daeftaf-eu zawfjir-aq, Miqyaer nae bae-euq
mirnae, Miqyaer nae aer-eu lof-aer mrcaw nar-aq, maqlaeq-ir nya-a.

Dzawdeuv 11: Kalizaq-euq Ardeuv Artiv

I. Ardang Bae-eu Dawq

Yawshawr Saflar byan-eu Kalizaq-aq (Eps.5:18), tiqghaq-euq lafov tiqghaq jawr-eu garnae siqlar-eu mae (Eps.5:21). Tiqghaq lafov tiqghaq jawr-eu laer aerngae, khaqdzerzaq-aq, Yeqsur Kali-euq uqmov jawr-eu lof-aer zaqmiqzaq-aq, khaqdzerzaq-euq uqmov yajawr-awr (Eps.5:22-33), aqma aqda & gar mr-eu yawsanrdeuq, Yeqsur Kali-euq uqmov yawjawr-awr, zaqdeuq & gar mrzaq kuirlaf zaqkhavdeuq, yawsanr deuq-eu uqmov yawmuiq-aer yajawr-eu mae (Epa.6:1-9).

I. Kalizaq-euq Ardeuv Artiv (Eps.6:1-9)

A. Zaq deuq ya'mr-eu jeq (Eps.6:1-3) ¹“Zaqdeuq-or, Sanqpaq Miqyaer-euq lafkhoer yawqha-euq aqma aqda-euq aerdawq narhaq geuf-awq. Nawmaf khoerlof-aer mr-eu-aq, tsaqdui dui-eu mae.

²“Nawqma nawqda-anr yawzeu baw-awq” laer aertaq-euq zanrdawq khofdawq heudawq-aq, sarjax dzaqtaq-euq zanrdawq khofdawq yawbae dawqmae. ³“Khoerlof-aer yawzeu bawnar-aq, nawq-euq gharduq yawqjeq navluf muiq-awr, mirtsaq khoertav daefngae zirbaw zirza taefa.””

Yaerdawq, zaqdeuq-anr maeqnaeq tsovnaeq laer aqma aqda-anr khaertaq-euq uqtaf, zaqdeuq-anr dawrcoeni aqma aqda-euq aerdawq narhaqgeuf-awq laerkhawf, maeqtaq-euq mae. Eps.6:1-3 lafkhoer, ***zaqdeuq aqjeq mirnae, aqma aqda-euq aerdawq ya'narhaq geuf-eu*** lalaer 4 jeq byan'ni maeqnaeq laf-euq mae.

1. ***Zaqdeuq, Miqyaer-euq zaq—Kalizaq*** pyeuf-eu mirnae, aqma aqda-euq aerdawq ya'narhaq geuf-eu mae. “*Zaqdeuq-or, Sanqpaq Miqyaer-euq lafkhoer yawqha-euq aqma aqda-euq aerdawq narhaq geuf-awq.*” Zaqdeuq, Kalizaq pyeuf-eu mirnae, aqma aqda-anr haw-awr nae taef-aer maqngeur-eu Yeqsur-anr haw-awr nae, aqcawq navmaqtser aqma aqda-euq aerdawq narhaqgeuf-eu tsaqmae. Yeqsur khawf, yawzaq-anr ngae, aqma aqda-euq aerdawq narhaq geuf-euq mae. “*Khoernar-aq, aqyawf (Yeqsur), aqyawfnyaf (Maqliv & Yorshaev) naeq-aer Naqzaqlaer-anr ghof-ir-awr, aqyawf nyaf-euq lafov yawmuiq-*

aer jawr-euq mae” (Lk.2:51). Zaqdeuq, aqma aqda-euq aerdawq narhaqgeuf nar-aq, aqdir ‘*Sanqpaq Miqyaer-euq lafkhoer*’ jawr-awr, *Yawshawr Saflar byan-eu* uqtaf, *tiqghaq-euq lafov tiqghaq jawrnya* ngar-a laer mawrlar-eu mae.

2. ***Tsaqdui dui-eu jeq*** pyeuf-eu mae. “*Nawmaf khoerlof-aer mr-eu-aq, tsaqdui dui-eu mae.*” Miqyaer yawqjeq navluf-anr baengae, ardeuv artiv & jawrduq jawrzar lavbawtsaq taq-euq mae. Zaqdeuq, aqma aqda-anr nae daefle-awr, aqma aqda nae yabi cuhuiq-eu mirnae, aqma aqda-euq lafov jawr-awr aqma aqda-euq aerdawq narhaq geufgar Miqyaer nuima tsaq-eu mae. “*Zaqdeuq-or; yawqjeq navluf lafkhoer; aqma aqda-euq aerdawq narhaq geuf-awq. Aqjeq mirnae aernar-aq, nawmaf khoerlof-aer narhaqgar Sanqpaq Miqyaer nuima tsaq-eu mae*” (Gls. 3:20).

3. ***Miqyaer bif-euq zanrdawq khofdawq*** pyeuf-eu mae. “*Nawqma nawqda-anr yawzeu baw-awq’ laer aertaq-euq zanrdawq khofdawq*” heudawq-aq, zanrdawq khofdawq 10 dawq-anr nae 5 dawq tiqdawq mae (Di.20:12; Dm.5:16). Aqma aqda-anr *yawzeubaw-eu* laer aer-eu heu-aq, yawzaq-anr ngae, aqma aqda-euq aerdawq narhaq geuf-eu taef-aer maqngeur-eu, aqyawfmaf-euq guiqlanq-anr noeqmawr-awr noeqmuiq-eu lafkhoer, aqyawfmaf-anr gaq-awr mawf-eu jeq cawba naeq-eu uqtaf, mawq-ir ngae ngaeqghae bosav naeq-eu garkhawf aermawf-eu mae.

4. ***Narhaqgeuf nar-aq guiqlanq za-eu*** mae. “*Zanrdawq khofdawq heudawq-aq, sarjax dzaqtaq-euq zanrdawq khofdawq yawbae dawqmae.*” Zanrdawq khofdawq 5 dawq tiqdawq-aq, mrcaw nar-aq, guiqlanq heulox-aer za’ mae laer aertaq-euq mae; “*Khoerlof-aer yawzeu bawnar-aq, nawq-euq gharduq yawqjeq navluf muiq-awr; mirtsaq khoertav daefngae zirbaw zirza taef-a*” (Di.20:12). Teumirnae, aqma aqda-anr yawzeu baw-awr aerdawq narhaq geuf-eu zaqdeuq-euq gharduq, Miqyaer-euq guiqlanq kharcuiv-eu heu 2 jeq za-eu ngalaer mawrlar-eu mae;

Tif, *yawqha-euq gharduq yawqjeq navluf muiq-eu* mae. Nawr, nawq-euq daefzir gharduq arjerjeq bimuiq mawf-eu nya? Yeqsur, aqyawf-euq aqma aqda-euq aerdawq narhaq geuf-euq mirnae (Lk.2:51), yawdaef daef-eu gharduq yawqpaw navluf muiq-eu mae. “*Yeqsur-aq, zaqsiq tsawrganr hawr-eu mawrdo huiqlar-awr, Miqyaer khawf, tsawrhaqzaq*”

khawf, aqyawf-anr nuima tsaq-eu mae” (Lk.2:52). **Nyif, mirtsaq khoertav daefngae zirbaw zirza-eu** mae. Sanqpaq Miqyaer lafkhoer, aqma aqda-anr yawzeu baw-awr aerdawq narhaq geuf-eu zaqdeuq-aq, aqyuif aqtsu, sanqpaq sanqma hawr-eu Miqyaer-anr khawf yawzeu baw-eu siqnya-eu mirnae, uqduq nar-awr nuima suqsuq-eu ghawrmya jeq-anr nae, daefdoer daefcawv-awr daefzir nymr-ir-eu jeq-anr nae yabuq-ir-eu mae.

B.Aqdadeuq ya'mr-eu jeq (Eps.6:4) ⁴*“Aqda deuq-or, nawmaf-euq zaqdeuq nuima paerlar paq-aer taqjanr. Nawmafzaqciq zaqcu mrngae, Sanqpaq Miqyaer nae maeqnaeq laf-euq lof-aer, aqyawf maf-anr maeqnaeq tsovnaeq-awr, maeqbym naeq-awq.”*

Zaq-aq, maqmaeq maqtsovni yawqha taef-aer kharnoeq kharlov-eu lofa-er bidaef nar-aq, daefdoer daefcawv-awr puiq-awr muir-eu tsawrhaq pyeuflar-eu mae. Yaerbof lafkhoer, aqma aqda maqmaeq maqtsov-euq mirnae, maqngeur nar-aq, hawgeuf dzawgeufduq maqpyeuf-euq mirnae, zaqdeuq daefcawq-awr puiq-awr muir-eu tsawrhaq pyeuflar-euq gar ya'mawr-eu mae: **Irtsav**, aqyawf-euq zaqyo Irsawr-anr kharnoeq kharlov-eu lof-aer bidaef-awr, aqma ghaqkhawf, Yaqkov-anr gaqdzaeq-eu mirnae zawfjir pyav-ir-euq mae. **Yaqkov** khawf, zaqhuiq zaqnyir tser-awr, Yorshaev-anr gaqdzaeq-eu mirnae, uqduq nar-awr nuima suqsuq-eu ghawqmyajeq yapuq ya'mawr-euq mae. **Erlir**, aqyawf-euq zaq-anr yawmuiq-aer maqmaeq-aer, daqga paq-aer ghae-eu jeq mr-awr, Irsaqlqlav aqcawq nae bideuvghaq-euq mae. **Daqbir**-euq zaqyo Aqbarsaqloq, yawqha-euq maernmr-anr saef-awr, yawqha-euq aqda-anr khawf, puiq-awr saef-eu laer laejae-euq mae. Eps. 6:4 lafkhoer, Yaerdawq **zaqciq zaqcu aqjox-aer ya'mr-eu** lalaer heu 4 jeq maeqnaeq laf-euq mae.

1. **Zaq nuima paerlar paq-aer maqya'mr-a.** *“Aqda deuq-or, nawmaf-euq zaqdeuq nuima paerlar paq-aer taqjanr.”* Heqleqsar dawq *“Aqda deuq-or”* laer aer-eu heudawq-aq, *“Aqma aqda deuq-or”* laerkhawf aermawf-eu mae. Nymrkhanq-euq lafkhoer aqda ghaq-aq, zawfjir-euq ‘uqduq—aqyuif’ pyeuf-eu mae. Aerkhawf, khoer-aq, bikhaeq bikhavghaq-eu gharduq maqngeur-a, biuvlanr-awr bihawpir-eu gharduq mae. Zaqdeuq-anr nuimq paerlar paq-aer janrnaeq nar-aq, aqyawfmaf-euq nuima cawv-ir nya-eu mae. *“Aqda deuq-or, zaq nuima paerlarni*

taqjanrnaeq. Janrnaeq nar-aq, aqyawfmaf nuighaq baq-ir-eu bawmr” (Gls.3:21). Aqdadeuq, zaq nuima paerlar paq-aer janr-eu heudeuq-anr yanr-eu tsaqmae: *Zaqhuiq zaqnyir tser-eu, aertaq-eu lof-aer maqmr-eu, daeq-awr aer-eu yawmyaq, maqjaceuq-eu, tiqkhaeq tiqjeq-aer tsawqtoeq tsawqдав myaq-eu, hawgeuf dzawgeufduq maqpyeuf-eu...*

2. Zaq-anr zaqciq zaqcu ya'mr-eu mae. “*Zaqciq zaqcu mr-eu*” laer aer-eu heudawq-aq, Eps.5:29 lafkhoer zmqtaq-euq Heqleqsar dawq aqyawf tiqdawq pyeuf-awr “*yawmuiq-aer bidzaq bidawr-awr ngaeqghae-eu*” laer aermawf-eu mae. Teumirnae, khaqdzerdzaq, yawqha-euq miqzaq-anr yawmuiq-aer bosav-awr, yawqha-euq zaq-anr khawf yawmuiq-aer bsav-eu aqda yapyeuf-eu mae. Aqda tiqghaqnav zaq cumawf garnae, zaq maqciq nya-a. Aerkhawf, aqda ghawqmyaghaq zaq ciqnya garnae, zaq maqcu nya-a. Zaq-aq, ciq-eu navmaqtser cu-eu shaqdzaeq-eu mae. Zaqciq zaqcu mr-awr zaq-anr yawmuiq-aer bidzaq bidawr-awr ngaeqghae-eu heu, shiqshaq daefnya jawnya'ni dzaqdzaq dawrdawr cuhuiq-eu taef-aer maqngeur-eu, Yeqsur lof-aer huiqlar manrlarni (Lk.2:52), zaqsiq tsawrganr povza-awr mrdzaq khawfdawr nya'ni hawr-eu aqcawq naeq-aer daeftaf jawrtaf nya-awr, Miqyaer-euq garma-anr can'ni yacuhuiq-eu mae (Dd.22:6).

3. Zaq-anr ya'maeq yatsov-eu mae. “*Sanqpaq Miqyaer nae maeqnaeq laf-euq lof-aer, aqyawfmaf-anr maeqnaeq tsovnaeq-awq.*” Aqma aqdadeuq, maqdzaw-euq gar-aq, maqmaeq nya-a, zaq-anr maeq-eu jeqhu, yawqha *Sanqpaq Miqyaer nae maeqnaeq laf-euq* jeq yadzaw geuf-eu mae. Yaerbof 66 pur, deuvma 1,189 deuv, deuvzaq 31,173 deuv-aq, aqdui, zaqdeuq-anr ya'maeq-eu *Sanqpaq Miqyaer nae maeqnaeq laf-euq* Yaerdawq mae. Yaerbof-euq Yaerdawq-aq, heulox-aer gardanrtsoeq-eu mae: Maqsiq nya-eu jeq bisiq nyalarni *maeqnaeq tsovnaeq-awr*, siqnya-eu khawf laeq-ir-euq yawlaeq toeqmaeq-awr *maeqbawq bif-eu* uqtaf, maqmuiq-eu jeq bimuiq larni *maeqpar* naeq-awr, yawmuiq jeq mr-eu mrnya dzaeqlarni *maeqbym* naeq-eu & yawha bym-awr nya-eu uqtaf, aqcawq-anr sheuqghanr nya'ni *maeqbyan*-eu gharduq mae (2Tms.3:16-17).

4. Zaq-anr yasheuqghanr yasheuqbymq naeq-eu mae. “*Sanqpaq Miqyaer nae maeqnaeq laf-euq lof-aer, aqyawfmaf-anr... maeqbym naeq-awq.*” Zaq-anr sheuqghanr sheuqbym-eu lafkhoer *'diqdiq-aer maeq-eu—maeqpar tsovpav-eu'* jeqkhawf, yajav-eu mae. Miqyaer,

aqyawf-euq zaq-anr diqdiq-aer maeq-eu lafkhoer sheuqghanr-eu mae, “*Sanqpaq Miqyaer-aq, aqyawf gaq-eu tsawrhaq-anr maeqnaeq tsovnaeq-awr, aqyawf-euq zaq laer, sawx-euq yawqghaq navluf-anr diq diq-aer maeqnaeq-eu mae*” (Hby.12:6). Yaerdawq paraer-eu, “*Zaq-anr byae-eu tsawrhaq-aq, darcuir maqzmq-a. Aerkhawf, yawqha-euq zaq-anr gaq-eu tsawrhaq-aq, yawqha-euq zaq-anr diqdiq-aer maenqnaeq-eu mae*” (Dd.13:24). Diqdiq-aer maeq-eu heu, nuima paer-awr mr-eu jeq taqbipyef. Zaqdeuq ghovshaw-awr, gaq-eu mirnae bimuiq biparlarni, za paq-aer ghae-eu jeq maqbiza-aer, maqmr mawf-eu jeq bimr-awr bidzaw geuf-eu jeq bipyef-awq.

C.Zaqkhavdeuq ya'mr-eu jeq (Eps.6:5-8)

Arhu Lormav-euq zaqkhav & iqnan gar mrzaq beugar-eu jeq ghawqmya'ni jav-eu khawf, Miqyaer-euq dawq-aq, maqpov maqpar larni, arhu lof-aer iqnan khawf maeqnaeqlaf luf-eu mae. Kalizaq pyeuf-eu gar mrzaq, ***nuima aqjeq aqjox-aer taq-awr nae arnavni laejae-awr ya'mr-eu*** lalae aernar-aq;

1. ***Kali-euq aerdawq narhaq geuf-eu lof-aer yawsanr deuq-eu aerdawq ya'narhaq geuf-eu mae (dz.5)***. “*Kuirlaf zaqkhav geufluf-eu deuq-or, Kali-euq aerdawq narhaq geuf-eu lof-aer, shiqshaqpaw nawmaf-euq yawsanr-euq aerdawq-anr, nuima shawrjaevni taq-awr, guv-awr yawdzuq dzuq-eu lafkhoer narhaq geuf-awq.*” Kalizaq-aq, Kali-anr dawqpaeq taq-awr mrdzaq khawfdawr-eu tsawrhaq yapyeuf-eu mae. Maqmuiq-eu jeq maqmrni, Kali-anr guv-eu jeq, yawqha-euq yawsanr guv-eu, mawrngae taef-aer maqngeur-eu maqmawr ngaekhawf, *nuima shawrjaevni taq-awr yawzeu baw-eu jeq yabi jav-eu mae.*

2. ***Tsawrhaq-euq kuirlaf zaqkhav taef-aer maqngeur-eu, Kali-euq kuirlaf zaqkhav geufluf lealer maqya ngaer-a (dz.6)***. “*Tsawrhaqzaq nuikhanr bishir-eu laer, aqcawq mawrngae taef-aer mr-eu jeq taqbipyef. Kali-euq kuirlaf zaqkhav lof-aer, nuima lafkhoer nae Miqyaer nuima tsaqni mr-eu jeq bipyef-awq.*” Tsawrhaq-euq kuirlaf zaqkhav geuf-eu-aq, aqcawq maqmawrngae maqmr khawf, mawrngae marnar-aq, nuikhanr shir-eu mae. Aerkhawf, gar mrzaq Kalizaq-aq, aqcawq nuikhanr shirni taef-aer maqngeur-eu, Miqyaer nuima tsaqni mrmawf-eu mirnae, aqcawq mawrngae taef-aer maqngeur-eu, maqmawr ngaekhawf, Miqyaer mawr-eu mirnae, nuima keuv-awr yawmuiq-aer mr-eu mae.

3. Tsawrhaqzaq nae bif-euq ghaqgarpoeq zagar navmaqtser, Miqyaer nae bif-euq lafsawq-anr noeqtmq-awr ya 'mr-eu mae (dz.7-8).

“⁷Nawmaf, tsawrhaq-euq gharduq maqngeur-eu, Sanqpaq Miqyaer-euq gharduq nuima keuv-awr mr-awq. ⁸Aqjeq mirnae aernar-aq, zaqkhav khawf, buq-ir-euq tsawrhaq khawf, yawqha nae yawmuiqjeq mrtaq-euq lof-aer, Sanqpaq Miqyaer bifnaeq lafgar zataef-a laer siqnya-awq.” Tsawrhaqzaq-euq ghaqgarpoeq za'ni taef-aer noeqtmq-awr mnrar-aq, Miqyaer-anr ngaer-awr, nuima maqkeuvni mrmr-aer jawrnya-eu mae. Aerkhawf, Miqyaer-euq gharduq mr-eu lelaer noeqtsov taq-awr mnrar-aq, nuima keuv-awr mrnya-eu mae. Khoerlof-aer marnar-aq, yawqha nae yawmuiqjeq mrtaq-euq lof-aer, Sanqpaq Miqyaer bifnaeq lafgar za-eu mae.

D. Yawsanrdeuq ya 'mr-eu jeq (Eps.6:9) “⁹Yawsanr deuq-or, nawmaf

khawf, aqyawf maf-anr khoerlof-aer durni janrnaeq-awr, aqyawf maf-anr guvtsiq taqnyaef. Nawmaf-euq Yawsanr ghaqkhawf, mq khoertav jawr-awr myavpyawq huiqnyir maqtser-a laer siqnya-awq.” Kalizaq pyeuf-eu yawsanrdeuq,gar mrzaq-anr haw-eu **aqjeq aqjox-aer ya 'mr-eu** la?

1. Gar mrzaq-anr geuxni yajanrnaeq-eu mae. “Yawsanr deuq-or, nawmaf khawf, aqyawf maf-anr khoerlof-aer durni janrnaeq-awq.” Yawsanr deuq, gar daeqbir ngae, gar mrzaq mrnya-awr marcoer-eu gar haw-awr yadaeqbir-eu mae. “Aqyawf, aqyawfmaf nya-eugar haw-awr” (Mt.25:15), Khoernar-aq, aqyawfmaf nuima keuv-awr nae, yawqha-euq myawqmr yarngaeq mrluiv-euq gar haw-awr nae geuxni, yawsanr deuq, aqyawf maf-anr janrnaeq gar Miqyaer nuima tsaq-eu mae.

2. Gar mrzaq-anr guvtsiq maqya'nyaef-a. “Aqyawf maf-anr guvtsiq taqnyaef.” Gar mrzaq gar ghawqmya'ni bimirrov lafni 2 jeq janrnya-eu mae: *Tif*, lavgub-awr khavghaq-eu. *Nyif*, lavghoer-awr gaqghaq-eu. Yawsanr pyeuf-eu Kalizaq, dzoeqdzag mringae gaq-eu lafkhoer dawrcoe ni ngaeq-eu tsaqmae. Aerkhawf, gar mrzaq-anr guvtsiq nyaef-awr, nuima maqsar-eu lafkhoer bimir-eu jeq maqya bipyeuf-a.

3. Yawqha-euq Yawsanr-anr noeqkeuv-awr ya 'mr-eu mae.

Yawsanrdeuq gar mrzaq-anr haw-eu lof-aer “*Nawmaf-euq Yawsanr ghaqkhawf, mq khoertav jawr-awr*” hawluf-a laer maqya ngaer-a. Aryaq-euq uqmov maqjavr-eu tsawrhaq-aq, aryaq maqjav-a. Aryaq-euq, uqmov yawmuiq-aer jawrnya-eu tsawrhaq-aq, aryaq yawmuiq-aer zmqnya-euq tsawrhaq heudeuq-anr haw-awr dzawgeuf kar-euq; Yorshaev, Morseq, Yawrsuv, Daqbir, Neqhamir. Yawsanrdeuq, tsawrhaq-anr maqguv khawf, Miqyaer-anr yaguv-eu mae.

4. *Myavpyawq huiqnyir maqyatser-a.* Miqyaer, “*Mq khoertav jawr-*

awr myavpyawq huiqnyir maqyatser-a.” Khoerlof-aer durni, yawsanr pyeuf-eu Kalizaq myavpyawq huiqnyir maqyatser-a. Myavpyawq huiqnyir tser-eu heu-aq, baqmaf baqmur lavpav-awr, nuikhanr maqshir-aer myavnav nav-eu jeq bidovlar-eu garma pyeuf-eu mae

III. Arsaq Saq-eu Dawq

Nawr, Yawshawr Saflar byan-awr (Eps.5:18), Kali-anr yawzeu baw-eu lafkhoer tiqghaq-euq lafov tiqghaq (Eps.5:21), aqma aqda, aqyuif aqtsu-euq uqmov yawmuiq-aer jawrnya lufma laq?

Dzawdeuv 12: Saflarpaw Guirdeuv Deuv-eu

I. Ardang Bae-eu Dawq

Kalizaq geuf-eu-aq, aqmui mui-eu jeq maqngeur-eu guirdeuv deuv-eu jeq pyeuf-awr, guirdeuv heu 3 pyawq-anr yadeuv-eu mae: Mirtsaq, shiqshaq & naef sanppaq (Eps.2:1-3). *Tif, Mirtsaq*-aq, aqdui-euq jawqlaw jawrlawr pyeuf-luf-eu Miqyaer-anr maqjan’ni “*shiqshaq maerjuir juir-eu, myavnuiv mawr-awr maerjuir juir-eu & pyurshuir myawq gang baqda’nae nuima huiq-eu*” (1Yh.2:15-17). *Nyif, Shiqshaq*-aq, aqdui-euq ‘*tsawroer—Aqdaq-anr nae za-euq aryoeq*’ Miqyaer-anr puiq-eu taef-aer pyawq-eu nuidur nuilov, nuinoeq nuisawx & nuikhanr nuitsaev-anr aermawf-eu mae. *Smr, Naef sanppaq & aqyawf-euq baqmaf.* Halleluya! Sanppaq Yeqsur kamrshir-awr ghodaeflar-awr, aqdui-anr muir-eu heu 3 jeq-anr ghaqler-euq mae: Mirtsaq-anr (Yh.16:33; Glt.6:14), shiqshaq-anr (Lm.6:1-6; Glt.2:20) & naef sanppaq-anr (Eps.1:19-23). Teumirnae, aqdui Kalizaq guirdeuv

deuv-eu-aq, 'maqghaqler-euq ghaqlerni' deuv-eu maqngneur-eu, 'ghaqler dzeur-euq parghaq lerni' ghaqler-euq paw pyawq-awr deuvluf-eu ma.

II.Saflarpaw Guirdeuv Deuv-eu (Eps.6:10-24)

A.Guirdeuv Aqsurghaq-anr Yadeuv-eu la? (Eps.6:10-13)

Guirdeuv deuvghaq nya'ni, yawqhar yawqha yawmuiq-aer yasiqnya-awr, muir-eu ghaq-anr yawmuiq-aer yasiqnya-eu mae.

1. *Yawqhar yawqha yawmuiq-aer siqnya-awq (Eps.6:10-11)*

¹⁰*“Ngaq-euq aqyuif aqnyir deuq-or, arsaq saq-eu dawq-aq heulof-aer ma. Nawmaf, Sanqpaq Miqyaer-euq lafkhoer, ghaq khav-eu aqyawf-euq baoq-anr gho-e-awr, ghaq khavlar-awq. ¹¹Nawmaf, Miqyaer nae biflaf-euq guirdeuv keuka dawqtawv luf-anr dm-awr, naef sanqpaq-euq bawqtov-anr lavtsoeq nya'ni yawfzif taq-awq.”*

Dawq ngaeqngae zmq-eu, 'arsaq saq-eu dawq' laer aernar-aq, dawq 'yawhuiq uqdzan' dawq laer aermawf-eu mae. Teumirnae, guiqlanq saflarpaw guirdeuv deuvghaq nya'ni, dawq 'yawhuiq uqdzan' dawq heudeuq-anr yawmuiq-aer ghovshaw-awr yadeuv-eu mae. Saflarpaw guirdeuv deuvghaq nya'ni, Kalizaq-euq guirzaq, Miqyaer-euq lafkhoer jawr-awr, Miqyaer-euq baoq-anr yaghoe-eu mae. *“Sanqpaq Miqyaer-euq lafkhoer, ghaq khav-eu aqyawf-euq baoq-anr gho-e-awr, ghaq khavlar-awq.”* Ghaq baq-eu Kalizaq-aq, Miqyaer arsurghaq lalaer ngaer-awr, yawqha, Kali-euq lafkhoer aqsurghaq lealer ngaer-euq mirnae ghaq baq-eu mae. Ghaq khav-eu Kalizaq-aq, Miqyaer aqsurghaq lalaer siqnya-awr, yawqha, Kali-euq lafkhoer aqsurghaq lelaer siqnya-eu mirnae ghaq khavnya-eu mae. Naef sanqpaq-anr guir deuv-eu, *“Miqyaer nae biflaf-euq guirdeuv keuka dawqtawv luf dm-awr”* deuv-eu maqngneur nar-aq, yawqha-euq ghaq & zaqsiq tsawrganr-anr gho-e-awr deuvnae-aq maqdeuvghaq nya-a. Guir deuv-eu kaka *‘dawqtawvluf’* yadm-eu mae, tiqjeq-iq maqya byaer-a. Aqdui, Miqyaer aqjox-aer muiq-awr arnavni huiq-eu lalaer siqnya-eu uqtaf, yawqha Kali-euq lafkhoer arsurghaq pyeuf-awr, Miqyaer nae bifnaeq laf-eu guir deuv-eu kaka aqjerjeq javle laer laeqhmq-awr zmqnar-aq, naef sanqpaq-anr deuvghaq nya-eu mae.

2. *Muir-eu ghaq-anr yawmuiq-aer siqnya-awq (Eps.6:12)*

“¹²*Aqjeq mirnae aernar-aq, aqdui guir deuv-eu-aq, shiq hawr-eu shaqjir-anr deuvluf-eu maqngeur. Aqdui heudeuq-anr deuvluf-eu ma: uvlanr-eu deuq, aryaq deuq, mirtsaq yawzanr-euq khoertav baoq jav-eu deuq hawr-eu, mq-anr jawr-eu yawdoer yawcawv-euq saflar deuq-anr deuvluf-eu ma.*”

Saflarpaw guirdeuv deuv-eu, aqdir muir-eu ghaq maqngeurgar deuv deuv-aer maqjawrni yayanr-eu mae. *Aqjeq mirnae aernar-aq, aqdui guir deuv-eu-aq, shiq hawr-eu shaqjir-anr deuvluf-eu maqngeur.* Naef sanqpaq, aqdui-anr shiq & shaqjir piluf-eu tsawrhaq-euq yawkaq bideuv-eu laer ‘tov-eu’ khawf, aqdui, aqyawf-euq jaqmyawf-anr maqya tawvler-a. Aqdui guideuv yadeuv-eu ‘**naef sanqpaq**’ tsawrmyanr ghawqmya myanr jav-eu mae: **Saqdaq**-aq, Miqyaer & Miqyaer-anr taf-eu jeq-anr ‘*muir-eu ghaq*’ laer aermawf-awr (Mt.4:10), *iqbax taq-eu ghaq* (Pm.12:7-11), *murjur jur-eu ghaq* (Mt.4:3), *jaqmyawf & saef-eu ghaq* (Yh.8:44), *khoeq-eu, saef-eu, lavcawv-eu smrkhoeq tanrjoe pyeuf-awr* (Yh.10:10), *arlaqjaqshir* (1Btl.5:8), *arlawr* (Adb.3:1; Pm.12:9), *yawshaef-eu mqtav ghaqkhaer* (2Glt.11:13-15), *heuzir-euq miqyaer* (2Glt.4:4) pyeuf-eu mae. Naef sanqpaq & naefdeuq, ardanq baengae, Miqyaer nae bae-euq mqtav ghaqkhaer pyeuf-eu garnae, nuima huiqlar-awr coq-ir ngae (Isy.14:12-15; Ezk.28:11-19), mqtav ghaqkhaer 3 bymr-anr nae 1 bymr gmler-euq mae (Pm.12:4). **Naef Saqdaq-euq guirmaf-euq** ardeuv artiv heulox-aer birtaq-euq mae; Tif, **Naef Saqdaq**, *Nyif, Uvlanr-eu deuq, Smr, Aryaq deuq, Oeq, mirtsaq yawzanr-euq khoertav Baoq jav-eu deuq, Ngaq, mq-anr jawr-eu yawdoer yawcawv-euq (naef) saflar deuq.*

3. *Aqmyanluf guirdeuv deuv-eu laeqhmqtaw-awq (Eps.6:13)*

“¹³*Khoermirnae, doer-awr cawv-eu arnan keuvlengae ciqdaqnya paq-aer, Miqyaer nae biflaf-euq guirdeuv keuka dawqtawvluf dm-awq. Nawmaf, kharmr nya-eu yawqjeq navluf mr-euq nar-aq, zifdanni yawfnya taef-a.*”

Khoermirnae, naef Saqdaq-euq guirmaf teunav nav-aer laeqhmq taq-awr, aqdui-anr deuvlar luf-eu mirnae, aqdui ciqdaqnya paq-aer, zifdan ni yawfnya paq-aer, Miqyaer nae biflaf-euq guirdeuv keuka dawqtawvluf dm-awr, kharmr nya-eu yawqjeq navluf ya ‘mr-eu mae. Naef sanqpaq, aqdui-anr aqmyan deuvlar-eu *doer-awr cawv-eu arnan*

aqmyan keuvle-eu laer maqsiqnya-eu mirnae, aqdui, aqmyanluf, naef sanqpaq-anr deuv-eu laer laeqhmq taq-awr yajawr-eu mae. Naef sanqpaq-aq, aqdui-anr kawfsaef dzaq-eu laer arlaqjaqshir lof-aer jawqluf-eu mae (1Btl.5:8; Lk.4:13).

B. Guirdeuv Aqjeq nae Yadeuv-eu la? (Eps.6:14-20)

Kalizaq saflarpaw guir deuv-eu, guirdeuv keuka ghawqmyajej jav-eu “*Guirdeuv keuka dawqtawvluf*” yadm yazmq-eu mae (Eps.6:11, 13). Guirdeuv kaka heu tiqjeq taef-aer khawf maqya bigadov yaf-a. Biga dovyaf nar-aq, naef sanqpaq-anr jawrduq bi-eu jeq pyeuf-ir-eu mae (Eps.4:27). Teumirnae, “*Guirdeuv keuka dawqtawvluf*” zmq-awq.

- ***Yawtsaq yawdawr-euq jofpaf.*** ^{14a} *Khoermirnae, jofpaf paf-eu lof-aer*

yawtsaq yawdawr paf-awq.” Jofpaf-aq, Lormav guirzaq-euq maeqtsoeq yoeyoe yaya-aer maqbi ghaeni, yurluiv-awr kafcuf-eu & micaer shafduq pyeuf-eu mae. Jaqmyawf maershuir tiqghaq-euq daefzir-anr urler-euq nar-aq, aqyawf-euq daefzir yawbanq yawlanr-aer pyeuf-ir-eu mae. Daqbir, Baqsheqbav-euq garkawv jaqmyawf bi’urlar-awr, aqyawf-euq daefzir & zawfjir yawbanq yawlanr-aer pyeuf-ir-euq mae (Jc.32; 51). Aqmyawf-anr siqnya’ni, armar-anr maeqhu yasiq nya-eu mae. Saqdaq-aq, jaqmyawf-euq aqda pyeuf-awr myawflar gar siqnya’ni (Yh.8:44), yawtsaq yawdawr pyeuf Kali-anr yasiqnya-eu mae (Yh.14:6).

- ***Tsaq-awr dawr-eu khanq-anr daeqkaq-eu jeq.***

^{14b} *khanq-anr*

daeqkaq-eu jeq lof-aer tsaq-awr dawr-eu jeq dm-awr zifdan’ni yawf-awq.” Khanq-anr daeqkaq-eu guirdeuv keuka heuhmq-aq, maeqshi narkhan-aer kawqlanr-anr nae jof-anr keuvni daeq-eu mirnae; nuima, uqmav & narkhan maqbi deuvzaw maqbi beuvzaw larni khmq-eu jeq pyeuf-eu mae. Khoerlof-aer durni, Kali-euq lafkhoer *tsaq-awr dawr-eu jeq-aq* (2Glt.5:21; Eps.4:24), aqdui nuima zifdan’ni ghaenya-awr, maeqnan paw-euq garkawv guvkar maqza, maeqhupaw khaqdu’ni lenya-eu ma.

- ***Tsaqler dzoerler-eu guiqlanq dawq-euq***

saeqnawv. ¹⁵ *Aqkuir,*

saeqnawv nawq-eu lof-aer, tsaqler dzoerler-eu guiqlanq dawq nawq-awr

laeqhmq taq-awq.” Lormav guirzaq-euq saeqnawv-aq, lafovpaw smrsaeq tsof-awr, canngae maqjur-ir-aer, zifdan’ni yawfnya-awr maeqhupaw zifdan’ni lenya-eu mae. Saeqnawv-aq, laeqhmq dantaq-euq gar aermawf-eu lof-aer durni, yawqjawr navluf laeqhmq danqtaq-awr guiqlanqdawq ya’maeq-eu mae (2Tms.4:2). Aqdui maeq-eu guiqlanq dawq-aq, tsawrhaqzaq yawkaq & tsawrhaqzaq, Miqyaer naeq-aer *‘tsaqler dzoerler-eu guiqlanqdawq’* pyeuf-eu mae (Yk.4:1-7; Lm.5:1). Heulox-aer mr-eu gharduq, aqdui, Kali-euq **‘danzar’** pyeuflar-awr (2Glt.5:18-21), aqdui-euq aqkuir **‘hawmuiq-eu aqkuir’** pyeuflar-euq mae (Isy.52:7; Lm.10:15). Ghaq khav-awr muiq-eu Kali-euq guirzaq-aq, guiqlanqdawq-anr zifdan’ni jan-eu taef-aer maqngeur-eu jashaw nya-eu mae. *“Aqcawq, nawmaf noeqtmq luf-eu garkawv narhaq larngae, aqjox-aer aer khof-eu laer yawmuiq-aer laeqhmq taq-awr, nuima nanqyuni yawzeu baw-eu lafkhoeer aerkhof naeq-awq”* (1Btl. 3:15).

- **Jan-eu daeqdaq-eu jeq.** ¹⁶*Khoeruqtaf, daeqdaq-eu jeq lof-aer jan-eu*

jeq-anr zifdan’ni tuvtaeq taq-awq. Jan-eu daeqdaq-eu jeq khoer-aq, yawcawv ghaq nae beuvlaf-euq miqdzaq dof-eu kavmyaq dawqtawv luf-anr lavmiv nya-eu mae.” Lormav guirzaq-euq *‘daeqdaq-eu jeq’* micaer, ganq, kavmyaq yawqha-euq mawrdo-anr maqbi zawlar-eu laer aqlaf-anr tuv taq-awr daeqkaq-eu darkawq & shmr nae janr-euq bawseu seuma lof-aer dur-eu mae. Naef sanqpaq-euq miqdzaq dof-eu; jaqmyawf, maershuir, dawqdoer, murjur, dawqpyaer... kavmyaq heu deuq, beuvlaf ngae, aqdui-anr maqbi beuvzawni, Miqyaer-anr jan-eu jeq-anr zifdan’ni tuvtaeq taq-awr miqdzaq dof-eu kavmyaq-anr yadae dzae-eu mae.

- **Kakhof-eu jeq-euq shmr uqkhov.** ^{17a}*Shmr uqkhov khov-eu lof-aer*

kakhof-eu jeq-anr khov-awq.” Lormav guirzaq-euq shmr uqkhov-aq, micaer & kavmyaq maqtavler nya-eu shmr uqkhov mae. Kakhof-eu jeq 3 tiv jav-eu mae; *Tif*, arhu Kali nae **saflar** mrshawr-euq mirnae, *kakhof-eu jeq zadzeur-awr*, iqbax baqda yarkhaqdar-eu garnae buq-ir-euq ma. *Nyif*, nymq-mr Yawshawr Saflar **nuima & daefzir** lavshawr luf-eu mirnae, *kakhof-eu jeq zaluf-awr*, iqbax-euq baoq-anr nae buq-ir lufma. *Smr*, aqkar Aqda Miqyaer **nuima, saflar & mawrdo** shawrjir ngar-a laer

dawqtawvluf-anr hageuf-awr, iqbax dawqpae maqpar bijav-eu mae. Heulof-aer jan-eu-aq, kakhof-eu jeq-euq shuir uqkhov khovluf-eu mae.

- ***Miqaer-euq dawq muiq-eu Saflar-euq micaer.***

“^{17b}*micaer shaf-eu*

lof-aer muiq-eu Saflar-euq micaer pyeuf-eu Miqaer-euq dawq-anr shaf-awq.” Lormav guirzaq-euq micaer-aq, yawkawr-aer gheudov-awr zmqnya paq-aer jofpaf-anr shaf-eu mae. Guirdeuv keuka nuideuq-aq, khmq-eu guirdeuv keuka mae. Aerkhawf, micaer-aq, khmq-eu taef-aer maqngeur-eu deuvghaq-ir-eu guirdeuv keuka khawf pyeuf-eu mae. Yaerdawq-aq nyiqpyawq tav-eu micaer pyeuf-awr (Hby.4:12), yagaq-euq tsawrhaq-euq nuima-anr ‘yaeqler-eu’ mae (Ghkh.2:37; 5:33). Aqcawq, Yeqsur-anr nyaeflar ngalaer Beqtuvluf, aqyawf-eu micaer nae coerghae-eu mae (Lk.22:47-51). Aerkhawf, Beqdeqgordeq annan-anr ‘muiq-eu Saflar-euq micaer’ tavler dzaeqnga laer ya’ mawr-euq mae. Yaerdawq, naef sanqpaq deuvlargar khmqnya-eu uqtaf, naef sanqpaq-anr deuvghaq-ir nya-eu keuka pyeuf-eu mirnae, Yaerdawq yur-awr *maeqngae, ngaeqngae, guingae, ghaq bifngae, maeqnaeq tsovnaeq nga*, garma toeqmaeq-awr yawshaef bya’ naeq-eu lafkhoer naef sanqpaq-anr deuvghaq-eu jeq pyeuf-eu mae.

C. Guirdeuv Aqjox-aer Yadeuv-eu la? (Eps.6:18-20)

“¹⁸*Nawmaf, ghaqpyawq dawqtawvluf zmq-awr aqmyanluf guiqlanq shar-awq. Muiq-eu Saflar lafkhoer tanqshar-awq. Yawbeur beur-aer oror-aer guiqlanq shar-awq. Tsawrshawr dawqtawvluf gharduq guiqlanq sharcaw naeq-awq.*”

Kalizaq, saflarpaw guirdeuv deuv-eu-aq, guiqlanqshar shar-aer yadeuv-eu mae. ***Guirdeuv deuv-eu Guiqlanq Aqjox-aer Yashar-eu la?***

- ***Ghaqpyawq dawqtawvluf zmq-awr shar-awq.***

Tiqghaq taef-aer,

baqmaf-aer, nuir-awr, yawf-awr, yawqha gharduq, aqcawq gharduq, gurgur-aer, carcar-aer, jaceuq jaceuq-aer, ciqcurni... shar-awq.

- ***Aqmyanluf guiqlanq shar-awq.*** Yawqjawr

navluf, Miqaer

naeq-aer dawq ngaecqawq luf-eu tsawrhaq-aq, tiqjawr-iq naef sanqpaq-anr maqghaq lergar maqya guv-ar (1 Tsln.5:17).

- ***Muiq-eu Saflar lafkhoer shar-awq.*** Miqyaer nuima tsaq-eu lof-aer miqdaq dof-eu lafkhoer sharnya lar-eu mae (Lm.8:26-27).
- ***Yawbeur beur-aer shar-awq.*** Heu-aq, mirtsaq-anr (Mk.13:33), shiqshaq-anr (Mk.14:38) & naef sanqpaq-anr (Eps.6:18), *ghaqler-eu garma mae*. Beqtuvluv mrbeur-awr guiqlanq maqshar-eu mirnae, murjur jurlar-eu jeq-anr maqghaqler nya-aq (Mk.14:29-31, 67-72).
- ***Oror-aer guiqlanq shar-awq.*** Laejae-awr nuima keuv-awr, yaw'awq-aer maqnaq maqbyaerni, arhu-euq Kalizaq heulof-aer shar-euq ngalaer mawrlar-eu mae (Ghkh.1:14; 2:42; 6:4; 12:1-19/ Lm. 12:12).
- ***Tsawrshawr dawqtawvluf gharduq guiqlanq sharcaw-awq.*** Yeqsur, aqdui-anr “Mq khoertav jawr-eu, nga'maf-euq Aqda-or” laer sharlaer maeqnaeq laf-eu lof-aer, aqcawq-euq gharduq sharcaw-eu maqyabyaer-a. Pawrluv guiqlanq dawq maeq-eu baqda'nae shmrcav daqluf-eu, guiqlanq dawq parmaeq-eu gharduq, zaqsiq tsawrganr & nuima khaqduqni anr-awr maeqnya'ni gharduq guiqlanq sharcaw naeqlaf laer aer-eu mae (Eps.6:19-20).

D.Aqsurghaq naeq-aer Gm-awr Yadeuv-eu la? (Eps.6:21-24)

1.Durjir & Pawrluv (21-22) “²¹*Ngar aqjox-aer pyeuf-luf-awr, aqjox-aer*

mrluf sharluf-eu garkawv nawmaf yasiqni, sarjax zif-awr Sanqpaq Miqyaer-euq gar mrzaq pyeuf-eu, ngar zawrgaq-eu maenmr Durjir, nawmaf-anr yawqjeq navluf ja'naeqlaf taef-a. ²²*Nga'maf aqjox-aer pyeuf-luf-eu garkawv nawmaf-anr bisiq-awr, nawmaf-euq nuima bisar lar-eu gharduq, ngar, aqyawf-anr nawmaf jawrgar khaerghae lef-euq ma.”*

Kali-euq guirzaq tiqghaq tiqgar jawr-eu khawf, nuigaq anr-awr, dawqdzawr mr-eu lafkhoer ya'mr taf-eu mae. Durjir lof-aer sarjax zif-eu gar mrcawq-aq, yawqghaq navluf nuima sarduq pyeuf-eu mae.

2.Dawqngaeqghae-awr saq-eu (23-24) “²³*Aqda Miqyaer hawr-eu*

Sanqpaq Yeqsur Kali-anr nae oe-euq, nuisar of-eu jeq, gaq-eu jeq hawr-eu jan-eu jeq, aqyuif aqnyir deuq-euq khoertav javluf-ur. ²⁴Aqdui-euq Sanqpaq Yeqsur Kali-anr maqbyov-ir ni gaq-eu tsawrhaq yawqghaq navluf-euq khoertav, guiqlanq yawdzanr javluf-ur. Aqmeq.”

Pawrluv kuv-anr jawr-eu khawf, Kalizaq-anr: ***Nuisar of-eu jeq—Gaq-eu jeq—Jan-eu jeq—Guiqlanq yawdzanr*** biza’ni dawq ngaeqghae naeqnya-eu khoer-aq, Pawrluy, Miqyaer aqsurghaq lalaer & yawqha Kali-euq lafkhoer aqsurghaq lelaer siqnya-eu mirnae mae.

III. Arsaq _Saq-eu_Dawq

Miqyaer-euq *guirdeuv keuka dawqtawvluf*, Yeqsur Kali-euq arbar mae. ***Kali-aq***; *yawtsaq yawdawr* (Yh.14:6), *tsaq-awr dawr-eu jeq* (2Glt.5:21), *nuisar of-eu jeq* (Eps.2:14), *jan-eu jeq* (Glt.2:20), *kakhof-eu jeq* (Lk.2:30) & *Miqyaer-euq dawq* (Yh.1:1, 14) pyeuf-eu mae. Aqdui, Yeqsur Kali-anr hageuf ngae nan-anr nae, *guirdeuv keuka heudeuq zajir-euq* ma. Aerkhawf, nan-anr nae khawf, yadm dav-eu mae.